






Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.102/a







Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.102/a





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.102/a




Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.102/a



1. 5. 102























1  
CARMINA  
ANTONII  
GIGANTIS  
FOROSEMPRONIENSIS

EXAMETRA,  
ELEGIACA,  
LYRICA, &  
HENDECASYLLABA.


1.6.102



Bononiae, apud Ioannem Rosium. MDCXCV.  
Curiae Archiepisc. & S. Inquisit. concessu.












II

AD  
ILLVSTREM VIRVM,  
ET EXCELLENTISSIMVM  
IVRISCONSVL.  
ANGELVM  
SPANNOCCHIVM  
SENENSEM,

In Gymnasio Bononiensi Primarium  
Lectorem



1.6.102

ANTONIUS GIGAS.



VM nimium cautus, timidusue,  
bone ANGELE, rebar  
Me benè carminibus consu-  
luisse meis:  
Subuereor, dura nimium cerui-  
uice reluctans  
Ne fuerim monitis, consi-  
lijsq; tuis:

*H. Primarius  
Summa*

Namq; mihi saterat, penitus post funera mecum  
Obscura si non obruerentur humo.

A 2 Atq;



Atq; ideo Senis tutò seruanda locaram  
Musæo in nitido, nostri & amante domo.  
Tu verò censes, ea non indigna videri,  
Quæ vulgo iam nunc edita quisq; legat:  
Ne dum alijs etiam quæ notificentur amicis,  
Siue illi nobis sint propè, siue procul.  
Hiscere iam contra nil audeo; tantus & ipse  
Auctor es, & tanti sunt tua verba mihi.  
Auspicijs en ergo tuis in luminis auras  
Procedunt: pergas illa fouere, precor.  
Ast ò ne pigeat te consuluisse clienti,  
Quod non æquè omnis lector ubiq; probeet.  
Me certè, quòd sim talis consulta patroni  
Amplexus, nemo carpere iure queat.



A D




III

AD PERILLVSTREM  
HIPPOLYTVM  
AVGVSTINIUM

SENESEM

Caldanae Dominum, ac Militiae S. Stephani  
in Patria Balium



ANTONIUS GIGAS.



VALI pauper opum, sed mul-  
tae prolis abundans.

Iam senior natis prospicit arte  
pater:

Quorum aliquem ingenuae  
tactum virtutis amore,

Ne vitam obscuro sub lare de-  
gatiners;

Culturac, obsequioq; dicat locupletis amici,

Vt sibi praesidium comparet, atq; decus.

HIPPOLYTE illustris, tali hunc ego mente libellum

Mîcarum ante alios, dono, dicoq; tibi.

Ingenij foetus natorum nomine nosti

Di-



Dignari, & partus quenq; fouere suos.  
Ipse etiam hunc genui, donec melioribus annis  
Congressum haud renuit casta Thalia meum.  
Ast eadem nunc me, canos exosa capillos,  
Torpentem & calamū, iam tremulamq; manum,  
Negligit. hinc soboles quo sese tuta receptet,  
Quandocunq; mea destituatur ope,  
Dum meditor: lustrī vñdecimī nam sine propinquo  
Haec animum ( fateor ) cura subinde premit:  
Vnus tu nobis occurras dulce leuamen,  
Atque tuo tandem est parta in amore quies.  
Hoc equidem bonitas suadet sperare, fidesq;,  
Splendidaq; hospitibus semper aperta domus.  
Nempe quòd excipies laeto mea carmina vultu,  
Seruabisq; graui fulta patrocinio.  
Non tamen vt Vatū haec inter monumenta reponas  
Poscimus: haud mentem tanta cupido subit.  
Quin mihi sat fuerit, pluteo vt condantur in imo,  
Non sine laude locus te penes vllus erit.  
O vtinam sic te Liber oblectare legentem  
Possit, Musaeo vel decori esse tuo.  
Musaeo insigni omnigenis, quas maxima mittit  
India, vel Libye, vel nouus orbis opes.  
Insigni & pictis tabulis, & marmore, & ære,  
Arte quod expolijt prisca, recensuè manus.  
Singula sed multis nequeam ornamenta referre,  
Ne dum pagella stringere cuncta breui.


Tam



IV  
Tam variae rerum Naturae, atq; artis in vnum  
Congestae species tecta per ampla nitent.  
Nec minus ornatus librorum, & copia, & ordo,  
Magnifici, & culti dant animi indicium.  
Quamquam nō omnis laudū est haec summa tuarū,  
Fonte ab inexhausto nam tibi manat honos.  
Cuius ad extremos interdum accedere riuos  
Optavi, longa me stimulante siti.  
Sed mage purgatis haustus tam nobilis vndae  
Continget labijs munere Pieridum.  
Quae cygnos etiam tibi alunt, sublime canendo  
Laturos quondam nomen ad astra tuum.  
Quorum ego si merear cantus audire superstes,  
Supremum potero laetus obire diem.  
Interea gaudebo tuis splendoribus, & te  
Carmine si nequeo, corde, animoq; colam.









ANTONII GIGANTIS  
FOROSEMPRONIENSIS  
CARMINA EXAMETRA.



Ad LVDOVICVM BECCATELLVM Bononiensem  
Ragusinorum Archiepiscopum.



ISDEM te affari audemus, Pater  
optime, verbis,  
Magnus Alexander quibus vii iu-  
re solebat,  
Tolleret eximium gratus cū lau-  
de magistrum:

Cui sese plus, quā debere parentibus ipsis;  
Aiebat, quod tantū hi esse, ille benè esse dedisset.  
Nam si qua ingenuae mihi inest virtutis imago,  
Poculaq̃ Aonijs si qua vnquam nectaris hausi,  
Acceptum hoc vni refero tibi; si tamen ipse  
Tot pulchras inter pinus, laurosq̃ virentes,  
Queis tua felices cultura exornat agellos,  
Crescere siluestris germen patiaris oliuae.  
Quanquam si obnixo potuissē tendere cursu  
Semper, & egregios non exhorrere labores;  
Te monstrante viam, & verae exemplaria laudis,

B

Iam



Iam nunc forte sacra Parnassi tutus in arce  
 Conderer, aërij emensus fastigia montis,  
 Cuius iners adeò vix limina prima pererro.  
 Me mea culpa premat, meriti modò gloria tantè  
 Te maneat, famuli ingeniumq̃, animumq̃ labantem  
 Et studio, & cura assidui excoluisse parentis,  
 Hacq̃ ipsum ditasse tenus pro viribus Ultrò.  
 Quamuis parua tuae hinc sumant exordia laudes,  
 Nec tibi me tantùm benefacto obstrinxeris unum.  
 Vocibus haud dubijs nam plurima turba clientum,  
 Et longè acclamat mihi littoris ora Liburni;  
 Diues ubi magno Pastorem Epidaurus honore,  
 Sponte, diu, precibus multis, votisq̃ cupitum,  
 Te colit, & gregibus praebentem pabula laeta,  
 Et nitidos fontes te grato praedicat ore.  
 Hae tibi semper erunt artes, quocunque locorum  
 Romani te iussa Patris, summiq̃ Senatus,  
 Aut sacrum munus, caelestisq̃ aura vocabunt.  
 Quàm multos de te memores fecisse merendo.  
 Carmine at haec olim forsàn meliore canemus,  
 Nunc satis est, mentem accepti praeferre tenacem.





Ad LVDOVICVM PARISIVM Iuniorem  
Regiensem.

**P**IERII Ludouice chori clarissime cultor,  
 Si tibi adhuc animo obuersatur forte Gigantis  
 Nomen, & illius ni dedignare Thaliae  
 Versiculos legisse, tuam quae numinis instar  
 Iam pridem toto veneratur pectore musam:  
 Hos lege conscriptos in Prato nuper amoeno,  
 Quod Tuscus rapidis Bisentius alluit undis.  
 Primò ubi iam celebrem scriptis, & nomine notum  
 Te fuit optanti mihi compellare facultas.  
 Hic me (qui tuus humanus, cupidusq. iuandi  
 Est animus) gradibus lentis Heliconā petentem  
 Vrsisti placidis monitis, ac tuta viarum  
 Monstrasti spatia, & quidnam vitare, sequiū  
 Conueniat sacros audenti scandere montes.  
 Tunc ego sic anidam admoui sermonibus aurem,  
 Et doctas imo sic hausi pectore Voces,  
 Vt sitientis ager Libyae non siccior vnquam  
 Per medios aestus effusum admiserit imbrem.  
 Quin grates coram, ut potui, tibi saepius egi,  
 Nec minus absenti interdum me signa daturum  
 Promisi, ut mecum tua quantum hortamina possent,  
 Perspiceres, quamq. ipse tui non immemor essem.  
 Ecce autem, mensis dum praeterit vnus, & alter,  
 Promissi reus in quintum iam deferor annum.

B 3

Nae



Nae mala segnities, consuetis nescia pelli  
 Sedibus, inuitum officio me deesse coëgit.  
 Erravi, fateor, mendaxq; redarguor. at tu  
 Ignosce, & facilis, precor, obliuiscere culpam.  
 Nec serum potius calamum, segnemq; Camoenam  
 Incuses, quam me reputes haud vana locutum,  
 Cum nullo immemorem despondi tempore mentem.  
 Namq; eadem mihi semper erit, nec inertia mollis,  
 Nec longinqua loci, vel temporis interualla  
 Inde tuum poterunt unquam diuellere nomen.  
 Nunc quid agam, si scire cupis, vel noscere curas,  
 Isdem me oblector studijs, iisdemq; libellis,  
 Conclauis quos ipse meo versare solebas  
 Saepius, atque mihi ante oculos praeferre legendos.  
 Praecipue tamen altiloqui me musa Maronis  
 Detinet, inq; dies animo se pulchrior offert,  
 Thesaurosq; aperit, dites quibus India merces  
 Non queat, aut aurum, aut gemmas conferre nitētes;  
 Cuius ego à teneris formam admirarier annis,  
 Et colere ante alias assueui; at vera fatebor,  
 Haecenus eximium non inspexisse decorem,  
 Quo summo illa pedes à vertice splendet ad imos;  
 O te felicem, dio cui nectar ab ore  
 Libare, & fas est altos cognoscere sensus,  
 Scilicet & tantae cantus audire Camoenae,  
 Quorum vix tenuis nobis allabitur aura.  
 Est mihi praeterea curarum dulce leuamen

Te-



CARMINA EXAMETRA. §

*Testudo, haud ignota quidem tibi, nec rudis illa  
Artificis fabricata manu, sed pectine digna,  
Cui magis ornatos numeros inspiret Apollo.*

*Sed neque sic animum diuini carmina Vatis  
Delectant, neq; sic citharae sonus excitat aures,  
Patroni ut suadela mei, & doctissima verba;  
Quae bene tu nosti, & quorum me longior usus  
Iam magis atque magis sitientem reddit, ut haustu  
Expleri nequeam, siue ille recenseat omnem  
Temporis exacti seriem belliq; togaeq;  
Plurima quae prudens oculis percepit, & aure,  
Protinus & memori percurrit mente legendo.  
Siue sacros libeat Sophiae recludere fontes,  
Et mirè ignotas rerum perquirere caussas.  
Seu caeli tractus, & caelo errantia dicat  
Sidera, terrarumq; situs, & nomina monstret.  
Siue arcana Dei, & leges (quae maxima laus est)  
Explicet, atque pios cultus, & mystica sacra.*

*Tu verò mi docte Pater, iam tempore ab illo,  
Quo patriam hinc parua cum nata, & coniuge abisti,  
Quidnam agis? an' ne omnes sani, rectèq; valentes  
Viuitis? egregio quid dignum Musa cothurno  
Panxit adhuc? quidûe illa tibi nunc sedula dicat?  
Cui tot magna dedit, pulcher negat ocia Phoebus.  
Num forte oppressos dudum meditare tumultus,  
Impiae et excidium gentis, quae Gallica regna  
Obnixè toties sceleratis miscuit armis?*

*Num*



Num'ne etiam illustres longum meditaris in aeuum  
 Aeternare viros, quos incluta Gallia fortes  
 Vltiores armat pro Christi nomine, & aris,  
 Nec non pro Caroli sacro diademate Regis?  
 Et quos ingenti tactos pietatis amore  
 Itala in auxilium tellus, & Iberia misit?  
 Sine hoc, siue aliud doctis intexere chartis  
 Instituis, coepta Aonides, ac vota secudent.  
 Ne tamen à studijs pigeat seiungere partem  
 Temporis exiguam, ut dulci me carmine dignes,  
 Edoceasq; statum rerum, Parifete, tuarum.  
 Quòd si nulla mei tangit te cura, patrono  
 Obsequere, haec eadem de te cognoscere auenti,  
 Qui tibi me multam iubet impertire salutem.

LVDOVICI PARISETI Iun. Ad ANTONIVM  
 GIGANTEM.

**E**SSÈ Giganteum cùm te perpendo, videtur  
 Haud quaquam mirum, si tu sublime canendo  
 Affectes caelum, & diuos superare Poetas  
 Scribendo moliris, inis cognomine dignum  
 Effectum: robur magnum, viresq; potentes  
 Eloquij ostendis: veluti superare Gigantes  
 Corporea reliquos perhibentur mole, canendi  
 Viribus exuperas sic tu quoscunque Poetas,  
 Qui nostra celebres hac tempestate feruntur.  
 Tolleris ut famam in caelum, grandiq; Gigantem  
 Nomi-



Nomine te praestas: sic religione calere  
Te vellem tanta, tanta & pietate teneri;  
Ut caelum appeteres, caeloq; inferre Gigantem  
Te vitentares lata; te molibus una  
Congestis tribus in caelum sustollere quibus:  
Et poteris, firmata fide si machina crescat:  
Mole spei, & culmen capiat charitatis, in altum  
Te ferre, & superato omni descrimine caelum  
Scandere, quod prisca iam non potuere Gigantes  
Montibus aggestis conscendere: quibus in illud  
Omnino te ferre Gigas, si montibus usus  
His plane fueris, charitate videlicet, & spe,  
Atque fide: si vi cumulandis montibus istis  
Praecipua institeris: caeli superare petendi  
Difficiles quascunque vias sic quiveris ipse:  
Vim patitur caelum, caelum violenter initur.  
Namque per affectus contusos corporis, & per  
Coniectos sensus in vincula, perq; redactam  
Hanc in contemptum vitam via panditur, & ui  
Illata caelum recluditur: arcta patescit  
Ianua, & expugnata aditum subeuntibus vltro  
Permittit. Sic te caelum affectare Gigantem  
Optarem: sic te positis affectibus huius  
Et vitae, & mundi cuperem violenter agentem,  
Atque giganteo pugnante robore, caelum  
Aggredi, & aetheream pugnando viriliter arcem  
Consequi, & aeternam caeli tibi quaerere sedem.

Ni



Ni profligato vitae praesentis amore  
 Huius, & affectu mundi violenter abactō;  
 Spe, charitate, fide fueris subnixus, & hisce  
 Molibus instructis fueris sublatus: in altum  
 Scandendi, & caeli subeundi cedit inanis  
 Conatus, vanoq; exhibit futilis ausu:  
 Nec secus, ac priscos fiducia caeca gigantes;  
 Te frustrabit, & expertem te deniq; fructus  
 Arguet in vanis studijs triuisse laborem.

Ad LVDOVICVM PARISETVM Iuniorem  
 Regiensem.

**S**IC me Christus amet, trepidamq; in fine supremo  
 Hanc animā ab rigido clemens sibi vendicet hoste:  
 Ut, Parise, tuum mihi doctum, et amabile carmen  
 Vitae adeo ingentes aeternae exciuit amores,  
 Ut quicquid studio pridem sectabar inani,  
 Respuere incipiam iam nunc, & pendere parui.  
 Quas igitur grates tibi tanto munere dignas  
 Aut dicam, aut referam? Veri nam functus amici  
 Officio, ut par est, servasti prorsus amicum.  
 Dum tu fucato medicamine nescius uti,  
 Interius condi ferrum, resecandaq; censes  
 Ulcera; ut insanos mens scilicet exuat omnes  
 Affectus, quibus, aduersis ceu naus ab undis,  
 Huc illuc rapitur, nec sede quiescere certa  
 Est potis: immotam nisi fortior anchora firmet.

Quam



Quam non posse alio religari in littore sensi  
 Vix tandem, quàm quo Christus spatiatur, & alto  
 Aduocat in portum fluitantes aequore nautas.  
 Quò tua me posthac certum est exempla sequentem  
 Cursum dirigere, & curarum turbine nullo  
 Inde referre pedem. quin laeta voce profari  
 Iam libet, Illecebrae mundi procul este procaces,  
 Nil mihi vobiscum, iam vos, & vestra perosus  
 Despicio, ac studij capior melioris amore.  
 Talia nunc equidem sub te, Ludouice, magistro  
 Proferre audebo: tantum tua scripta legendo  
 Tollo humo, & solum vera, atq; decencia curo.  
 At tibi pro tali largè pietate rependat  
 Praemia Caelicolum rex, eius numina quando  
 Tantopere ipse colis, nec non sermone disertio  
 Inuitas alios, merito vt veneratione honore.  
 O me felicem, si docto excerpere ab ore  
 Colloquia interdum coràm, & praecepta liceret.  
 Sed postquam longis dispecimur interuallis,  
 Ne, quæso, dilecte pater, cum forte vacabis,  
 Dedignere tuis me compellare tabellis,  
 Vt maiora meis calcaria cursibus addas.  
 Interea, vt valeas, cura, Antoniꝰ memento,  
 Quo tibi non vsquam viuit mage deditus alter:  
 Illustris quamuis virtutum fama tuarum  
 Longinquas late sese diffundat in oras.

C

Quam



In Diuum NICOLAUM MYRAE Episcopum,  
& Confessorem.

QVAM celebrare diem primis assueuimus annis,  
Laudibus hanc etiam cumulet maturior aetas,  
Nicoleoq; sacro festum veneremur honore.  
Nam puer incinctus frondenti tempora lauro,  
(Quàm meminisse iuuat) tenera comitante caterua,  
Ardentes gestare faces, & ducere pompas  
Gaudebam, & clarè ante aras dictata referre  
Carmina. multiplici delubrum voce replebant  
Fundentes puro socij de pectore laudes.  
Ast ego diuinam illius longo ordine vitam  
Enarrans, loculos memorabam nocte silenti  
Aere graues inopis iactos in tecta parentis,  
Virginei dotes, ac tutamenta pudoris.  
Atq; adeò ut Christi normā, & praecepta sequendo  
Esset opes cunctas ultro impertitus egenis.  
Viq; Dei monitis Patarensi à sede profectum  
Magno illum populus Myrae excepisset honore.  
Quamq; pie in terris perfungens munere sacro  
Christicolas opere assiduus iuuisset, & ore.  
Tum saeuo innumeros seruatos aequore nautas,  
In portumq; rates medijs è fluctibus actas  
Incolumes Diui auxilio praesente, canebar.  
Et quae multa bonus numeris comprehensa magister  
Iusserat edisci, ac reddi inter sacra quotannis.

At



At quas, sancte Pater, dignas nunc dicere laudes,  
 Aggrediar? vel quo te carmine compellabo?  
 Omnia tunc meliora fuere, & carmina doctor  
 Optima condebat Panaetius, optimus ipse.  
 Atq; ego tunc saltem liquidos è gutture cantus  
 Promebam, & casto obsequio tua templa subibam.  
 Nunc iucundus abest vocis sonus, illaq; pridem  
 Carmina sunt oblita. novos sed fingere versus  
 Qualescunq; mea auderet fortasse camoena.  
 Verùm animi virtus deest, & sincera voluntas,  
 Qua Deus in primis inter solennia sacra,  
 Et vos caelestes animae gaudere soletis.  
 Ergò hinc Diue tuas adeo nunc cernuus aras,  
 Et supplex posco, vt regem stellantis olympi  
 Exores veniam mihi vitae ignauiter actae,  
 Ac menti vt priscum reddat pietatis amorem.  
 Hei mihi, praeteritos recolo si conscius annos,  
 Siue recens duro impressas in pectore sordes,  
 Horresco, & dira interius me cura remordet.  
 Tu modò, tu caelo, Antistes Sanctissime, ab alto  
 Affer opem, ac precibus pro me potioribus insta.  
 Solicitae hanc animae dotem impertire benignus,  
 Daemonis vt vafri illecebras exosa, pudicè  
 Viuere amet, studijsq; operam iam nauet honestis.  
 Ne quaeso, ne me in tantis patiare periclis  
 Destitui, & rapidis rerum demergier undis.  
 Namq; aliàs supero prospexi è littore nunquam,

Ludouicus  
 Panaetius  
 Fanensis  
 praece-  
 ptor me.



Aut ex Illyrij scopulis, surgentibus austro  
 Fluctibus, Adriaco iactatas aequore naues  
 Aequè, ac me infestae iactant hinc inde procellae.  
 Harum oculus tristem faciem caligine merfus  
 Non videt, & surdae nequeunt audire fragorem  
 Auriculae; ast animus iam pridem sentit, & horret,  
 Ac fessus tandem exoptat se condere portus.  
 Illuc te rectore, precor, me lenior aura  
 Deducat, dexterq; meis iam cursibus adsis.  
 Ut noua deinde tuis templis votiuâ Tabella  
 Pendeat, instauremq; memor tibi sacra quotannis.

Ad Io. BAPTISTAM BOVIVM  
 Presbyterum Regiensem.

**Q**UID me, care BOVI, toto hoc Septēbre manentē  
 Ruri egisse putas? vacuum num semper apricos  
 Per colles, & amoena vireta, & mollia prata  
 Censeres errauisse, libros, ac dulcia Musae  
 Alloquia exosum? non hoc me tempore tanta  
 Segnities cepit: terere haud sic otia magnus  
 Me meus edocuit dominus, nec tale sequendum  
 Exemplum de se mihi praebet: nam grauis annis  
 Nunc etiam legit assidue, solius avarus  
 Temporis, & cultis mandat quàm plurima chartis.  
 Quae praesens, & ventura admirabitur aetas.  
 Ipse igitur tanti ducis, etsi passibus aegris,  
 Optima sectando vestigia, me quoque doctis

Prisco-



Priscorum scriptis oblecto, conor, & inde  
 Non solum exhaustire sonum, dulcemq; leporem  
 Verborum libare, avidas qui mulceat aures;  
 Sed studeo, ut solidas animus sibi comparet escas,  
 Quae modo sufficiant, senij & seruentur in annos.  
 Non etenim hoc contra fas, aut caelestia iussa  
 Sollicitat studium mortales, si qua senectae  
 Subsidia ante diu seponant. non ego multa  
 Iugera discupio (caelesti gratia Regi,  
 Hac qui me scabie purgavit, itemq; Patrono  
 Gratia magna meo, cuius mihi dextera parco  
 Prospexit large) sed curam hanc totus in unam  
 Incumbo, ut sensus exuti affectibus almae  
 Imperium rationis ament, dominamq; volentes  
 Agnoscant; & quod deduxerit ipsa, sequantur.  
 Nimirum dilecte BOVI, illa immania monstra,  
 Quae quondam Herculeae vi perdomita esse feruntur,  
 Insanos dicam affectus, sensusq; rebelles.  
 Quidnam aliud Nemeae rabies compressa Leonis  
 Arguit, humani effraenam nisi pectoris iram?  
 Quidue Erymantheus sus praeseferre videtur,  
 Impuram nisi luxuriam, moresq; nefandos?  
 Aurea item aripedis quid signant cornua Cerui?  
 Auri nempe famem. reliquos sic ipse labores  
 Herculis expende, & seriem certo ordine longam  
 Agnosces vitiorum; multis quae ille periculis  
 Dum superat, decus emeruit, famamq; perennem.  
 Nae ma-



Nae magna est hominum socordia, delitiarum  
 Qui in medio positi, tantorum arcere furorem  
 Monstrorum se posse putant, & degere vitam  
 Laudibus aeternis dignam. non talibus unquam  
 Auspicijs atrox cessisset bellua Lerne,  
 Non ipsa Hippolyte, triplici non Cerberus ore.  
 Non igitur mirum, si serpere tanta per orbem  
 Portenta inspicimus: rursum finis occupat ampla  
 Augiae stabula, & sceleris sunt omnia plena.  
 Iam nemo rectas audit rationis habenas;  
 Verum quò venter trahit, ac vitiosa libido,  
 Infraeni ferimur. falsis qui vocibus aures  
 Implere vulgi, hunc plausu turba excipit omnis,  
 Huncq; ducem sequitur (si dijs placet) atq; sacrorum  
 Doctorem auscultat; sanctorum at dogmata patrum,  
 Et priscos ritus, & religionis honorem  
 Inuertens, gestit quidvis patrare nefasti.  
 Ac tibi ne videar satyram incoepisse, querendi haec  
 Iam finem faciam; quamuis tecum omnia fari  
 Ausim, nec te aliter credam sentire: sed vnde  
 Digressus noster sermo est, referatur eòdem.  
 Nosti igitur, quæ sit potior mihi cura, laborq;  
 Et quales, quantosq; hostes deuincere nitar,  
 Nec dulci sine spe, vt victoria leta sequatur  
 Viribus haud quaquam proprijs, aut artibus ullis  
 Fidentem, sed ope excelsi rectoris olympi,  
 Illius, immenso qui quondam tactus amore

Sedibus



Sedibus è summis oras descendit in imas  
 Terrarum, ut seui è manibus, vinculisq; Tyranni  
 Humanum genus eriperet, caeloq; referret.  
 Nunc tu quod poteris duris in rebus amico  
 Vel monitis, vel consilio prodesse fideli,  
 Care BOVI, absenti longis perscribe tabellis;  
 Aut meditare (breui quoniam veniemus ad Urbem)  
 Quæ super his coràm iubeas sermone diserto:  
 Nam tua permagni facio dulcissima verba,  
 Quippe ea, quæ puro noui de pectore prompta,  
 Unde, & fucus abest, hominum deterrima pestis.  
 Tum doctrina tibi, & probitas, & longior usus  
 Plurima suppeditant, ut, quæ mala nauiter ipse  
 Euitasti, alijs possis iam ritè cauere.  
 Id Verò inprimis te impensè oramus, ut aras  
 Quandocunq; Deo facturus sacra subibis,  
 Illum suppliciter poscas, ne nos sinat ulla  
 Terreri hostili facie, sed protegat alto  
 Auxilio, & nostras dextro spes numine firmet.

Ad LAVRENTIVM IACOMINIVM  
 TEBALDVCCIVM.

LAVRENTI, insolito quem pulcher Phoebus amore  
 Diligit; & magnos cui iam designat honores:  
 Si rude purgatas hoc mittere carmen ad aures,  
 Et mea te absentem audet compellare Thalia,  
 Ne tibi sit mirum, ignotam nec despice musam.  
 Quin



Quin magis hinc vires virtutum agnosce tuarum;  
 Quas non is tantum, qui praesens spectat, & audit  
 Te, dulcesq; tuae numeros, cantusq; Camoenae,  
 Suspicit, & summis in Caelum laudibus effert;  
 Sed quicumq; tuas dotes fama excipit absens,  
 Te colit, ac miro tibi se deuincit amore.  
 Atq; equi dem ipse tuum cum iam laetabar ubiq;  
 Ingenium, & mores vno laudatier ore:  
 Tum verò ut licuit te coram cernere, & vnà  
 Affari: canam mentem iuuenilibus annis,  
 Verbaq; mirabar dulci perfusa lepore.  
 Inde subire animum tua saepius inclyta virtus,  
 Sicq; tuum nobis haerere in pectore nomen,  
 Ut non vlla vnquam delere obliuia possint.  
 Nunc te vnum hoc oro, quando interualla locorum  
 Visere te, & viuas voces audire vetabunt,  
 Ut me carminibus, tibi quae pulcherrima dicat  
 Cynthus, interdum dignes; si munere tanto  
 Virtutis species potis est me reddere dignum.

LAURENTII IACOMINII TEBALDVCCII  
 Ad ANTONIVM GIGANTEM.

QVIS superum tantum numen diuinitus ori  
 Afflauit? sacer hic spiritus vnde tibi?  
 O te felicem nimium, quem lumine vidit  
 Nascentem placido summus Apollo Deum;  
 Exceptum gremio quem molli aluere fouentes,

Panden-



Pandentesque iuga florea Pierides.  
 Virtutem cur ergo tuam ignotam esse vereris,  
 Abditam & in tenebris posse latere putas;  
 Si Dijs tam carus, clarum si nomen in omnes  
 Oras extendit candida Musa tuum?  
 Mira scripta arte, & diuino ornata lepore  
 Carmina, cur nobis despicienda times?  
 Cur quoque me inuitas, atque in certamina cantu  
 Non aequis dijs, nec viribus ipse vocas?  
 Aequali cursu volitantem flamine cursum  
 Non valet heu premere cymbula littus amans.  
 Obstant fata mihi, nullo Fortuna labori  
 Aspirat, fautor nullus adestque Deus.  
 Lactauit mentem, falsa & delusit Apollo  
 Spe, nunc neglectus perfuga reijcior;  
 Ni ille tuis precibus, nimio es cui carus amore,  
 Adductus, mihi nunc adsit, opemque ferat.

In obitu PAULI ROSSII Florentini,  
 Militis Hierosolymitani.

QVIS tristes Floræ lacrymas, quis deneget Arno?  
 Dum tali insignem natum probitate, bonisque  
 Artibus extinctum flentes, hinc illa nitentem  
 Dilaniata comam, questus effundit in auras;  
 Hinc rauco ille gemit fremitu; voluitque tumentes  
 Coniugis, & proprijs iam maior fletibus undas?

D

T<sup>us</sup>



*Tu mihi Melpomene lugubres praecipe cantus,  
Quos referam moestas magnae genitricis ad aures;  
Nam largos dolor ipse oculis, ac triste feretrum  
Sufficient luctus, nec non suspiria reddet  
Contactum molli pietatis imagine pectus.  
Occidit ille quidem tibi flebilis ah pia mater,  
Quandoquidem tantis, ac tot virtutibus auctum  
Annorum series vix longa reponet alumnum.  
Hunc verò quanquam maturior abstulit aetas,  
Attamen unus erat dignus, qui Nestoris annos  
Vinceret, aeternum quando mortalibus aevum  
Fata negant, omnesq; manet violentia mortis.  
Vel tibi conspectu saltem satiaffet ocellos,  
Quo sors ante diu te defraudarat iniqua.  
Verum ubi post varios casus, ac mille labores  
Exceptum gremio tecum retinere putabas,  
Illius & sermone frui, & dulcedine musae;  
Leihae ex oculis subito eripuerunt procellae,  
Quò magis tristis habet nunc te luctusq;, dolorq;.  
Non tamen hoc solam te lamentabile funus  
Angit; namq; tuos iam commiserata dolores  
Italia extremis longè deplorat ab oris.  
Praesertim quibus antè viri fuit incluta virtus  
Aut perspecta domi, aut duri in certamine Martis:  
Quiq; illum viridi redimitum tempora lauro  
Nouerunt Musis, & Phoebos sacra ferentem:  
Absentes animi calamo dant signa dolentis.*

*Ipsa*



Ipsa etiam sibi fortem equitem Melite Insula ademptum,  
 Ingemit, haud ignara stylo quid posset, & armis.  
 Siue hæc infractis animis, & robore firmo  
 Tractaret, bello assuetus terraq;, mariq;  
 Siue illum ignavi exerceret nescius oci.  
 Unde tot ingenij late monumenta per orbem  
 Diffusa, ingentesq; cientia carmina plausus,  
 Et tusco plectro, & fidibus modulata latinis.  
 Ergo per ora virum celebrem te, Paule, perennis  
 Fama feret: nam si immites fatalia Parcae  
 Fila secare tibi potuere; haud ulla valebunt  
 Saecula tuis unquam tenebras obducere chartis.  
 Tu quoq; moeroris praesens solamen habebis  
 Alma parens, quoties eius meditabere laudes,  
 Quosue tuis priscis splendoribus auxit honores.  
 Quin age, si saeuum penitus lenire dolorem  
 Non refugis, quando precibus fata aspera nullis  
 Flectuntur, clarum Rossi per nomen, & ossa,  
 Parce, precor, lacrymis, & vanas mitte querelas.  
 Nec potius nati te angat iactura perempti,  
 Quàm certa illius solentur gaudia, quae nunc  
 Iam tenet, aeternaq; licet cum pace tenere.  
 Siue per Elysij campos, & amoena vireta  
 Inter felices animas laetissimus errat.  
 Seu iam caelum adiit, sedes ubi firma Deorum,  
 Quae nunquam ventis quatitur, non imbre madescit,  
 Non canis ardorem, non brumae frigora sentit.

D 2 At



*At purus semper sine nube extenditur aer,  
Perpetuoq̄ dies illic splendore nitescit.*

De Villa Tusculana IO. BAPTISTAE CAMPEGII,  
Episcopi Maioricens. In agro Bononien.

**N**UNC humiles primùm conemur tollere versus,  
Et nostra assuescat magnas intexere laudes  
Pagina: sume animū, ac torporē expelle Tha-  
Splendida CAMPEGI dicamus rura beati. (lia,  
Rura humili quondam Saliceti nomine dicta,  
Tusculi ab auspicio sed nunc meliore vocata.  
Multas illa quidem Italiae iam nota per Urbes,  
Ipsius & domini scriptis celebrata disertis.  
Non igitur rerum ambages, aut ficta sequemur,  
Omnia quin celebri referemus consona famae.  
Sed tam multa loci illius ornamenta recurrunt  
Unā animo, ut nequeat laudum seruari er ordo.  
Temperies tamen inprimis, caelumq̄ salubre  
Laudetur: partim indicij id Phoebus apertis  
Arguit, exurgens tractu vel semper Eoo  
Conspicius, vel rarò atra caligine septus.  
Partim etiam indigenae ostendunt, qui robore firmo  
Longaevi incedunt plures, viridiq̄ senecta  
Haud cessant duro terram exercere labore.  
Nec minus illa adeat malè sano corpore si quis  
Rura, breui inualidas firmabit tempore vires,  
Aut requiem planè inueniet, morbiq̄ leuamen.

*Tum*



Tum matutinas aestiuis mensibus horas,  
Atq; adeò medium Titan cùm feruidus axem  
Inuehitur curru, lenis refrigerat aura.  
Mox vber glebae, magniq; & fertilis agri  
Cultum admirari libeat, quo haud laetior vllus  
Felsineos intra fines versatur aratro.  
Frugibus omnigenis hic magna explere quotannis  
Horrea, & optatum potis est superare coloni.  
Optima quin idem fert, & mollissima vina,  
Vt vineta putes illic florere falerna.  
Tot benè culta soli foecundi iugera paruus  
Alluit haud rapidis, lembosq; ferentibus undis  
Rhenus, ad ingentes villae per commodus vsus:  
Siue quid efferre inde libet, seu afferre necesse est,  
Seu vicina iuuat quandoq; inuisere rura,  
Plurima quae circum latè ornant aequor amoenum,  
Nobiliumq; opibus dominorum, & splendida cultu.  
Praeterea squalos largè, cancrosq; rubentes,  
Procerosq; lupos, & paruos sufficit, atqui  
Molles pisciculos, & grati nempe saporis.  
Ipsa etiam fluuiialis aqua & perlucida currit,  
Et bona (momenti quod non puto nullius esse)  
Escas ardenti properè mollire camino,  
Atq; per aestatem perfundere membra salubris.  
Huc etiam accedit, quae laude est digna voluptas,  
Quòd regio aucupijs adeò, & venatibus apta,  
Innumeras pascit volucres: ibi Phasidis undae

Nomen



Nomen avis referens, & Turtur amica pudori  
 Nidificant, ac turba avium infinita minorum.  
 Non ibi vel Perdix deest, vel peregrina Coturnix,  
 Et Merulae, Turdiq; suo stant tempore obesi.  
 Praebet item Damis latebras, passimq; vagantes  
 Prata per, & cultos cernuntur saepius agros  
 Auriti lepores: varijs ut mensibus anni  
 Contingat, grato exercentem membra labore,  
 Accipitri, laqueis, cane, visco, & retibus uti.  
 Nec tamen haec cum sint ingentia commoda ruris,  
 Naturae proprio concessa, & munere Diuum,  
 Non etiam insignes magnam ars imitata parentem  
 Addidit ornatus. hinc est pomaria, & hortos  
 Conspicere irriguos, ac multo flore nitentes,  
 Consitaq; arboribus quadra, atq; salubribus herbis,  
 Et ducta egregie in varias Topiaria formas.  
 Quorum ego si nitidam speciem comprehendere versu  
 Eualeam, nihil aut fructu iucundius illis,  
 Pulchrius aut visu sperem me offerre legenti.  
 Saepius ast eadem verba haec iterare decebit,  
 Singula nam miro fulgent concinna decore.  
 Magnam praesertim Villam (an palatia dicam  
 Regia?) suspiciens stupet, ac sublimia tecta  
 Hospes, & aspectu primo penetralia secum  
 Concipit ampla animo tacitus; verum omnia longe  
 Maiora offendens oculis, miratur & alta  
 Atria, & atriola, atq; adiuncta cubicula, & oēs  
 Percu-



Percupidus partes suprâ vestigat, & infrâ,  
 Cunctaq; magnificis in caelum laudibus effert:  
 Et meritò: neq; enim surgit formosior Vlla,  
 Nec mage culta domus (liuor procul omnis abesto)  
 Sapina quâ pingues, Rhenusq; interfluit agros.  
 Sed neq; mî calamo quamuis properante silenda  
 Pars erit inferior tecti, penitusq; reposta,  
 Ut satis vna domus speciem praeseferat amplae.  
 Multiplices vbi partitae sunt nomina cellae,  
 Quae non vina modò, & seruanda cibaria condunt,  
 Seruorumq; ministerijs, ac vsibus aptae:  
 Verùm etiam quiuis in eas diuerterit hospes,  
 Perbellè exceptum se coràm dicet, & absens.  
 Harum ad mundiciem ducta est spatiosa latentem  
 Subter humum via, quae rectà decurrit in amnem.  
 Illa pauimentis constrata, & fornice tecta  
 Perpetuo muris validis fulcitur vtrinq;  
 Totaq; vel largo Solis splendore nitescit: (ptum.  
 Mirum sanè opus, & grandi quondam are redem-  
 At superas iterum iam nos referamus in aedes,  
 Multa vbi praeterea laude attingenda supersunt.  
 Praecipuè illa ingens altis suffulta columnis  
 Porticus, aspectans boream, septemq; triones,  
 Mirificum praebet rapido tûtamen ab aestu.  
 Hoc itidem interior celsa testudine, & amplis  
 Parietibus, latisq; domus constructa fenestris  
 Praestat, & egelidos sic accipit, atq; remittit

Vento-



*Ventorum flatus, ut protenus arceat omnem,  
Vel sinat haud aegrè rabiem tolerare leonis.  
Sunt etiam medijs conclauias in aedibus omni  
Usque adeò strepitu, ac penitus semota susurro,  
Ut minimè insomnes liceat traducere noctes.  
Nec putei desunt ingentes, atq; perennes  
Dulcis aquae, & nitida murorum mole decori.  
Tum verò latos liber prospectus in agros  
Miris quippe modis oculos & corda tuentum  
Exhilarat, gelidas seu flectant lumina ad Arctos,  
Siue se ad occasum vertant, seu Solis ad ortum.  
Ac frons illa domus, Austri quae vergit in oram,  
Continuos colles, & celsas prospicit arces  
Vrbis Felsinae: via quò mollißima quarto  
E lapide inuectum cisis deducit, equouae.  
Quid calles memorem, & quos protegit umbra recessus,  
Compitaq; apricos circum spectantia campos?  
Aut quos concentus dulces aurora volocrum  
Excitat exoriens, penè ipso in limine tecti?  
Quis verò dignè viuaria dixerit unquam,  
Quae magna in magno lymphis currentibus horto  
Inclusos seruant pisces, accedere ad escam,  
Atq; manum assuetos non exhorreere vocantis?  
Illa autem magis hoc etiam miranda videntur  
Nomine, vicini quòd aquas è fluminis alueo  
Accipiunt iuges, longo reddente canali:  
Villae ingens decus, atq; animo praedulce leuamen.*

Stra-



Stragula vestis item foret, ac pretiosa supellex  
Dicenda, & quantus rebus nitor omnibus insit:  
Quà benè compositos exornant serica lectos,  
Et conopea egregio contexta labore.  
Quàq; aulae tegunt muros pendentia ad unguem,  
Argentoq; auroq; & vario distincta colore,  
Qualia cernuntur Regum intra tecta potentum:  
Et quà perlepidis puluillis, atq; tapetis  
Strata pavimenta, & sellae, tripodesq; renident.  
Atqui ego non is sum, innumeras qui carmine dotes  
Enumerare velim, queis villa, & fundus abundant:  
Nec si ausim, pulcher votis aspiret Apollo.  
Hoc sit scire satis, longè pulcherrima adesse  
Omnia, magnanimoq; viro, & praediuite digna.  
Non Parij lapides, fateor, non aenea signa,  
Plurima quae Tybris forsàn miratur, & Arnus,  
Consurgunt illic, aulasq; & limina servant.  
Nec tamen ignoro, minimum quàm conferat vsum  
Signorum ornatus, quò caetera prorsus abundè  
Contulerit natura potens, atq; artis acumen:  
Sed vice mutorum lapidum, rigidiq; metalli,  
Si quis eò accedat, quo tempore rura frequentat  
Diues herus: virtute viros, omniq; lepore  
Praestantes, illic inter se docta serentes  
Colloquia inueniet. tales nam semper amicos  
Munifici bonitas CAMPEGI abducit ab vrbe,  
Et nitida excipiunt lautis triclinia mensis.

E

Sunc



Franc. Bolo-  
gnetus Se-  
nat. Alber-  
ti Card. pa-  
ter.  
Carolus Si-  
gonius.

*Tunc Academiam potius, gratumq; Camoenis  
Dixerit hospitium, quam villam ruris amoeni,  
Praesertim si aderit tum BOLOGNETVS, & vna  
SIGONIVS, domino ante alios dilectus vterq;  
Ille Senatores inter clarissimus, idem  
Eximio Phoebi vates insignis honore.  
Hic florente stylo late monumenta per orbem  
Diffundit, magni Ciceronis proxima scriptis.  
Ipsum praecipue dominum mirabitur instar  
Numinis, ac illo inspecto mage laetus abibit,  
Quam si cuncta simul sit contemplatus ibidem  
Marmora Praxitelis, famosiq; aera Myronis.  
Si vero audire illius doctissima verba  
Contigerit; seculi haud dubie vestigia prisca,  
Atq; sales medijs dignos agnoscat Athenis.  
Quamquam alijs etiam illustrem virtutibus omnes  
Suspiciuntq; virum, ac efferre ad sidera certant,  
Laude extollentes largae pia munera dextrae.  
Sed quò me diuersa rapis? iam desine versu  
Garrere illepedo. satis est vtcunq; Thalia  
Haec calamo cursim insueto potuisse referre.  
Forsan & hinc aliquis vel captus Tusculi amore,  
Vel certe in nostris illud sordescere chartis  
Indignans, eius laudes sibi scribere sumet,  
Et noua maiori sociabit carmina plectro.  
Atq; ita CAMPEGI villam, nomenq; IOANNIS  
BAPTISTAE, vt par est, longū aeternabit in aeuū.  
MAXIMAS*



## ANTONII RENERII Ad ANTONIVM GIGANTEM.

**M**AXIMAS ago gratias merenti,  
 Pares, quàm pote plurimum, paratus,  
 Si quando dederit Deus, referre  
 Antoni, tibi, qui lepore abundans  
 Pro multis mihi millibus fuisti.  
 Dum bonum bonus adiuuas, & omni  
 In re vis minima mea tueri  
 Me tuis opibus; mihi que praesto  
 Sponte adesse opera vel occupata,  
 Si dulcem potes adiuuare amicum.  
 Quem non incolumem videre tantum,  
 Sed saluis quoque postulas honestum  
 Rebus, intereaque dignitati  
 Idem prospicis, & simul saluti.  
 Pro quo munere, dum mihi retentam  
 Hanc vitam superi volent, tui me  
 Promitto memorem vsque sic futurum,  
 Ut cum nemine conferendus ipse es  
 Aut candore animi, aut benignitate.

## Ad ANTONIVM RENERIVM Collensem.

**Q**UOD rudis ingenij tenuem tam gratus opellam  
 Prosequeris coràm verbis, & versibus absens:  
 Id mihi iucundum (ingenue tibi namq; fatebor)  
 Accidit, Antoni: sed eo non nomine, quò me,

E 2

Aut



Aut mea permagni faciam, vel laudibus esse  
 Sperem digna tuis. Verùm hoc optatius omni  
 Spe mihi contingit, quòd quàm se prima facultas  
 Obtulit, obsequium nostrum, & propensa voluntas,  
 Re licet in minima, tibi vix inspecta probetur.  
 Sic equidem iam tum rebar, cùm fama tuarum  
 Virtutum, morumq; meas peruenit ad aures,  
 Ingenti dum te Pratum reuocaret amore:  
 Te fore, qui nostram longo torpore sepultam  
 Colloquio excires, & dulci carmine Musam.  
 Nunc igitur duce te interdum Parnasia tempe,  
 Castaliq; sacros audebo visere fontes,  
 Si lento comitem gressu opperiere sequentem.  
 Sin minus Aonios liceat me scandere montes,  
 Pieridumue choros accedere: te sacra Phoebi  
 Mystica sit saltem mihi fas audire docentem.

Ad ANTONIVM MARIAM BARDIVM  
 Fabij filium.

O PATRE egregio, fili dignissime, cuius  
 Virtutem primis imitari asuescis ab annis:  
 Quàm nunc excipio latanti pectore laudes  
 Praecocis ingenij, tibi quod natura benignè  
 Contulit, ingenuas & quod sic ipse per artes  
 Excolis, aetatem suprâ, & felicibus ausis.  
 Nae tu mature praestanti digna labore  
 Praemia percipies: primo cùm flore iuventutis

Aonij



Aonij emensum te celsa cacumina montis  
 Intèr Musarum coetus formosus Apollo  
 Sistet, & optata praecingat tempora lauro.  
 Tum verò insuetum miratus frontis honorem,  
 Et vigilem testam, & sudores saepius actos  
 Laudabis, stimulosq; memor, curamq; parentis.  
 Tum bona Reneri mentem praecepta subibunt,  
 Quo duce tanta puer iam nunc & pulchra minaris.  
 Quare ego te, quamuis nil iam monitoris egere  
 Inspiciam, dulci contactum laudis amore,  
 Carmine compellans, hoc unum hortabor amanter.  
 Gnauus in inceptos, Bardì, conmittere cursus,  
 Et virtute nihil praestantius esse memento.

## AD PETRVM SPIGVM.

S AEPIVS haec eadem viua tibi voce parantem  
 Dicere, Spige, pudor non me deterruit ullus;  
 (Nā quid me pudeat cū vera, tū honesta monētē?)  
 Sed differre tamen libuit, ne dedita nugis  
 Mens tua iam pridem nostros minus aure secunda  
 Audiret monitus, & ego impendisse laborem  
 Tristarer frustra, secus ac succedere vellem.  
 Verū ubi te segnis (quā nolle) continet aegrum  
 Nunc quariana domi; fandi mage mollia nactum  
 Tempora mereor, omnia cū te ludicra cernam  
 Exosum, et penitus curam hanc incumbere in vnam,  
 Ut longam expellas languenti corpore febrim.

Iusta



Iusta quidem res est, ut cures corpus, at ipsum  
Unà animum curare decet, verum artibus illud  
Subijcies medicis, nostra hic praecepta sequatur:  
Audi igitur. Quintus iam circum voluitur annus,  
Ex quo grammaticae vtilibus nauare libellis  
Te noui. interea doctor non defuit vnquam.  
Ipsa etiam natura tibi ( quae maxima dos est )  
Ingenium dedit & facile, & memor. adde quod ipse  
Antistes, caelo verè demissus ab alto,  
Beccatellus adest, quem religionis amore  
Ardentem haud puduit munus subijse magistri.  
Hic pro te, socijsq; tuis quid fecerit, & quam  
Gesserit assiduus curam, scis ipse, scit omne  
Vulgus, vicina & nouerunt oppida circum.  
At quoniam tecum sermo est, & te alloquor vnum,  
Tu mihi dic, toto quidnam profeceris isto  
Tempore, quicquid exstet fructus. num docta Maronis  
Carmina, num Flacci retines? at reddere plura  
Te memini dudum. num qua haeret epistola Tulli  
Nunc animo? num metri leges? num qua Terenti  
Fabula? nam cuncta haec rectè memor antè tenebas.  
Quid retices? nescire putas ea turpe fateri?  
Ingenue prorsus sentis: sed turpius esse  
Multò crede diu si amissa reposcere differs.  
Hic tibi perfacilis labor est, & mensibus omnem  
Iacturam paucis penitus sarcire licebit,  
Saepius, atq; etiam attentè intermissa legendo.

Et sanè



Et sanè hoc aliquid fuerit, sed non tamen omne,  
 Vtterius quoniam te extendere coepta decebit.  
 Namq; velim, totis vt iam nunc viribus altae  
 Fundamenta domus iacias, quam deinde videbis  
 Surgere paulatim exiguo cogente labore,  
 Ac per se tandem contingere culmine caelum.  
 An praestare potis non est hoc aurea virtus,  
 Scilicet vt feriat mortalis sidera vertex,  
 Quem Phoebi chorus aeterno donarit honore?  
 Nunc igitur totum studijs te dede, bonisq;  
 Moribus, & certam rationem delige vitae,  
 Quam mox iucundam reddet tibi leniter vsus.  
 Plurima dediscant oculi, & melioribus aures  
 Assuescant verbis, sociosq; require fideles,  
 Et tactos pariter studiij, ac pietatis amore.  
 Nunc ver aetatis tibi ridet, se sine multos  
 Induat in flores animus, quo frugibus aestas  
 Te ditet magnis, & dulcia poma reponat  
 Autumnus, longos vt viuas lautus in annos.  
 Illecebris (fateor) multis malè suada voluptas  
 Obstat, & irretit durè, cursumq; retardat.  
 Tu verò hanc contrà contende audacibus ausis,  
 Et tibi in auxilium caelestia numina posce;  
 Namq; aberunt nusquam, quoties ea ritè vocabis.  
 Ac ne iter ignarus peragas, dubiusq; vageris,  
 Renerum sectare ducem, sectare magistrum.  
 Renerum, mihi quem probitas, doctrina, leporq;  
 Dulcis



Dulcis amicitiae vinclo iunxere perenni;  
 Et quo non alibi, credo, mage idoneus alter  
 Gymnasium Hetruscis aperit praeceptor in oris.  
 Hunc sequere assiduus, lateriq; Volentis adhaere.  
 Nec bene currentem illa levis te cura moretur,  
 Quod forte aequaeui sic te diuersa sequentes  
 Illudent olim; quis hic? & quid tanta repente  
 Vult grauitas sibi? quid pariet nouus impetus iste  
 Discendi? en sophus, en senij qui praeuenit annos.  
 Talia nugaci quidam iactare susurro  
 Audebunt, illos ast insanire libenter  
 Ipse sinas, & certus iter Dijs perge secundis.  
 Non eadem obijcient, virtus quibus inclyta cordi est,  
 Quorum laudato cum quis laudatur ab ore,  
 Compita nequicquam nebulo latratibus implet.  
 Gestiet hinc magna genitrix Smeralda, paterq;  
 Lapsus laetitia. hinc fratres, & aui, atq; propinqui  
 Omnes, hincq; boni tibi gratabuntur amici.  
 Certior ipse etiam factus quandoque Ioannes  
 Franciscus patruus, mire laetabitur absens.  
 Quem tibi prae multis par est imitauerit vnum.  
 Namque ille indicij (ne longè exempla petamus)  
 Quas virtus habeat vires, ostendit apertis,  
 Quandoquidem eius ope eximium nomenq;, decusq;  
 Vel sibi, vel patriae externis venatur in oris.  
 Illius & placidi hortatus, mandataq; mentem  
 Vsque tibi subeant, nostris non absona dictis.

Haec



*Haec habui, quae te cursim, mi Petre, monerem,  
Atqui ea nunc animo satis est meditare quieto,  
Corpore sed gnauus mox ingrediare valenti.  
Ergò age si à monitis tua stat sententia nostris,  
Cum iam tempus erit, maturis argue factis.*

Ad HENRICVM OMBELAE TVM  
Lingonensem Gallum.

**O** GALLI suaues cantus, & amabile carmen,  
Quod tam dulce meis vltro sese auribus offert,  
Ut segnem è longo excierit torpore Thaliam.  
Hinc decet eximias virtutis cernere vires;  
Quandoquidem ipse tuae captus dulcedine musae,  
Aduenam, et absentem, vixdum mihi nomine notum,  
Henrice, ingenti iam te complector amore.  
Quin etiam magis ipse libens hoc nomine posthac  
Felsineos colles, & prata Albina reuisam,  
Ut coràm viuis te vocibus alloquar, & te  
Excipiam, genus, & patriam, ac tua fata docentem.  
Me quoque tum genti Becatellae pluribus esse  
Noueris obstrictum meritis: namq; omnia gratus  
Huic refero accepta, & semper debere fatebor.  
Interea pueros, quorum tibi credita cura est,  
Excole, ut adueniens patruus te multa magistro  
Gaudeat edoctos circumspexisse nepotes.  
At me crede tui cupidum, & virtutis amantem.

F

SCIRE



## ANTONII RENERII Ad ANTONIVM GIGANTEM.

**S**CIRE aueo, Antoni mi oculis propè carior ipsis,  
 Quid tibi post aliquas hyemes sit Felsina visa,  
 Quouetuum plausu reditum gratentur amici,  
 Vique ijdem soleant te circumstare frequentes.  
 Ut Beccatelli iuuenes, pulcherrima proles,  
 Pendentes adeant ad te recitantis ab ore,  
 Quot tibi musaeo dictent condita lepore  
 Carmina Pierides faciles, & dexter Apollo,  
 Dum tu abes interea, longè disiunctus ab illis.  
 Viseris an ne etiam Campegi rura beata,  
 Quae versu exornas incana in saecula digno  
 Viuere, perpetuò docta ut manus atterat illum,  
 Te manifesta fides hominem excepsisse libentem,  
 Et legisse auidum, tibi quae conscripta politè  
 Ornasti lepidis, & non sine pondere verbis.  
 Tullius ut valeat, cupio quoque noscere, ut alto  
 Deferat ex Helicone virenti fronde coronam,  
 Imponatq; sibi ille, animae pars altera nostrae,  
 Vtrum Maeonio, an Siculo tibi digna Poeta,  
 Aeoliue magis recitarit carmina, ut ipse  
 Reddideris contra suauis contexta labore,  
 Rarò audita, neque exactis distantia quicquam.  
 Nanque ego utrūque mei cupidū volo, et arbitror esse,  
 Et memorem, dum non humili sermone trahetis  
 Saepe moras, modò Graiorum, modò scripta Latina  
Tractantes



Tractantes variè, & miscentes seria ludo,  
His adde, an saluere meo quoque nomine iussum  
Torfeninum hominem visas doctumq̃, bonumq̃.  
Quamque diu tenuere tui te rura patroni,  
Cui tecum optarim potius me viuere charum,  
Quàm ditis Priami florentia regna tenentem  
Clara beatorum virtus numero eximat omni.  
Haec ego, docte Gigas, cupio mihi cuncta referri  
Carmine, dum tu aberis, coramq̃, ut veneris, ore.  
Si me fortè petis de rebus scribere nostris,  
Narro tibi. Mea post confecta negotia, solus  
Ipse domum repeto, atque illic puerilia tracto  
Quintilio praesente meo, qui discere nuper  
Prima elementa auidus, coepit signare figuras,  
Monstrarique sibi rationem ex ordine poscit.  
Nanque, absente mei te iudice carminis, Inquam  
Vix aptare modos fidibus datur, auspice Phoebus.  
Et Bonamicus abest, & rure domestica tractans,  
Octauo vix quoque die solet ille reuerti.  
Atque Ingiratum populis dare iura profectum  
Scis peregrè; ipse tui memor est tamen, atque patroni,  
A quo crebrò venit Epistola, vtrumque saluans,  
Per fora, perque vias, comitem me, et cōpita circum  
Accipiunt Fabiusq̃, & Perondinus amici.  
Colloquijs Vari, quauis ratione probati,  
Ne fruar, impediunt anni, & mea decolor aetas.  
In sano Andreas doctis sermonibus aures



Imbuit, atque domi, cumque illo Persius ore  
 Nos placido mulcet, rapido cum solvitur aestu.  
 Me tibi mane domi dictante haec, ipsa paratur,  
 Hospitem ut excipiat, quem cras de more videbo  
 Adfore, ut expositas merces sibi comparet, atque  
 Miretur numerum populorum, & strata viarum,  
 Et quaecumque animos pertentant gaudia vulgi.

## Ad ANTONIVM RENERIVM.

**A**LBINI laeto iamdudum in colle morantem  
 Me iuvat, ANTONI, lenta indulgere quieti,  
 Et paulum dulces intermisisse libellos,  
 Nec non ipsi etiam inuitae dixisse Thaliae,  
 Musa vale, aut mecum tibi si quoque rure libebis  
 Degere, me interea calamo sine parcere inertii.  
 Otia ut haec animo multum exoptata, diuque  
 Degustem, minimo non interrupta labore.  
 Sic ego; at illa mihi non surdas praebuit aures:  
 Quamquam o segnitia ne me torpescere tanta  
 Indignata, meos frustretur deinde vocatus.  
 Nunc certe cum longa tibi responsa pararem  
 Reddere, vix pauca haec dignata est promere verba.  
 Quare ea, quae dulci, ac lepido me carmine poscis,  
 Ut tibi significem, RENERI, versibus absens,  
 Ne quaeso in nostrum reditum differre graueris.  
 Omnia nam melius poteris tunc noscere coram,  
 Atque ita te male culta minus mea pagina laedet.

Nunc



Nunc tantum id scito, bene nobis esse: patronus  
 Et valet, & vestri memor est: me nulla quietum  
 Cura hic sollicitat, nisi quae mihi surgit in horas,  
 Ut te quamprimum visam, carosque sodales.  
 Ipse etiam ut valeas, connitere: QVINCTILIVMQ.  
 Cuius ego ex scriptum laudo, cuiusque venusti  
 Gratulor ingenij specimen tibi, nomine nostro  
 Dulci suaviolo, & multa impertire salute.

Ad ATTILIVM RENERIVM  
 Antonij F.

**C**VR te fraterno, Attili, amplexarer amore (illo  
 Causa erat una quidem dudum permagna, quod  
 Eesses patre satus, quo non mihi carior usquam  
 Ante fuit, nec erit post forsan amicitior alter:  
 Quemque ego, quod me annis longe et virtutibus anteit,  
 Diligo, & ex animo quasi dulcem observo parentem.  
 Nunc vero simulac culta & lepidissima legi  
 Carmina, mirifice queis me tot laudibus effers,  
 Quot prorsus deceat magnum exornare poetam:  
 Ob meritum te nempe tuum, ingenijque leporem  
 Cogor amare, tibi & totum deferre libenter,  
 Quicquid opis nostrae est tenui in virtute Camoenae.  
 Ac quoniam coeptis tam dextro numine Phoebum  
 Cernis adesse tuis, nec docti sedula patris  
 Cura, nec ingenium tibi deest, nec carminis usus;  
 Perge libens, te iure illum vi laeteris adeptum,

Quo,



## 38 ANTONII GIGANTIS

Quo, licet indignum, nunc me dignaris honore.  
 Et dum plura tibi fert commoda tempus, & aetas,  
 Te iuuet in studijs omnes intendere nervos,  
 Ocyus ut sacra Parnassi in sede quiescas,  
 Laureaq; exactos compenset laeta labores.

Ad IOANNEM RONDINELLVM  
 Alexandri F.

**T**E nostras dudum reor expectare tabellas,  
 Vel me ipsum potius, praesertim octobre monente  
 Ut te promissi memor, ac Pratense reuissam  
 Perpetuò mihi dulce solum, carosq; sodales.  
 Verùm ubi me patria redeuntem docta recepit  
 Felsina, tot simul importuna negocia curis  
 Implicuere animum, quòd spe iam prorsus ab omni,  
 Composito Hetruscos adeundi tempore colles,  
 Destituor. dices, quid si vnus finiat illa,  
 Aut alter mensis? cessabit caussa morandi?  
 Non ego crediderim, me, RONDINELLE, futurum  
 Dijs adeò inuisum, ut quod peius morte laboro  
 Euitare malum, curarum nempe procellas,  
 Confectum me eodem patiantur longius iri.  
 Sed neq; tunc valeam promissis stare. nivali  
 Aggere tristis hyems iam circumsepiet alpes:  
 Te quoq; Praetura defunctum regia magni  
 Principis excipiet, ciuilia munia obibis,  
 Docto Academiae procerum sermone frueris;

Aut,



Aut, quae mox illi mirentur, acumine summi  
Ingenij meditaberis. atq; ita forsitan illa,  
Qua tua me bonitas modò consuetudine dulci  
Dignabat Prati, Florentia non sinat uti:  
Te seruante quidem mentem in nos usq; benignam,  
Ast aliter rerum Urbana ratione ferente.

Non tamen idcirco tempestas mollior anni  
Carpere iter cum me suadebit, & ocia poscent,  
Non te conueniam, & laetus tua tecta subibo.  
Quin haec praecipua est cordi, mihi crede, cupido;  
Nec quicquam meminisse iuuat iucundius horis,  
Queis peragrans hortos, & aprica suburbia tecum  
Suauibus alloquijs luctus solabar amarus,  
Et desiderium absumpti tum morte patroni.  
Quid verò ante focum cum nos quandoq; sedentes  
Seria multa iocis permiscebamus honestis?  
Quid cum prisca legens, tua vel certantia priscis,  
Scripta Hetruscorum resonabas ore rotundo?  
Grata quidem hic animo, fateor, solatia praebent  
Vrbis gymnasium, clarorum & amica virorum  
Colloquia, haud desunt hilares, lepidiq; sodales;  
Attamen ille libens ad te persaepe recurrit,  
Te spectat, te audit, tibi, cum si cernere possis,  
It comes assidue; sic captus amore tuarum  
Virtutum nequit abs te iam diueller vnquam.  
Ille etiam nunc, quando graui me compede vinctum  
Vltra Appennini iuga recto tramite secum

Haud



*Haud valuit traxisse, silentia rumpere longa;  
 Et paucos ad te versus hos mittere iussit.  
 Quos desueta diu calamus tractare Thalia,  
 Nomini amica tuo, mihi non inuita roganti  
 Dictabat, dum me rus inuitaret amoenum  
 Curis, & rebus cessare parumper agendis.*

## AD CAROLVM SIGONIVM

**M**VNERIS historiae finem laetumq̃, bonumq̃  
 Gratulor hoc primū tibi nomine, docte Sigoni,  
 Quod mētem assiduo explicitā, lōgoq̃ labore,  
 Post modō amicorum congressibus, atq; lepore  
 Sermonum, & grato conspectu rurs aprici  
 Liberius solito interdum recreare licebit.  
 Quin & corporeae haud firmo sat robore vires  
 Id poscunt, primaeq̃ aetas vicina senectae,  
 Scilicet ut vehemens studium, vigilesq̃ lucernas  
 Seponas paulūm, saluusq̃ & laetus amicis,  
 Et tibi iam viuas: nostrum quo longius aeuum  
 Sic florente stylo exornes, ac voce superstes,  
 Ut tua perpetuō mortales scripta iuuabunt.  
 Deinde tibi ex animo laetor, quod gloria tanta  
 Hinc te consequitur, quantam non audeat ullus  
 Concepisse quidem votis hoc tempore scriptor.  
 Namq; ea quo possent maiore volumina plausu  
 Certatim Italicis, externisq̃ excipi in oris,  
 Floret ubi cultus linguae, studiumq̃ latinae?

*Quas*



Quas omnes veluti immensum resonare theatrum  
 Audimus Caroli laudes, nomenq; Sigoni.  
 Nobilium verò Procerum potes ipse, Virumq;  
 Clarorum planè innumeras proferre tabellas,  
 Testantes quanti fias, & qualis ubique  
 Virtutis sit fama tuae, atq; ut numinis instar  
 Deniq; te quisquis praesens veneretur, & absens.  
 Docta quidem monumenta tui iam multa per orbem  
 Manarunt, summaq; tua cum laude leguntur:  
 Ast opus hoc insigne recens quo maius ab omni  
 Parte animi praefert studium, ingenijq; laborem,  
 Hoc magis ingentem decoris super addit aceruum.  
 Quin etiam vlla tibi penitus ne praemia desint  
 Digna tuis meritis; ecce illustrissimus ille  
 Indole diuina, & clara virtute IACOBVS  
 Te sponte officijs, & grandi munerat auro,  
 Magnorum exaequans animos, & munera regum:  
 Hoc uno dignus factò, quem florida passim  
 Ingenia, & linguae, calamiq;, & plectra celebrent.  
 Quamquam mille modis alijs, atq; artibus altam  
 Materiam praebet laudum, seu strenuus armis  
 Tutatur fines Romanos, ac vigil arces  
 Inuisit, summo seu magna negocia tractat  
 Consilio, seu dat populis responsa benignè:  
 Siue ille impatiens frustra disperdere tempus,  
 Ingenuo exercet nunc fortia membra labore,  
 Nunc animum studio recreat, doctisq; libellis.

G

Quare

IACOBVS  
 Boncom-  
 pagnius  
 Sorz Dux



Quare etiam hinc laetor, iuuenis quòd gratia tantū  
 Te foueat, nec non donis, & honoribus ornet.  
 Tu verò virtute tua, eximioq; fauore  
 Praesentis seculi, ac venturi laude perenni  
 Gaude vel meritò, vir praestantissime, cuius  
 Nunc opera effecit, multos ut quae ante per annos  
 Italia in densis languebat mersa tenebris,  
 Viuida iam superas se tollere possit ad auras,  
 Ac mereat tandem verè illustrata vocari.

Ad HIERONYMUM BONCOMPAGNIUM  
 GREGORII XIII Fratris filium.

**N**ON mea te idcirco audet compellare Thalia,  
 Versibus ut speret, iuuenis clarissime, laudes  
 Posse augere tuas, seu quà patrui inclyta ma-  
 Gloria te insigni decorat splendore nepotem, (gnā  
 Seu quà animi proprijs virtutibus ipse refulges:  
 Nec tibi ut agresti cantu permulceat aures,  
 Nobilium assuetas audire poemata datum.  
 Sed mentis meriti memoris, grataeque datura  
 Indiciū, haec humilis sublimia tecta subiuit,  
 Ingentes imo persoluens pectore grates.  
 Miraris (credo) & quis sim fortasse requiris,  
 Et quo nam tibi deuinctum me nomine dicam.  
 Atqui tot laudum non haec postrema tuarum est,  
 Inuisse ignotos etiam: tam multa benignè  
 Officia impertire soles oratus, & ultro.

Ille



Ille ego sum, affinem cuius Beroia prudens  
Foemina iam dudum tibi commendabat, ad Urbem,  
Atq; tui ad sacrum conspectum fratris euntem.  
Quem tu propitijs voluisti ornare tabellis.  
Nunc ergo ille absens mecum pro munere tali,  
Quicquid opis nostrae est, totum tibi deuouet uni,  
Ac uni addictus tibi uiuet ubiq; locorum.  
Ipse autem, cupidus quamuis ignobilis oci,  
Desuetusq; diu studia exercere clientis:  
Attamen (ò utinam merear) iam sponte Patronum  
Te mihi delegi, illustris Hieronyme, & omne  
Iam nunc obsequium tibi defero promptus, & ipsam,  
Qualis erit, Musam, ni dedignaberis uti.

Ad IOANNEM RONDINELLVM Alexandri filium.  
In Librum Antonij Panormitæ de dictis,  
& factis Alphonfi Regis Aragonum.

**P**RINCIPIS exemplar, qualem caelestia raro  
Numina concedunt terris, hoc arte libello  
Depictum egregia, mi Rondinelle, videbis.  
Ac quanquam per te potis es (quae plurima rerum  
Est tibi cognitio, ingenijq; feracis acumen)  
Singula nedum oculis peruestigare, sed alta  
Mente operis summam, atq; omnes expendere partes:  
Pauca tamen, quae nos animo tibi prorsus amico,  
Carminibus licet incomptis, praeludimus, audi.  
Magnanimi Alphonfi illius, qui primus Ibræ

Iosephus  
Ludoui-  
cius Afri-  
cas Iuris-  
conf.  
Gineura  
Augustini  
Beroi lu-  
risconf.  
clariss.  
vxor.  
Philippus  
Card. S.  
Sixti.



Florida Parthenopes ditioni regna subegit,  
Hic tibi cernere erit tum bello fortia facta,  
Tum praeclara domi studia, atq; illustria dicta:  
Usque adeò ut tantis, ac tot virtutibus aucto  
Non ausis illi quenquam praeferre virorum,  
Graecia quos summis euexit laudibus olim,  
Aut quos Roma potens diuino ornauit honore.  
Quin etiam in multis alijs quodcunq; probari  
Comperies dignum, vel prisca volumina voluens,  
Vel noua, in Alphonso id totum miraberis uno.  
Atqui difficile est dignoscere, qua magis in re  
Excellat, sic parte idem est perfectus ab omni.  
Consilijs magnum, atq; animo, dextraq; valenti  
Cum cernes illum summe tractare ferocis  
Durum Martis opus, totumq; incumbere in arma;  
Tum quoq; Musarum alloquijs praebere benignas  
Aures, & Sophiam inspicies admittere castris.  
Ut non tam regem ducibus, validisq; manipulis  
Instructum agnoscas, quam praefulgente corona  
Clarorum doctrina hominum, queis pluribus illa  
Floruit in summum tanti aetas regis honorem.  
Quorum non ulli ingenio, aut candore Camoenas  
Cessit, ni potius cunctos Antonius anteit,  
Alphonso certe ante omnes gratissimus ipsi.  
Ille hunc florentemq; stylo, rerumq; lepore  
Insignem scripsit librum, aut si dicere malim,  
Et studia, & mores, & mentem principe dignam,  
Qui



Qui virtute alijs aequè, ac diademate praeflet,  
 Ad veram historiam his chartis expressit ad unguem.  
 Quod si scire libet (me nanq; referre iuuabit)  
 Vnde Panormitae cognomen contigit illi,  
 Accipe. bis centum & triginta circiter annis  
 Felsinea tum dissidijs civilibus urbe  
 Cedentes quidam Becatella è gente, Panormum  
 Post varios casus tandem applicuere, breuiq;  
 Aucti diuitijs, & multa prole nepotum,  
 Illic mansurasq; domos, sedesq; locarunt.  
 Atqui prisca quidem tenuere insignia gentis,  
 Sed patrium dedit ijs illustre Bononia nomen.  
 Progenie ex illa hic quondam est Antonius ortus,  
 Cui, simulac Italis florere incoepit in oris,  
 Indidit ad proprium famae decus ipsa Panormus  
 Cognomen, quo deinde aeuo clareret in omni.  
 Propositam fortasse tibi excessisse videbor  
 Materiam; sed me pietas, qua prosequar vsq;  
 De bene me meriti manes, atq; ossa patroni,  
 Haec utcunq; tibi nunc commemorare coegit,  
 Ut saltem illius gentilem his laudibus ornem.  
 Verùm ex Alphonsi innumeris virtutibus vnam,  
 Quam magis illustrem esse rear, iam dicere paucis  
 Aggrediar, cunctas quoniam comprehendere versu  
 Non cuius facile est: me verò hinc plurima terret  
 Congeries rerum, hinc sibi conscia Musa retardat.  
 Si virtus igitur longè optima dicitur illa,

Cuius



Cuius finis erit praestantior, an ne erit vlla  
Dignior in superos pietate, ac mente benigna  
In genus humanum, & populos ditione subactos?  
Caelitibus certè nihil, aut mortalibus ipsis  
Gratius hac fuerit, nec quenquam gloria maior  
Consequitur, nec tuta magis via ducit ad astra,  
Quàm qui promptè omnes possitq;, velitq; iuuare.  
Hanc autem ille adeò egregiè, sanctèq; colebat,  
Eius ut ad normam curas, atq; omnia facta,  
Verbaq; dirigeret, quin prae nil duceret illa  
Regna, & opes. hinc ille animus tam mitis in hostes,  
In sibi subiectos clemens, inopemq; popellum,  
Fortis in aduersis rebus, constansq; secundis.  
Quid memorem sacras vi captis vrbibus aedes,  
Securum victis ac inuiolabile Asylum,  
Seruatas? vel quid tutantia iussa pudorem  
Foemineum, victor miles cùm scanderet arces?  
Munera quid referam templis oblata, virisq;  
Virginibusq; Deo sacris? ò saecula verè  
Aurea, quae talem meruerunt cernere regem.  
Nimirum illa fidem hinc veterum sententia certam  
Acquirat fore, quae censet tunc regna beata,  
Eximiae cultor Sophiae cùm sceptrum teneret.  
Adde etiam, verè si religionis amore  
Perpetuo flagrans diuina volumina verset,  
Scruteturq; Dei legem, & praecepta facessat.  
Qualem Regem illum haec testantur scripta fuisse,  
Innu-



Innumerisq; alijs monumentis fulta per omnes  
 Magni orbis partes iam pridem fama celebrat:  
 Et dubitet magni Alphonsi vestigia quisquam  
 Tam praeclara sequi, si vera est gloria cordi,  
 Virtusq;, & pietas? Sed te iam demoror Ultra,  
 Quàm satis est, ipsos avidè percurrere libros,  
 Et viuo lymphas haurire è fonte nitentes,  
 Iandudum cupientem. En accipe, perlege, ut ipsum  
 Auctoris nomen saltem quandoq; legendo  
 Nostri etiam faciat memorem te nominis esse.

Ad GABRIELEM PALAEOTVM Card. Amplifs.  
 et Bonon. Archiepiscopum.

**F**LAMINIAE dū nuper agros, Pater optime, & vrbes  
 Me transire iubet Patriae, caraeq; parentis  
 Dulcis amor; licet interdum via longa, laborq;  
 Taedia suaderent animo, curasq; molestas,  
 Cum comes haud ullus, nedum facundus adesset:  
 Ipse tamen contrā nitens mihi laeta subinde  
 Plurima fingebam tacitus. nunc matris imago,  
 Et tremulae occurfus subit, atq; in colla ruentis,  
 Multaq; scitari, nec non audire parantis.  
 Nunc tot sacrorum mysteria magna dierum  
 Mente pia, & celebris meditor solennia Paschae:  
 Quantum me rudis ingenij imbecillibus alis  
 Tollere humo, & sacra rimari caelestia possum.  
 Ipsa etiam tellus herbis ornata nouellis,

Et



Et florum vario passim distincta colore,  
 Iucundo mihi prospectu exhilarabat ocellos.  
 Illis praesertim Phoebos sine nube diebus  
 Fulgente, atq; aura lenis spirante Fauoni.  
 Nec nulla hinc animus libauit pabula, laetam  
 Admirans terrae faciem, caeliq; nitorem:  
 Omnia quae pridem glacie foedarat, & imbris  
 Tristis hyems: simul & Regem venerabar olympi,  
 Qui rerum vice perpetua sic temperat orbem.

Ludouicus  
 Galiardus  
 Societatis  
 Iasv.

Saepe audita recens GALIARDI patris ab ore  
 (Quàm vellem inde modò, ac semper pendere liceret)  
 Commemorare iuuat: verbis quàm multa disertis  
 Arcana explicuit: quàm fortiter impia facta,  
 Impurosq; hominum mores damnauit, & acri  
 Sermone increpuit: quàm molli, quàmq; benigna  
 Suadela vitam exosos ignauiter actam  
 Fouit, & infernis è faucibus eruit orci.  
 Tu quoq; tunc animo nobis, Amplissime Praesul,  
 Saepius occurrens, caelestis numinis instar,  
 Lenibas iter, atq; vagae fastidia mentis;  
 Cernere dum videor te sacris manè peractis  
 In templo assiduum GALIARDO aflare docenti,  
 Moxq; pium in populum sacratâ extendere dextram,  
 Verum haec laetanti mecum dum corde voluto,  
 Exorta est subitò, meq; acris cura momordit;  
 Quòd te discedens inuisere nuper omisi,  
 Aut non nulla humilis saltem dare signa clientis:

Quòdq;



Quodq̃ aliàs etiam, agresti tardante pudore,  
 Huic ego defuerim officio: cùm tu tamen Ultrò  
 Me semper (tua quae bonitas est plurima in omnes)  
 Alliceres dulci alloquio, vultuq̃ benigno.  
 Scilicet hoc unum mihi erat meminisse molestum,  
 Moerentemq̃, animum haud alia ratione valebam  
 Solari, nisi spe veniae; quam, nostra fatendo  
 Errata, audemus malè culto poscere versu.  
 Namq̃ mea, Antistes magne, hoc te nomine Musa  
 Compellat, quamvis absens suffusa rubore.  
 Ast ò ne nimium longis ambagibus aures  
 Laeserit, & culpam imprudens cumulauerit: at tu  
 Largius indulgens hanc & dimitte precanti.  
 Quin patere, ut iam nunc venia laetatus adeptus,  
 Ac stimulo cessante, fruar patriaq̃, meisq̃,  
 Conficiam & quod restat iter iucundius, & iam  
 Ne dubitem rediens te tanquam emansor adire.  
 Sic Deus omnipotens tua semper vota secundet,  
 Et tibi (cuncta gregi ut contingant prospera) Mosi  
 Corporis, atq; animi vires concedat, & annos.  
 Forosempronij. MDXXC.

Ad LVDOVICVM BECCATELLVM Ragusinorum  
 Archiepiscopum, ac Præpositum Praten-  
 sem nomine Clericorum Collegij.

PRAEMIA Rex caeli, ac terrae tibi digna rependat  
 Pro tantis meritis, Praeses sanctissime: namq;  
 Haud



Haud opis est nostrae vel paruas soluere grates,  
 Cum penitus vires desint, & copia fandi.  
 Ne tua miranda est pietas, quae parcere nullis  
 Te sinit impensis, nullisue laboribus; ut nos  
 Iampridem segnes agros, atq; horrida tesqua  
 Virtute expolias, & castis moribus ornes,  
 Ac magno incendas verae pietatis amore.  
 O vinam tibi maturos tua cultio fructus  
 Reddat, & immenso frugum te ditet aceruo,  
 Ne tot poeniteat frustra impendisse labores.  
 Sed tamen aeternum benefacti gloria tanti  
 Te manet. ingenuè paruiq; fatemur, & ampli,  
 Nos debere tibi. non obliuiscier vnquam  
 Mens poterit sanctos monitus, atq; aurea verba,  
 Nec tuus è nostro dilabi pectore vultus.  
 Quin etiam haec laeto dum gramine prata virescent,  
 Paruus & ingenti Bisentius influet Arno,  
 Semp̃er honos, nomenq; tuum, laudesq; manebunt.

Virg. Egl. v.

Ad eundem eorundem nomine.

**A** NNVE supplicibus, Praeses sanctissime, et ore  
 Nos placido intùere, ac humiles ne despice voces,  
 Dum veniam petimus miseri, atq; errata fate-  
 landudum merito nostris irascere culpis, (mur.  
 Et duro increpitas noxam sermone, minisq;  
 Hinc poena, hinc facti pauidos mens conscia terret.  
 At non ulla animum iam maior cura, dolorue

Soli



Sollicitat, tua quàm à nobis cùm lumina flectis,  
 Et stomachum praebes contracta in fronte legendum.  
 Quare age moeroris iam te miserescere nostri  
 Ne pigeat: ne sperne preces, ne sperne precantes.  
 Iam pietas animum subeat, iam flectere votis,  
 Pone iras, mitemq; magis, Pater, indue mentem.  
 Aut si te impune id non exorare valemus,  
 Non ullis nos verberibus, vinclisq; negamus;  
 Dum tamen errati ducant obliuia poenae,  
 Ac te ipsum nobis reddas velut ante benignum.  
 Torpentesq; leuent animos tua dulcia verba,  
 Et tandem obductas nubes frons laeta serenet.

Ad IACOBVM BILLIVM PRVNÆVM,  
 S. Michaelis in Eremo Abbatem.

**Q**VANTI te faciam, BILLI clarissime, nomen  
 Utq; tuū venerer iam pridem, atq; aurea scripta;  
 Plenius, ac melius referentem audire licebit  
 CVRTERIVM, quàm si verbis id pluribus ipse  
 Conando, doctas nimium tibi demorer aures.  
 Namq; ut praestanti ingenio, sic ille peracri  
 Iudicio valet, atq; mei bene pectoris imos  
 Lustravit sensus, cùm de te saepe loquentem  
 Excepit praesens: quin omnem non modò nouit  
 Cultum in te nostrum, studiumq;, sed amplius auxit.  
 Dum BILLAE gentis claros enarrat honores,  
 Seu qua nobilium insignit vos splendor aurore,

H 2 Mili-



Militiaeq; domiq; armis, opibusq; potentum:  
 Seu qua quisq; sibi Virtutum laude suarum,  
 O dilecta Deo series lectissima fratrum,  
 Thesauros nullo perituros tempore condit,  
 Aeternasq; animo sedes affectat olympi.  
 Quò iam etiam partem scandisse ferebat ouantem,  
 (Sic pietas sperare iubet) fortissima quondam  
 Pectora, quae CHRISTI pro Religione tuenda  
 Haud timuere sequi pulchram per vulnera mortem.  
 Multaq; de genere hoc me saepius ille diserto  
 Sermone edocuit scitantem, nec minus Ultrò,  
 Sic vos praecipuo colit, atq; obseruat amore.  
 Quae verò de te praesertim plurima dixit,  
 Deq; tui eximijs animi, venerande Iacobe,  
 Dotibus, & stirpe illustri, & sacro ordine dignis  
 Moribus; atq; bonis semper quanto ipse labore  
 Inuigiles studijs, & chartis plurima mandes:  
 Omnia praetereo consultò. nam mihi prudens  
 Id quoq; Curterius cauit, dum carmine primùm  
 (Ipso addente animos) te compellare parabam.  
 Scilicet ut cupidae si me ardor fortè camoenae  
 Aut meriti nitor vrgeret, per amoena tuarum  
 Laudum prata stylum traducere, te nihil inde  
 Inspectante ausim contingere: caetera nam te  
 Laturum facile, cum tam sis mente benigna,  
 Obsequium ignotae, parua, & munuscula Musae:  
 Verùm si quis in os tibi maxima quaeq; merenti,  
 Since-



Sincero quamuis animo, & virtutis amore,  
 Sedulus obtulerit praeconia debita laudum,  
 Nube supercilij spreturum, & fronte seuera.  
 Nimirum humanis rebus sublimior, atq;  
 Assueta aeternae meditari praemia vitae,  
 Mens refugit tenues titulos, & inania verba.  
 Quare ego, cui in votis erat hoc nil amplius uno,  
 (Quandoquidem fandi coram non ulla futura est  
 Copia, longinquis nos disiungentibus oris)  
 Quam reperire viam, unde tibi innotescere noster  
 Posset amor: non hoc patiar procedere quicquam  
 E calamo, tua quod temnat, vel abhorreat auris.  
 Si tamen haec alio non sit pagella molesta  
 Nomine: sed quanquam lepor illi, & gratia desit,  
 Fuco etiam caret, & qualem me tradere gestit  
 Nunc tibi, nempè tui, atq; tuae probitatis amantem,  
 Dum mihi vita manet, referet mox semper eundem:  
 Verum id Curterio quamuis tibi teste probari,  
 Meq; tuos sperem censendum iam inter amicos:  
 Non tamen iccirco patronum adhibere verebor,  
 Omnia te cuius meritis concedere par est.  
 Is mihi Gregorius fuerit, celeberrimus ille  
 Nazanxi Antistes, quem tu felicibus ausis  
 Graijs eductum latebris, sermone loquentem  
 Romano, occiduas vexisti nuper in oras.  
 Huius mi faueat venerabile nomen, & ossa:  
 Quorum particulam tibi nostri in pignus amoris

Mittimus



Mittimus; ex Diui Zachariae quam meus olim  
Aede tulit dominus, dum magna negocia Summi  
Pontificis tractat Venetum BECATELLVS in Vrbe:  
Optimus idem etiam Antistes, moriensq; reliquit  
Inde mihi, haud vno te dignum nomine munus.

IOANNES CVRTERIVS ANTONIO GIGANTI  
φιλάτῳ Salutem.

SCRIBO iterum, mi Gigas: sed gratiora, quam  
primū: nemp̄ post varios in misera Gallia erro-  
res meos, in D. Billium tandem σὺν θεῷ, prope  
Turones incidisse me; coenasse, meis relictis, cum ipso:  
sanctumq; λείψανον, carmenq; tuum esse deosculatum,  
amplexum, admiratum. Taceo, quos habuimus de  
te, de Sigonio, multisq; alijs, sermones. Non potui  
tamen omnia cum eo, tam breui occursu, de te, de me,  
nostrisq; rebus alijs agere. Caetera in proximam hye-  
mem remissa sunt; quo tempore inducias forsan ali-  
quas, more suo, datura est pestis; quae per totam ferē  
Galliam nunc grassatur. Credo tamen tantas moras  
non esse passurum Billium; breuiq; tibi responsurum.  
Quicquid ad nos miserit, dabimus operam, vt ad tuas  
manus tuto perueniat. Vale interim, & Sigonium  
meo nomine saluta. Ex maiore monasterio vij. Cal.  
Septemb. MDLXXXI.

DEBITA



Ad FRANCISCVM TURNONI Abbatem, &  
Alexandrum Priorem Sancti Martini,  
Fratres, Rupifucaldios.

**D**EBITA iampridem vobis, quo saepe benigno  
Praesētes humile obsequiū, studiūq; probastis,  
Sumite nūc eodē absētes mea carmina vultu,

Praestantes animi iuuenes, par nobile fratrum.  
Indicia haec solū, quamuis tenuissima, gratae  
Mentis erunt, meritis nec respondentia vestris.  
Dicere nam vobis, tantisue rependere dignas  
Officijs grates, non hic stylus eualet vnquam,  
Nec mi opus est tantum. neq; item praeconia laudum  
Magna offerre sinit torpentis inertia Musae:  
Ipsa licet vanis interdum id gestiat ausis  
Sponte sua, nec non applausibus excita laetis,  
Dum Randanorum illustre, ac memorabile nomen  
Certatim à paruis celebrari hīc audit, & amplis.  
Eximias siquidem dotes, morumq; lepōrem,  
Et cultum ingenium, sanctiq; pudoris amica  
Pectora, mirificis vt laudibus extulit olim,  
Dum vestro aspectu gaudens vos docta fouebat  
FELSINA, sic pleno nunquam non praedicat ore.

Non obscura loquor: quanquam clarissima virtus  
Vestra, velut celsis noctu ardens montibus ignis,  
Aut instar caelo signantis laeta cometae,  
Omnium ubiq; oculos in se conuertit, & ora.

Testes



Testes Pontificis Summi, Sacriq; Senatus  
Collati toties in commoda vestra fauores,  
Et quo praesentes vos Roma excepit amore.  
Perspicuum meriti indicium, atq; insigne futuri  
(Sic sperare iuuat) monumentum, et pignus honoris.  
Nam decimū properans aetas iam claudere lustrum,  
Non potis est dulcem mihi spem fregisse, videndi  
In Latias oras vos, Vaticanaq; rursus  
Templa reuertentes, titulis maioribus auctos.  
Interea vestra laeti virtute, bonisq;  
Florentes studijs, partum iam credite summum  
Vobis esse decus: pretium nam continet in se  
Virtus ipsa suum, quod laurea nulla, nec ostrum  
Amplificare valent: proprio vi fulgore pyropus  
Fit magni, aut adamas nondum circumdatus auro.  
Tum verò artificis quicquid super addit honoris  
Ingeniosa manus, laudant, mirantur & omnes;  
Sed non iudicio, ac sensu rude vulgus eodem,  
Quo sapiens, & cui potior sententia cordi est.  
Namq; operis pulchram speciem, notumq; metallum  
Inscia turba stupet: verum sincera nè gemma,  
Et quanti liceat: fuco an mentita colorem  
Vilior existat, quo circumcluditur, auro,  
Negligit omnino, aut potius discernere nescit.  
At prudens Sophiae cultor bene callet utrunq;  
Atq; alia ornatus, alia ratione lapillum  
Approbat, haud ignarus quantum hic distet ab illis.

Vultis



Vultis & illustri exemplo mea carmina firmem,  
 Clareat ut magis, an virtuti debita pluri  
 Praemia sint facienda, an per se se inclyta virtus?  
 Gasparis ad vestras fors aures nobile nomen  
 Venit, quo meritò gens Contarena superbit:  
 Illius aut potius praeclara euoluere scripta  
 Iam potuisse reor, captos ut amore legendi  
 Vos noui, & parta est librorum magna suppellex:  
 Tertius hanc Paulus, quo non prudentior alter  
 Dignos seligere, atq; vtrò decorare merentes,  
 Absentem Tyrj insigniuit honore galeri:  
 Cum Venetos inter procures tunc publica obiret  
 Munia, & ingenti, ut semper, cum laude senator.  
 Mox Romam accitus mira pietate, fideq;  
 Consilio & summis solerti in rebus agendis,  
 Virtutemq; suam, ac magni memorabile de se  
 Pauli iudicium aeternos clarauit in annos.  
 Ergò multa libens cum Gaspare saepe solebat  
 Romanus conferre Pater, quae mente sagaci  
 Versabat prudens in publica commoda semper.  
 Haec inter de purpureis cum fortè legendis  
 Consulere patribus, quid sentiat ipse rogatus  
 Gaspar ait: curam (quando nil urgeat) illam  
 Differri, ac praesens potuisse in tempus omitti,  
 Et dictum validis rationibus vndiq; munit.  
 Tum senior reputans mortali in pectore liuor  
 Quid possit, nec dum certus num Gaspar eodem



*Tinctus, an ingenuo sit talia corde locutus,  
 (Namq; imos hominis valeat quis noscere sensus?)  
 Respondit, fuimus nos isto & in ordine quondam,  
 Scimus ei hoc etiam, ut proprium penè omnibus insit,  
 Aegre ut quisq; ferat, nec non mille artibus obset,  
 Quandocunq; sibi sit quisquam aequandus honore.  
 Ille autem penitus suspectae ut diluat omne  
 Invidiae crimen (tantum dat conscia recti  
 Mens ausum) utq; magis pateat, quòd sacra tiara  
 Haud aeque facit esse pares dumtaxat, & ostrum;  
 Parce, inquit, mihi Sancte Pater, si forte videbor  
 Aut nimis audenter fari, aut tua pendere parui  
 Munera, quae (ut par est) mihi erūt aplissima sèper.  
 Ac tibi pro meritis tantis debere fatebor.  
 Ne verò posthac me rubra insignia cuiq;  
 Inuidisse putes; scito, non amplius aequo  
 Illis me efferri, aut adeò, decus inde meorum  
 Ut credam maius proficisci, & culmen honorum.  
 Obstupuit responsa Pater tam libera, & altum  
 Gasparis ingenium, nil audens hiscere contrà.  
 Nunc vos o iuvenes sublimis acumine mentis  
 (Ut vates Thebanus ait) comprehendite nostri  
 Sensum animi: & diam virtutem pergitote totis  
 Viribus amplecti, atq; amplis praeferre benignae  
 Fortunae donis; ut celsa è Rvpe Focata,  
 Splendida tot vobis vnde ornamenta redundant,  
 Iam nec nobilitas, nec opes, nec gratia regum*

*Scintillens*



Scintillent adeò per Gallica, & extera regna,  
 Ut proprium decus amborum, illustrissima Virtus.  
 PICI etiam possem exemplum memorare Ioannis,  
 Quo nil mirandum magis extulit Itala tellus:  
 Cuius et Antipodes, nedum Thule Ultima, et Indus  
 Iam norunt laudes, atq; indelebile nomen,  
 Verùm nota Viri cui sunt magis omnia tanti  
 Et studia, & mores, quàm vobis? quos veneranda  
 A teneris primùm Picorum clara propago,  
 Instituit Mater. mox & dignissimus omni  
 Curterius laude eius per Vestigia ad altam  
 Virtutis metam fausto vos omine duxit.  
 Tum visa ipsius tandem incunabula quantum  
 Ardorem auxerunt animis, celebrataq; imago,  
 Diuiniquò opus ingenij immortalia scripta?  
 Hinc stimulos, hinc & calcaria sumitis Ultrò,  
 Iam celeri cursu per vos Heliconam petendo,  
 Artibus vsq; bonis intenti, & rebus honestis:  
 Ut iam Verè aliquis, blandiri nescius, ipsum  
 In vobis Pici exemplar se agnoscere dicat.  
 Sic candore animi, morumq;, ac ore venusto  
 (Addidit hunc etiam large natura decorem)  
 Sic dulci alloquio, salibus, Virtutis amore,  
 Et studijs Picum, & lepida gravitate refertis.  
 Talia dicenti tum me propensa voluntas  
 In vestras laudes, tum res monet ipsa favere,  
 Atq; etiam calamo quamvis subscribere inertis.



Amplius at vobis, quod P I C O defuit vnum,  
 Optem supplicibus votis ab Rege superno,  
 Nempe aevi longum spatium, viridemq; senectam:  
 Quo generosa diu vestro laetetur honore  
 Progenies Randanorum, Rupisq; focatae.  
 Quoq; magis tanto late radiante per orbem  
 Virtutum splendore, potens se Gallia iactet,  
 Obductasq; animis tenebras procul arceat omnes.  
 Bononia MDXXCII.

Ad HIPPOLYTVM AVGVSTINIVM Caldanæ Dom.  
 Cum vitro ad Solis radios ignem accendente.

**N**ON quia muneribus tecum, vir nobilis, ausim  
 Certare, hoc primum tibi mitto: nãq; ego tãtũ  
 Haud facio varios nostri (hoc si noĩe dignũ est)  
 Musaei ornatus, congestos vt simul omnes  
 Posse rear quoduis donorum aequare, benignẽ  
 Quae mihi iam toties & pulchra, & plura dedisti.  
 Sed licet exiguum, id magni tu in pignus amoris  
 Sume, precor. Si quidem non hoc te nomine tantũ  
 Diligo, quod largus crebro me munere dignes,  
 (Quamquam me magis hinc etiam debere fatebor:)  
 Ast animi candor, tuaq; illustrissima virtus  
 Hippolyte, & lepor eloquij, moresq; venusti  
 Me tibi praecipue vinclo obstrinxere perenni.  
 Quod si purus amor, si in te propensa voluntas,  
 Si memor accepti, si mens tibi grata probatur;

Cum



Cum fragili vitro haec etiam vultu aspice blando  
 Parua senescentis mecum munuscula Musae.  
 Cui si quid maius meditati aspiret Apollo,  
 Dedita quàm tibi sit, numero fors pluribus olim  
 Carminibus pandet, nitidas audebit & undas  
 Fontis inexausti laudum libare tuarum.

Ad HIERONYMUM GIGANTEM Ioannis F.  
 Hieronymi Iuriscons. clariss. Nepotem.

**A**NNIS parue puer, sed ià nūc indole magna,  
 Quos cōsanguineus Semproni ex vrbe libellos  
 Mittit, sume libens, non parui pignus amoris.  
 Quàm vellem hos ad te mihi nunc perferre liceret,  
 Et te praesentem affari, tuaq; ora tueri.  
 Nam quāquam haud facie, Antoni sed noīe tantūm  
 Sum tibi notus adhuc: tamen ipsum prorsus amantem  
 Esse tui, cupidumq; velim, HIERONYME, credas.  
 Siue ita cognatus fert sanguis, siue parentis  
 Multa tui merita, ac virtus id iure requirunt:  
 Siue tuum ingenium, cuius iam laudibus absens  
 Delector, tanto nos in te inflammat amore.  
 O mihi contingat saltem te cernere coram,  
 Cū viridi aetate, & multis virtutibus auctus  
 Nobilia insistes vestigia patris, auiq;  
 Et Venetum, magna turba comitante clientum,  
 Ingrediere forum, ac dum tu sermone diserto  
 Orabis causas, subsellia plena stupebunt.

Haec



*Haec sanè à teneris nunc te meditarier annis  
 Care puer decet, & studijs assuescere magnis.  
 At quamuis exempla domi, quæ certa sequaris,  
 Ipse habeas, nec non praeceptis patris abundes:  
 Hos tamen è manibus nunquam dimittere libros  
 Te moneo, tua deinde feret cùm firmior aetas.  
 Quos princeps latij sermonis Tullius olim  
 Diuino scripsit calamo, dum maxima Roma  
 Eloquio, imperioq; magis florebat, & armis.  
 Saepius hos etenim relegendi & copia largè  
 Effluet inde tibi verborum, & splendidus ordo.  
 Sic te crescentem Deus, & fortunet adultum,  
 Ac per te gentem amplificet, nomenq; Gigantum.*

*In solempni Translatione plurimarum Sanctarum  
 Reliquiarum ab Illustrissimo, & Reuerendiss.  
 D. Gabriele Card. Palæoto Archiepiscopo I.  
 Bononiæ celebrata Sexto Id. Sept. MDXCIII.*

**S**ACRA beatorum cinerum spectacula rursus  
 Dilectae Gabriel patriae Pater optimus offert,  
 Ecclesiamq; suam pretioso munere ditat.  
 AGRICOLAE quondam, VITALISQ; ossa sepulchro  
 Eruit obscuro, nitidaq; locauit in ara.  
 Tum Mediolano rediens quàm plurima Diuûm  
 Pignora laetanti solempniter intulit urbi.  
 Inde ZAMAE primi Pastoris, itemq; secundi  
 Felsinei gregis, insigni translata triumpho

Faustinia-  
 nus Episco-  
 pus ij. Bon.

Corpo-



Corpora, odoratis è cedro condidit arcis.  
 Nunc Palaeorum longo antè labore, pioq;  
 Collectum studio, atq; diu intra tecta repostum  
 Thesaurum promens, oculos, & corda tuentum  
 Exhilarat, nec non diuino inflammat amore.  
 Scilicet has populus veneratus honore decenti  
 Sanctas Reliquias, etiam feruentius ipsos  
 Caelicolas supplex in vota, precesq; vocabit.  
 Omnimodis igitur laetare Bononia, festam  
 Concelebrans pompam, tot tantisq; aucta trophaeis.  
 Praesuli & innumeras grates age pectore, & ore;  
 Atq; tuac ut valeat longum inuigilare saluti,  
 Illi longaeuam, viridemq; precare senectam.

Ad ALEXANDRUM BVRGIVM Mutilianæ  
 Priorem.

In obitu Ioannis Vicecomitis Mediolanensis,  
 Vtriusq; Signaturæ Referendarij.

**N**I tua, BVRGE, mihi probitas, doctrinaq; certis  
 Iam pridem indicijis adeò perspecta fuisset,  
 Ut penitus credā, nil te ius praeter, et aequum  
 Aduersum caros committere posse sodales:  
 Nescio quid nostram poterat compellere musam,  
 Quo te mordaci properaret carpere iambo.  
 Miraris merito tibi conscius, vnde repente  
 Ista sit exorta, & quonam querimonia tendat.  
 Sed mihi num veniam geniali tempore spondes,  
 Sensa



*Sensa animi ingenue si proloquar? annuis. ergo  
Praebe incompósitos patientem versibus aurem.  
En tuus occubuit praereptus morte Ioannes,  
Dimidium, ut prefers, animae, quem sanguine clarū  
Extulerat vice gens Comitū, & cui maxima Roma  
Ingenio, studijsq; bonis, & moribus aequae  
Florenti, magnos iam designabat honores.  
Occidit ille (inquam) tibi, Burge, & flebilis Vrbi,  
Nec tu nulla animi moerentis signa dedisti:  
Sed nego amicitiae ius absteprorsus ad unguem  
Haecenus expletum: nam te licet unus, & alter  
Viderit ex oculis lacrymas, & curia tota  
Audierit gemitus prominentem pectore ab imo,  
Egregij Iuuenis dum lamentaris acerbum  
Funus, & orbatum quereris te dulcis amici  
Congressu, salibus, sermone, lepore, iocisq;  
At tamen hinc laudes, nomenq;, decusq; perempti  
Non praesens aetas passim, non postera noscet;  
Ni tua, quo nequeat se vox extendere, culto  
Docta manus calamo conscripta haec omnia chartis  
Pluribus emittat iam nunc, iteretq; subinde.  
Nempe hoc supremum extincto persolvere munus  
Pridem debueras, & adhuc indignor omissum.  
Non si perpetuis madeant tibi fletibus ora,  
Assidue & moestis repleas clamoribus auras,  
Defunctum superas renocare valebis in oras:  
Illius at longum ut vigeat post fama superstes,  
Donec*



CARMINA EXAMETRA. 65

Donec Etruscus erit sermo, atq; in honore latinus,  
Quo magis ipse potes praestare, hoc & fore maius  
Crede nefas, socij manes fraudare morando.  
Querengi & Musam, tanto quam Roma favore  
Prosequitur, quamq; ipse viri & virtutis amore  
Sussicio, venerorq; libens, perq; omnia laudo;  
Nunc tacite increpitans compello hucusq; silentem,  
Non modo virtuti praeconia debita laudum,  
Sed proprios tumuli titulos, & lugubre carmen.  
Ac si lethaeam ipsa etiam gustauerit undam,  
Aut ille ignota iaceat velut hospes arena.

Antonius  
Queren-  
gius.

MDXCV.

In tumulum Hieronymi Manutij Pauli filij,  
obiit Ragusij.

**H**OC puer egregia Hieronymus indole paruo  
Contegitur tumulo. quem docti filius ALDI  
Progeniuit Paulus, Venetaq; huc misit ab Vrbe  
Grammaticam Bosio sub praeceptore docendum.  
Sed dum nec puero ingenium, nec cura magistro  
Deest, importunae secuerunt stamina Parcae,  
Octauum vitae cum penè attingeret annum.  
Haec tibi forte satis fuerit nouisse Viator,  
At reliquos etiam libeat percurrere versus,  
Vt magnum ediscas animi puerilis acumen.  
Saepius ille bonum doctorem multa rogabat  
Aetatem supra. quis scilicet aurea caeli

Paulus Bo-  
sius.

K

Sidera,



*Sidera, & errantem Lunam, Solemq; creasset;  
 Quò se hic proriperet fugiens, aut unde rediret;  
 Cur minus illa die niteat, quam nocte serena;  
 Atq; huius generis scitari plura venustè.  
 Sed non vlla adeò responsa audire libenter,  
 Ut Caelum esse Dei sedem, quò deinde piorum  
 Se referant animae, illius tum sedis amore  
 Ardentem puerum mage, quàm sit credere dignum,  
 Cernere erat, penitusq; illam se optare ferentem.  
 Quin etiam assuetus iam verba latina sonare,  
 Haec hilari vultu non nunquam iterare solebat  
 Caelum suspiciens, illuc ascendere vellem.  
 Quod desiderium ne maior frangeret aetas,  
 Mature expleuit puero regnator olympi.*

*In Hæreticos tumultuantes in Gallia  
 sub Carolo I x.*

**E**HEU quā miserū est, populos memorare veneno  
 Lutheri infectos. Germania, et Anglia prudens  
 Florentes ambae mira pietate, Deiq;  
 Cultu, quò ruitis? quis vos furor incitat amens?  
 Quis vos à capite ab membra infelicia magno  
 Cum scelere excidit? Sed tu quoq; Gallia robur  
 Romanae sedis quondam, diro omine tanta  
 Flagitia in nitidum potuisti admittere corpus?  
 Tu sacras aras, tu mille dicata per annos  
 Tempia Deo, eruere, & foedis comburere flammis

*Sancto-*



Sanctorum effigies, atq; insultare nefandis  
 Ausa modis rebus sacris, CHRISTIQ. ministris?  
 Nec puduit regni leges violare vetustas,  
 Regiam (&) insidijs prolem petijisse latenter,  
 Mox armis etiam, belloq; laceffere aperto?  
 O mores, ò in peius labentia secla,  
 Quaenam tot nobis speranda est meta malorum?  
 Nempe manu hìc opus est magni Rectoris olympi,  
 Unus qui euersis potis est succurrere rebus;  
 Humanas quando nil profecisse medelas  
 Sentimus. sic ille benigna haud abnuat aure  
 Orantes veniam coetus audire piorum.

Ex Seneca de breuitate vitae. Cap. I.

**M**AXIMA pars hominū queritur, Pauline, quòd eui  
 Natura exiguum dederit mortalibus, (&) quòd  
 Tam rapidè nobis decurrant tempora vitae,  
 Ut, vix exceptis paucis, dum viuere rectè,  
 Et sapere incipimus, fato subigamur acerbo.  
 Nec turba huic damno tantum, atq; ignobile vulgus  
 Ingemit; est etiam clarorum audire virorum  
 Indecores questus. Medicorum maximus ille  
 Hinc vitam esse breuem, longamq; expostulat artem.  
 Hinc (&) Aristoteles naturam incusat iniquam,  
 Nempe quòd incassum innumeros indulserit annos  
 Cornici, & Ceruo: ast homini in tam multa creato,  
 Ac tam magna, breuis fluxi stetit terminus aui.

K 2 Alta-



Attamen id falsò querimur, nec tempus habemus  
 Exiguum miseri, sed multum perdimus ipsi.  
 Longa satis vita est, & idonea rebus agendis  
 Pluribus, & magnis, si quis non negligat uti.  
 Verùm ubi per luxum, & curas defluxit inertes,  
 Tum demùm piget, ac animo transisse dolenti  
 Sentimus, quam non unquam intelleximus ire.  
 Non igitur vitam angustam accepisse, sed ultro  
 Nos talem proprijs vitijs fecisse queramur:  
 Nanq; inopes aevi haud sumus, at disperdimus aevum.  
 Sicut regis opes si prodigus occupet, horae  
 Momento quamvis ingentes dissipat omnes.  
 At res, quam frugi custos possederit, usu  
 Crescereq; & longos potis est durare per annos.  
 Ergò qui, quodcunq; Deus concesserit aevi,  
 Mature studijs solers impendet honestis;  
 Hic vixisse diu meritò, Pauline, feretur.

De Perseo Macedonum Rege captiuo.

Ex Tito Liuiio lib. XLV.

**A**EMILIUS victo cernens ab Rege tabellas,  
 Supplice conscriptas calamo, et sine noë regis:  
 Dicitur humanae sorti illacrymasse; quòd ille,  
 Qui pridem Imperio non sat contentus auito,  
 Dardaniam auderet, longèq; inuadere fines  
 Illyrij, ac socijs Romani nominis ultro  
 Arma inferre ferox, ipsosq; laceffere bello  
 Romulidas,



Romulidas, nec non Italis minitarius oris:  
Tum penitus regno extorris fugisset inermis  
Insulam in exiguam, qua sacri denique fani  
Religione, suis non tutus viribus esset.

Mox etiam in castra adduci ut conspexit eundem  
Captivum, sortis casum miseratus iniquae,  
Porrigit afflicto dextram, & sic fatur amice.  
Utcunque haec, Perseu, inciderint, seu dura subegit  
Sors, siue imprudens aliquis te compulit error,  
Iam bonum habere animum iubeo; nam casibus ante  
Multorum Regum bonitas perspecta Quiritum,  
Spem tibi, & indicia ostendit propè certa salutis.  
Haec graeco sermone. Suis at deinde latine,  
Insigne ante oculos exemplum cernitis, inquit,  
Quanta humanarum fiet inconstantia rerum.  
Praecipue iuvenes vos huc aduertite mentem,  
Disciteq; in rebus nulli insultare secundis,  
Nec facile ancipiti praesentis credere ludo  
Fortunae, CVM quid vesper ferat, incertum sit.  
Is demum vir erit, cuius non efferet unquam  
Prospera sors animum, sed nec contraria franget.



POMPO-



ANTONII GIGANTIS  
FOROSEMPRONIENSIS  
CARMINA ELEGIACA.



Ad POMPONIVM BECCATELLVM Caroli F:  
Abbatiae S. Fabiani Vallis Lauini  
Commendatarium.



POMPONI, quae te nascentem ex-  
cepit in Vlnas,  
Et fouit casto Calliopea sinu:  
Illa tibi semper nutrix ceu sedula  
alumno  
Asidet, instillans nectar, &  
ambrosiam.

Ac seu te Albini colles, & prata morantur,  
It socia, & dulci detinet alloquio.  
Siue Academiam repetis, carosq; sodales,  
Illa tibi numeros sufficit, illa sales.  
Et proficiscenti Patauina nuper ad Urbem  
Praebuit illa ducem se, comitemq; viae.  
Quin decedenti penè ipso in limine molles  
Dictauit questus Phrasidemi, & lacrymas.  
Phrasidemi inuitè linquentis tecta Corinnae  
Dum longum hyberno sidere carpit iter.

Et



*Et sibi cū tantum, mi Beccatelle, laborem  
De te suscipiat maxima Pieridum:  
Mirabor, tibi quòd subeat facundia tanta,  
Et tam dulce tuo carmen ab ore fluat?  
Non eadem nostri iamdudum cura Thalias  
Tangit, sed veluti saeva nouerca fugit.  
Viq̃ emansorem iam me aspernatur, & odit,  
Nec vota infensam, nec pia thura iuuant.  
Me mea segnities ingrata ducere vitam  
Coget, & ignotum consensisse domi.  
At te magna decent, magnis te rebus agendis  
Natum vel fasces, vel decora alta manent.  
Te patruī magnos equare decebit honores,  
Cuius virtutes, ingeniumq̃ refers.  
O mihi tam longos concedat Iuppiter annos,  
Vt quae mens clavis prospicit indicijs,  
Aspiciant oculi: fungenti vt munere sacro  
Scilicet eximij sit tibi cura gregis.  
Huc studia, huc mores, grauitas huc grandior annis  
Spectant, certus honos hic pietatis erit.  
Firmior aet̃ etas haec, & maiora reposcet,  
Romaq̃ virtutis praemia sponte dabit.  
Tu tamen interea complectere (quod facis) ipsam  
Virtutem obnixè viribus, atq; animo:  
Contentusq̃ illa sic viue, vt tempore nullo  
Te speres maius posse parare decus.*

ETSI



## AD PAVLVM BOSIVM.

**E**TSI inter strepitus agrestum, praelaq; iuras,  
Te requiem membris vix potuisse dare;  
Ne dum animum dulci interdū recreare libello,  
Interdum aut lepidos scribere versiculos.  
Non tamen, vt credam, adducor, suauissime Bosi;  
Musam rure tuam tam siluisse diu.  
Non ea desidia, longi nec amica silenti est,  
Nec siccum calamum tam sinit esse tuum.  
Nec te adeo hunc totum pinguis vindemia mensem  
Implicitum tenuit, continuusq; labor.  
Attulit & tibi festa dies saepe otia, quae non  
Turbarunt raucis vocibus agricolae.  
Nunquam igitur nobis satis excusatus abibis,  
Otia quod dicas nulla fuisse tibi.  
Quare age quicquid habes, da nobis, Paule, legendum,  
Et me participem fac studij esse tui.  
Da, per Virgilij te oro memorabile nomen,  
Perq; tui Flacci, carmina docta, precor.  
Seu duri Martis, teneri seu praelia Amoris,  
Seu ruris laudes, Paule diserte, canis:  
Quicquid id est, nobis quam primum mitte, precamur:  
Nam tua vel cupide candida scripta legam.

Dum



Ad NICOLAVM GOTIVM Archipresbyterum  
Ragusinum.

**D**VM, GOTI, à sacro Becatelli Praesulis ore  
Pendes, atq; auida aure aurea verba legis:  
Estne satum Maia facunde audire loquentem  
Quòd malis, Phoebum ve, Aonidum ve choros?  
Si mihi ritè tuos liceat recludere sensus,  
Hunc tibi magni instar numinis esse rear.

De IO. BAPTISTA AMALTHEO

**P**HOEBE tibi, & vobis dilecta fronde Camoenae  
Tempora Amaltheo cingite docta bono.  
Quandoquidem se se sublimi carmine priscis  
Vatibus aequiparat iam, superatq; novos.  
Nam sibi seu vestras sumit contexere laudes,  
Seu canit Heroum fortia facta virum.  
Floreas seu rura, arduas seu dicit amores,  
Latè Hyalem sylvas seu resonare docet.  
Seu caris scribit socijs epigrammata: nemo  
Est, cui candidior versus in ore sonet.

Ad Eundem de ipsius carmine Crater inscripto.

**V**NVS ego in tota ne abstemius urbe viderer;  
Tristis & in tanta laetitia populi.  
Hausi mane tuum summo Cratera, Ioannes,  
Spumantem dulci nectare & ambrosia.

L

Quem



Quem simul admoui labris, mihi visa repente  
 Curarum solui compede corda graui.  
 At mox illa tibi diuino munere amice  
 Deuixti, extremo vix soluenda die.

De irrito Piscatu in litore Illyrico.

**Q**UICVNQ es, gracili qui nuper arūdine paruos  
 Captabas rigido è litore pisciculos:  
 Et nunc spe longa frustratus, arundine, et hamo  
 In mare proiectis, hinc stomachosus abis:  
 Siste gradum, nostrasq; tuis adiunge querelas,  
 Nam caussa est tecum par mihi tristitia.  
 Huc ego saepe miser descendi, nec fuit vnquam  
 Pisciculum multis fallere posse dolis.  
 Ac mea ne posset culpari inscitia, tempus,  
 Et loca piscandi quòd minus apta legam:  
 Hic Sol me exoriens, medioq; ex axe reuisit,  
 Saepe laborantem me miseratus abit.  
 Atq; antehac alios hoc ipso è litore vidi  
 Fiscellam multo pisce referre grauem.  
 Me mala sors vnun gaudet discidere tristem,  
 Exultat semper questibus illa meis.  
 Hic te non antè inspexi, & fortasse laborem  
 Frustratum sentis nunc semel esse tuum.  
 At nobis, quoties ad litora venimus, omnes  
 Iratos tories sensimus esse Deos.  
 Sicq; operam amisi semper, sic tempus, & escam.

Hincq;



Hincq; mihi caussa est maxima tristitiae.  
Nunc age dic hospes tua nobis fata vicissim,  
Vltius fari me ira, dolorq; vetat.  
Quid mussas? num vox nimio compressa dolore  
Deficit, & clarè promere verba negat?  
Me miserum, rebar socium reperisse malorum,  
Rursus decipior, barbara verba sonat.  
Haec quoq; dij nobis adimunt solatia, nemo  
Questubus ut possit testis adesse meis.  
I tu, quaere, tuas valeat qui audire querelas,  
Hicq; resultabunt aspera saxa meis.  
Vos scopuli testes, quoties per dura cucurri  
Litora, quàm lassus saepè domum redij.  
Interdum madidam, scissamq; ab litore vestem,  
Interdum offensos rettulimusq; pedes.  
Nunc primùm didici, vetitum quàm tendere contrà  
Arduus est homini, difficilisq; labor.  
Quod nostris prudens oculis natura negavit,  
Quid iam fallaci persequar arte miser?  
Haec alios posthac teneat vesana cupido,  
Quos rabida ingluuies, pauperiesue trahit.  
Me canibus potius lepores agitare fugaces,  
Et laxo damas fallere casse iuuet.  
Aut pictis auibus varias innectere fraudes,  
Quas hominum solers repperit ingenium:  
Per nitidos colles, nemora & per opaca, Metauri  
Insignis vitrea quâ fluit amnis aqua:



Semproniq; fori quâ parua suburbia cursu  
 Flexiuago, atq; agri pingua culta rigat.  
 Salue dulce forum, & tu salue nobile flumen,  
 Saluete ô patrij pulchra vireta soli.  
 En vnquam mihi vestro oculos satiare lepore  
 Continget, longis temporib; q; frui?  
 Dij Patrij, vos & praesentia numina, montis  
 Quae iuga Semproni, quaeq; tenetis aquas:  
 Iam nostras audite preces, miserescite nostri,  
 Nos tandem Illyricis eripite è scopulis.  
 Tuq; diu optatam lucem mihi, Phoebe, reducas,  
 Qua neuere meos fata domum reditus.  
 Rite illic vobis, Superi, propè fluminis undam  
 Persoluam toties debita vota libens.

## In Tumulum.

**Q**UID circa Tumulum Charites mirare viator?  
 Quid Phoebum, & passis crinibus Aonides?  
 Parnasi decus immatura morte peremptum  
 Deslent, & sacro dona ferunt cineri.  
 At tibi si pietas, si virtus inclyta cordi est,  
 Hunc quoq; tu decora floribus, & lacrymis.

Ex Theocrito. τὰ πόδα.

**I**ANDVDVM vobis haec laeta rosaria florent,  
 Serpylla & denso cespite, Pierides.  
 Hanc tibi, quae felix in colle virescit amoeno

Lau-



*Laurus, iandudum Phoebe dicauit Acon.  
At caper hic aram consperget sanguine Baccho,  
Depastum vites ausus adire nouas.*

Ex Eodem. Α δέ λαι τὸ Θύρσι.

**A**H cur Daphni miser tibi flendo exuris ocellos?  
Cur roseas turpat lacryma sicca genas?  
Lethaeos potum riuos faecunda capella,  
Et pastum campos iuit ad Elysios:  
Latratu syluas implet Melaneus: at illa  
Iam periit, rabidi praeda cruenta lupi.

Ex eodem. Νήπιον υἱὸν.

**H**ic Eudeme iaces longa perfuncte senecta,  
Et magnis magnae muneribus patriae.  
Nos tua solatur soboles te digna superstes,  
Egregius patris filius egregij.  
Iuppiter aeternum meritos tibi reddet honores,  
Deferet astra populus huic memor usque tui.

Ad FRANCISCVM VARVM Pratensem. Pisas.

**N**E, quod nulla tibi veniant mea carmina, factū  
Me, VARE, immemorem dixeris esse tui.  
Quin potius quiduis credas prius esse futurum,  
Quam te dilabi pectore posse meo.  
Nam mihi virtutemq; tuam, moresq; salesq;  
Qua lethe ex animo tollere possit aqua?

Nico



Nec minus ante oculos versantur plurima, quæ me  
 Saepius admoneant commeminisse tui.  
 Et me siue bonis vacat oblectare libellis,  
 Occurrit nomen tum mihi saepè tuum:  
 Hunc Varus legere, hunc Varus laudare solebat,  
 Omnes se Vari prae monimenta ferunt.  
 Seu libet interdum cantu, fidibusue canoris  
 Tristitiam, & curas pellere corde graues:  
 Vare ades huc, inquam, liquidas tu flectere voces  
 Doctus, tu facili psallere dulcè manu.  
 Siue etiam quandoq; forum, vel compita circum,  
 Siue suburbana me iuuat ire via:  
 Hæc mihi Varus erat comes, hæc prae dulcibus aures  
 Alloquijs solitus detinuisse meas.  
 O eadem nostri interdum tibi cura recurset,  
 Nec fluxisse tuo me patiare sinu.  
 Quàm timeo, ne te magnæ celeberrimus Urbis  
 Conuentus memorem non sinat esse mei.  
 Praesertim Angelij si quando totus ab ore  
 Doctiloquo pendens aurea verba legis.  
 Angelij, vates quo non insignior alter  
 Cingit Apollinea fronde virente comas.  
 Aut cum Tegrini excipiunt te tecta benignè,  
 Iampridem Aonijs æmula dicta choris.  
 Atqui vel meritò obseruas studiosus utrunq;  
 Et meritò ingenio est captus uterq; tuo.  
 Quod tamen audisti praesens, ac saepè probasti,

P. Angelus  
 Bargeus.

Guido Te  
 grimus Ar  
 chidiac. Lu  
 cenfis.

Hoc



*Hoc etiam absentem te meminisse velim.  
Caetera me facile cuius concedere: at illi,  
Qui te praecipue diligit, esse parem.*

Ad LVDOVICVM BECCATELLVM  
CAESARIS Filium.

**P**RISCORVM moneo, LVDOVICE, volumina verses,  
Ut tuus eniteat cultior inde stylus:  
Ac molle ingenium excipiēs sua semina, magnos  
Mox referat fructus, ut benè cultus ager.  
Ludicra nanq; semel satis est percurrere, plectro  
Quae canit Hetrusco carmina Musa recens.  
Ne fidos spernas monitus, sed linque palustres,  
Et Latij niidas imbibe fontis aquas.

Ex Italico idiomate Latinè redditum.

**A**CCIPE languidula, quae nūc tibi voce, Lycori,  
Ad strepitum Citharae carmina sera cano.  
Quando ego non potui tota te luce videre,  
Dum passim huc illuc anxius usque vagor.  
Saepè hodie fontem petij te propter, & agros,  
At nusquam audita es, nullibi visa mihi.  
Vix tandem è foribus non discedente Lycisca,  
Te sensi tacitam continuisse domi.  
Ecquae tam assidue potuit te causa morari,  
Quin semel in specula conspicienda fores?  
Fac amabò, mea lux, summo te mane reuisam,  
Longior haec anno nox erit una mihi.

At



*At tu fortè leui recubas euicta sopore,  
Me Ioue sub gelido saeuus adurit Amor.*

*Aliud.*

**D**VM blandis rigidum pectus mollire puellae  
Conarer precibus, flebilibusq̃ modis:  
Ipsa sedens immota, diu permulta querentem  
Est sibi me lacrymis passa rigare sinum.  
Mox, vbi scuitiae partem posuisse decebat,  
Me miserum tristi perdidit indicio.  
Nanq; sinu excutens lacrymas, fluite, inquit, inanes,  
En mea nil vestro pectora rore madent.

*In Tumulum Io. Musonij Cremonensis.*

**Q**VI tumulos passim decorauì, & funera versis  
Multiplici, haec ipsum saxa viator habent:  
Musoni sacro quondam cognomine clarum,  
Quod me Pierius iussit habere chorus.  
Nil est, quòd sumas tibi nostrum ornare sepulchrum  
Carminibus, seu hospes, seu mihi ciuis eris.  
Haec neq; mî cordi, dum vixi, cura manebat,  
Nam plura exstarent hîc monimenta mei.  
Sat mihi erit, pura si spargens marmora lymp̃ha  
Optabis requiem manibus esse meis,

*In Penniculum ventorum indicem.*

**N**ON ita perturbant terras, atq; aequora venti,  
Ut mentis requiem culpa, scelusq̃ ruunt.

*INDO.*



## AD FABIVM BARDIVM.

**I**NDOMITI *ut non semper equi calcaribus armos,  
Nec lento assiduus verbere terga premes;  
Sed faciles collo interdum laxabis habenas,  
Et gressu exultet liberiore, fines.*  
Sic pueri ingenium par est te flectere, Bardi,  
Quem sacram Aonijs fingis inire viam.  
Quod si ille ignavus graditur; iam desine loris  
Indocilem, & saevis sollicitare minis.  
Namq; expes operam perdit, quicumq; laboris  
Hinc laudem inuita Pallade ferre studet.  
Tu verò ingentes age toto pectore grates,  
Votaq; dijs superis debita solue libens;  
Qui tibi tam laeto auspicio dant cernere natum  
Praestantem egregijs dotibus ingenij.  
Cui neq; iam stimulis opus est, nec Voce magistri,  
Sic agilis recto tramite currit iter.  
Quiq; adeò à teneris animo pulcherrima tentat,  
Pierij miro captus amore chori.  
Queis igitur non ille queat se laudibus olim,  
Qua non laetitia te cumulare patrem?  
Diuitias alij, atq; auram sectentur inanem,  
Et quae sors caeca fundit iniqua manu.  
Munere tu hoc vno diuûm dicere beatus,  
Scilicet & magnas aequiparabis opes.  
Non tamen idcirco maturum tempus, & annos

M

T.



Te cupidum votis anteuenire decet.  
 Rusticus emollit longa spe ductus agellum,  
 Et solers cultae semina mandat humo;  
 Mox glaciem, ac ventos tolerat patienter, & imbres,  
 Dum referat gratas lenior aura vices.  
 Iam laeti subeunt culmi, tum deniq; multa  
 Optati compos horrea fruge grauat.  
 Quicquid item mollis spondet, post firmior aetas  
 Reddet, ne dubita, spes tibi certa manet.  
 Nunc animis requiem, nunc laxamenta benignus  
 Indulge, & patrum tolle supercilium.  
 Nunc sine crescentes dulcis sopor irriget artus,  
 Noscat & ingenuus tempora festa puer.  
 Ipse etiam semper non arcum tendit Apollo,  
 Delia nec timidas concitat usq; feras.  
 Poscit opem natura, minas fastidit, & horret,  
 Atqui eadem placidum perferet imperium.  
 Haec utcunq; tibi sat erit dictasse Gigantem,  
 Dum bene tam nato, quam cupit esse patri.

Ad EPIDAVRVM de LVCA SORGIO.

**N**AE magnas tibi gnauius opes mercator, & au-  
 Desert, & multa nauita merce reedit. (rum  
 At iuuenē, Hetrusco qui te ex Helicone reuulsit,  
 Cinctus Apollinea fronde virente comas,  
 Excipe vel gaudens, atq; auri praefer aceruis,  
 Nobiliusq; tuum crede, EPIDAVRE, decus.

Tales



*Tales saepe tibi sic Flora remittat alumnos,  
Clarius ut resonet nomen in orbe tuum.*

IN OBITU FRANCISCI VINTHAE.

**V**INTHA obiit, quis iam commissa attentius alter,  
Maiores fide munia obire queat?  
Extinctus Vintha est, quis carmine dignius altum  
MEDICAE gentis nomen ad astra ferat.  
Ille adeo unus erat tractare negocia solers,  
Atque animum studiis applicuisse bonis.

In eiusdem Tumulum.

**F**RANCISCI Vintha monumentum. id noscere tan-  
Hetruscis fuerit, finitimisque satis. (tum  
At tu quisquis ades longinquis hospes ab oris,  
Si plus scire cupis, carmina pauca lege.  
Magni à secretis COSMI hic fidiſſimus olim,  
Et Phoebus, quantum sit pote, gratus erat.  
Ergo multiplici ille virum decoravit honore,  
Egregio hic calamo scribere multa dedit.

OCTAVIANI HUMILIS ad ANTONIVM  
GIGANTEM.

**N**ON ego te genitum credo de stirpe Gigantum,  
Pellere de caelo qui voluere Iovem.  
Sunt montes altis imponere montibus ausi,  
Immanisque furor terruit ille Deos.

M

2

Ful.



*Fulminibus sedmersa iacet Tellure sub ima  
 Quas meruit paenas impia turba luit.  
 Tu tamen egressus caelo mihi crederis esse,  
 Est nisi caelestis gentis origo tuae.  
 Est mihi iam notus frater tuus ante, Mineruae  
 Arbor cui proprium nomen oliua dedit.  
 Illius est nulli virtus non cognita, claris  
 Inferitur nostri temporis ille viris.  
 Es (doleo Antoni) serò mihi notus, abibis  
 Vix visus, grauitè quod nisi iure feram:  
 Non licuit te posse frui, velut umbra recedis,  
 Te nouisse mihi profuit ergo nihil.  
 Me tamen addictum magnis virtutibus esse  
 Crede tuis, sterilis sim licet ipse senex.  
 Diceris eximius Vates, nulliq; secundus,  
 Absens absentem versibus oro bees.  
 Infelix, manibus pro me des oscula fratris,  
 Quem memorem credo nominis esse mei.  
 Ridiculos elegos cursim tibi lusimus, oro  
 Faenore cum multo metra repone: vale.*

## AD OCTAVIANVM HUMILEM.

**Q**UIS nostrae, OCTAVI, notū tibi fecit agrestem  
 Pieridis cantum, quae per opaca modo  
 Vix nemora obstrepere incōptis audebat auenis,  
 Et versus rauca spargere voce rudes?  
 BENTIVOLVS certè, qualem me optauerit esse,  
 Nunc

Fabius Ben-  
 tiuolus Iu-  
 riscons. Fo-  
 rosempro-  
 nienfis.



Nunc etiam talem dixerit esse tibi.  
 Ille etenim pridem, nimio deceptus amore,  
 Censebat nugas non nihil esse meas.  
 Sed quocunq; modo nostrum tibi nomen ad aures,  
 Re paruum, & si quid nescio grande sonat,  
 Venerit: ò Poebi, & Musarum maxime cultor,  
 Nae tu animi multum es comis, & ingenui.  
 Qui me tam lepidis affaris versibus Ultrò,  
 Atq; prior nostram poscis amicitiam:  
 Conuictu dignus procerum, alloquioq; potentum,  
 Virtutem si aequa pendere lance velint.  
 Quare ego, quod possum, grato tibi pectore grates  
 Persoluo, & paucis innumeras numeris.  
 Nec non, tum propter Latoi insignia magni,  
 Tempora honoratè queis redimita geris:  
 Tum propter dotes animi, morumq; leporem,  
 Ex quo etiam ignotos cogor amare viros:  
 Defero, polliceorq; libens (hinc fucus abesto)  
 Si quid inest in me virium, & ingenij.  
 Absentiq; absens praestabo semper honorem,  
 Atq; HUMILIS clarum nomen in ore feram.

Hetruscum Michaelis Angeli Bonarotae  
 carmen latine redditum.

ET si spes annis nondum contenta peractis,  
 Promittit vitae tempora longa mihi.  
 Non tamen impigrae mea Parcae fila retardāt,  
 Nec



Nec mors non celeri me petit atra pede.  
 At quid iam plures annos, mendosaq; vitae  
 Commoda mortales expetimus miseri?  
 Si plus viuendo nobis nil prosumus ipsi,  
 Irritantq; magis noxia facta Deum.  
 Quoq; animus rebus terrenis arctius haeret,  
 Exulat aeterna longius à patria.  
 Omnipotens Caeli Rector tu dirige gressus  
 Nostros, quà certo tramite tendit iter.  
 Da vafri illecebras hostis nos temnere, & unum  
 Te colere, & semper commemorasse tui.  
 Vi iam nunc caeco mens carcere clausa, beati  
 Te duce praelibet gaudia summa chori.

In Liuorem.

**L**IVOR abi, è nostris & te citò proripe tectis,  
 Regnaq; Persephones tristia tristis abi. (tris  
 Atq; tibi te Eumenidū in gremijs, & crinibus a-  
 Conde, ibi & omne tuum virus amare vome.  
 Nam me nequicquam tibi subdere subdole tentas,  
 Et frustra rixas suggeris, atque odia.  
 Non ego (quod fateor) quamuis mala carmina fingam,  
 Inuideo, si cui pulcher Apollo fauet.  
 Quin laetor, necnon aliena poemata laudo  
 Ingenue, vates deuenerorq; bonos.  
 O nostro hanc mentem contingat habere sodali,  
 Audiat ille magis iam, blateretq; minus.

NUNC



## Ad N. Oeconomum.

**N**VNC tibi gratarer susceptum ob munus amice,  
 Cōmoda si qua foret nostra habitura domus.  
 Nēpē vices aliās cūm mense haud amplius vno  
 Antimachi gereres, durus & asper eras.  
 Furfuream vereor Cererem, impurumq; Liacūm,  
 E patina in prunas incidimus miseri.

## Ad PAVLVM BRVNORVM.

**S**ERA tibi veniunt haec carmina, Paule diserte,  
 Sed te non serus noster adiuit amor.  
 Ille libens istuc tacitus nam saepē recurrit,  
 Assidet aut potius sedulus vsque tibi.  
 Non aestus illum, non venti, aut frigora tardant,  
 Hanc eat assidue quin, redeatq; viam.  
 Sic te, cum primum tua cernere contigit ora,  
 Inq; animo semper post, oculisq; fero.  
 Hinc Masij per se dulces, lepidaeq; tabellae,  
 Iam nobis dulces sunt, lepidaeq; magis:  
 Quod de te verbis permulta loquuntur amicis,  
 Et recte ut valeas, & referunt, quid agas.  
 Nec referunt modò, sed praebent quandoq; legenda  
 Carmina, quae pangis compta, & amabilia.  
 In quibus & nostrum curas intexere nomen,  
 Quod facit, ut noster plus quoq; crescat amor.  
 Sed mihi dum nimium tribuis, Brunore, caueto,

Ioa. Baptis-  
 ta Malus

Ne



Ne tibi iudicium detrahat acre virum:  
 Te damnans, quia me indignum tot laudibus ornas,  
 Quot Phoebi Vates condecorare decet.  
 Ipse quidem haud proprias illas agnosco, benigno  
 Indicia ast animi sunt mihi grata tui.  
 Tu virtute tua me fors metiris, & ima  
 Tellure implumem tollere ad astra cupis.  
 Sed male dum sequitur quondam vestigia patris  
 Icarus in praeceps decedit arte rudis.  
 Ergo ignota domi mecum mea musa senescat,  
 Et petere alta timens iam sine serpat humi.  
 Non tibi, qui doctae mereant praeconia vocis,  
 Deerunt, hoc quando lemma libenter amas.  
 Mi vero sat erit, si te pagella vicissim  
 Interdum memorem nuntiet esse mei.

In tumulum Alexandri Magni:

**C**ONDERIS exiguo Macedo rex magne sepulchro,  
 Cui pridem totus non satis orbis erat.  
 Terrarum victor, te vincere nescius ipsum,  
 Nunc mortem extinctus vincere posse negas.

In adolescentulum ense accinctum:

**C**VM tu fulgenti, Polydore, accingeris ense,  
 Quis te non ausit dicere Marte satum?  
 Qui vero forma tali te spectat inermem,  
 Cur dubitet, tibi sit quin Erycina parens?

FRAGRAN-



## In pallentes violas.

**F**RAGRANTES Viola, niueas queis pulchra papillas  
 Induct, ac molles cinget Hyella comas:  
 Palliduli causam vestri si fortè coloris  
 Vos roget, haec aliquo reddite verba sono.  
 Dum miser iratam deplorat Thyrsis Hyellam,  
 Crescentes tristi nos aluit lacryma.

Ad LAVINIAM FELTRIAM de Ruuere  
 Christophori Cefali nomine,  
 cum floribus sericis.

**H**Os humilis Cefali tibi flores hortulus offert,  
 Queis nitidas ornes, inclyta sponsa, comas.  
 Quanquam non ipsi Hesperidū, nec Adonidis  
 Digna queunt meritis mittere dona tuis. (horti  
 Usque adeo totum celebris tua forma per orbem  
 Quod pulchri est usquam vincit, & omne decus.  
 Verum illam eximijs animi virtutibus auctam,  
 Florentemq; bonis artibus, & studijs,  
 Quis stupeat satis, & merito veneretur honore?  
 Quis dignè valeat concelebrare stylo?  
 Scilicet egregios culta educat Umbria Cygnos,  
 Qui sublime tuum nomen ad astra ferent.  
 Fama etiam volitans calamos, & plectra ciebit,  
 Et Vatum quot habet Phoebus ubiq; choros.  
 Nemo tamen plenè numeroq; & sine carentes

N

Se



Alphonfus  
Felix Aua-  
los Valti,  
& Pitcariae  
Marchio.

*Se iactet laudes explicuisse tuas.  
Ac noua ne desint vnquam praeconia laudum,  
Ecce Hymenaeus adest omnia laeta ferens.  
Et claro Heroum prognatum sanguine sponsum  
Ominibus faustis nunc tibi ducit ouans.  
Aemulus ille patris iam nunc virtutis, auiq;  
Gnauiter excelsum culmen honoris adit.  
Sed quis me flores cursim per quadra legentem  
Ad sacra deduxit limina Pieridum?  
Incaute erranti vos castae ò parcite Diuae,  
En oculos retrò iam, referoq; pedem.  
Tu quoq; da veniam, LAVINIA, & ore benigno  
Suscipe quicquid id est hortuli, & ingenij.  
Sic tibi contingant tot gaudia, litus arenas,  
Et quot habet guttas aequor, & astra polus.  
Sic Deus, aeterno qui vos coniunxit amore,  
Te digna, & tanto coniuge prole beet.*

De GABRIELE PALAEOTO Cardinale  
prandente apud Carolum Sigonium.

**A**CCVMBIT mensae Sigoni GABRIEL, hoc est,  
Virtutem virtus officiosa colit.  
Ordinis eximij splendore illustrior ornat  
Hunc pietas, animi & candor, & ingenij.  
Insignem florente stylo, scriptisq; disertis  
Illum vel merito maxima quaeq; decent.

Gabriel



GABRIEL ergò viri obsequio dignissimus, atq;  
Sigoni tanto est Praefule digna domus.

Ad OCTAVIUM ACCOROMBONIVM  
Episcopum Forosempronien.  
affinium puerorum  
nomine.

**M**AGNA quidē, magne Antistes, te dona decerēs:  
Nos verò parui munera parua damus.  
Tu tamē accipiēs haec vultu admitte benigno,  
Hincq; etiam summi natum imitare Patris.  
Qui non magna sacram iactantes munera in arcam  
Laudavit; sed anus era minuta duo.

Ad CHRISTOPHORVM CEFALVM,  
cum Q. Horatij Flacci poematibus,  
Lambini cōmentarijs illustratis.

**Q**VANTI se faceres pridē, quāmq; vnicē amares;  
Semproni audierat Flaccus ab vsq; foro.  
Quare animi candore tui, ingenijq; lepore  
Ille etiam nunc te Cefale captus adit.  
Vestis squalorem contraxit frigore, & imbre,  
Sed tamen est toto corpore conspicuus.  
Hunc ergò excipiens gaude: nam laetor & ipse,  
Quòd fuerim vobis auctor amicitiae.



Ad CAMILLVM PALAEO TVM Senatorem  
Bononiensem de laudibus  
Ruris.

**V**ITA hominis, bene qui canos sibi cogitet annos  
Viuerè, ab Urbe procul laetus agellus erit.  
Villa vbi prospectans in colle assurgat amoeno,  
Et fontis vitream quercus obumbret aquam.  
Maturè huc adeat, superant dum corpore vires,  
Nec vincit validos tarda podagra pedes:  
Copia librorum mentem comitetur ab omni  
Explicitam cura, quam nitor Urbis alit.  
Mensa abiegnat toris hic longè praestet eburnis,  
Vasaq; concedant aurea fictilibus.  
Sint procul arte cibi nimia, sumptuq; parati,  
Nec parca expectet vina falerna sitis.  
Hortus, & ipsa cohors, succidia, & hirta capella,  
Vel lautas poterunt suppeditare dapes.  
Rusticus interdum vicino e flumine molles  
Pisciculos domino munera grata feret.  
Interdum leporem, aut deceptas arte volucres  
Deferet, incompto sedulus obsequio.  
Ipse domi certas studijs nunc diuidat horas,  
Liber in apricis nunc spatietur agris.  
Caelicolum regem supplex in vota, precesq;  
Saepe vocans, illo auspice cuncta gerat.  
Vere rosas errans, & per laetissima flores

Prata



Prata leget, passim dulce querentur aues.  
Aestiuos viridi Soles vitabit in umbra,  
Et quceret primi frigora opaca die.  
Mox dulces carpentem tuas spectare iuuabit  
Agricolam, & forti mitia poma manu.  
Tum vigil hybernas extendat lumine noctes,  
Et duras hyemes arceat igne focus.  
Interea absentes compellans carmine amicos,  
Laudibus in Caelum rura beata ferat.  
Interdum hospitio narrantem urbana sodalem  
Excipiens, memori plurima mente roget.  
Insolitos fasces, & ludum sortis inanem,  
Illius aerumnas audiet, huius opes.  
Tunc magis obfirmans vitam laudabit agrestem,  
Hanc colet, hanc regum praeferet imperijs.  
Cui sic continget senium traducere, porro  
Corporis atq; animi est tuta reperta quies.  
At tibi, patrone illustris, licet omnia laeta,  
Cedere & ad votum prospera cuncta precer:  
Non tamen haec adeo optarim liberrima ruris  
Ocia, ut urbe omni tempore abesse velis.  
Id tibi nec Genius, nec amicus suadeat auctor,  
Cui tuus in patriam sit bene notus amor:  
Qui vè tuam norit virtutem in rebus agendis,  
Quàm multos opera, consilioq; iuues.  
Culta igitur quamuis vario Argentina lepore  
Gestiat assidue te retinere sinu:

Ros Palae-  
torum.

Eme-



Emeritum senium, & longos cum laude labores,  
 Clarorum & memorans facta imitanda virum:  
 Propositi tamen ipse tenax hoc adde sequendum  
 Ciuibus exemplum, magne Camille, tuis.  
 Publica priuatae nempe anteferenda quieti  
 Commoda, dum recte membra, animiq; vigent:  
 Haetenus ergo pater conscriptus rura frequentes,  
 Curia ne absentem, ne doleat vè cliens.  
 Discat & hunc vitae duce te seruare tenorem,  
 Qui patriae ex animo dicier optat amans.

Ad eundem.

**T**V nimium tardos reditus miraris: at ipse  
 Miror quî potui tam rediſſe citò.  
 Non ostentat enim multas hinc inde cupressos,  
 Pinus vè hospitibus laeta Croara suis:  
 Sed plenis calathis ficus apponit, & vuas,  
 Unde tibi haec etiam cista Patrone venit.  
 Ruris amatori quam mittit ruris amator  
 Ghisellus, tam vir, quàm citharista, bonus.

Rus.

Hierony-  
 mus Ghi-  
 sellus.

Epicedium in funere CAROLI SIGONII.  
 Qui obiit 28. Aug. 1584. annum agens 63.

**C**ARMINIBVS ne tuū, doctissime Carole, funus  
 Prosequar, an lacrymis? Undiq; namq; mihi  
 Surgit materies ingens. quî triste feretrum  
 Eualeam siccis cernere luminibus:

Corpus



Corpus ubi exanimum, vegetoq̃ carentia sensu  
 Tam cari capitis, hei mihi, membra iacent?  
 Quis illud potero, unde avidus pendere solebam,  
 Aspicere os clausum, perpetuoq̃ silens;  
 Et moesto gemitu, ac largo non prodere fletu,  
 Viscera quàm saeuus torqueat ima dolor?  
 Os quondam eloquij flumen, sic diuite vena  
 Manans, Eridani iugis ut vnda fluit.  
 Nunc aestu nimio morbi siccaris acuti,  
 Nos verò miserè torret anghela sitis.  
 Nec minus illa mihi moerorem languida praefert  
 Dextera, tam celerem docta mouere stylum;  
 Dum subit, heu scriptis quot iam spoliabitur orbis,  
 Heu quanto historiae lumine cassus erit.  
 Ast ego tristitiae si causas persequar omnes,  
 Illacrymem frustra, discrucierq̃ nimis.  
 Forsan & haec adeò lugubri naenia cantu  
 Nequaquam est animae, Carole, grata tuae.  
 Quae nunc exultans terrenis libera vinculis  
 Gustat caelestis gaudia summa chori.  
 Sic sperare iubet tua non ignauiter acta,  
 Et recti, & sancti vita pudoris amans.  
 Et quae decumbens extremò signa dedisti  
 Chisticolae gestu, voce, oculisq̃ p̃ij.  
 Haec si quidem repetita tuos solantur amicos,  
 Hincq̃ benè esse tibi commemorare iuuat.  
 Scilicet immitis propellere spicula mortis,

Seruus



Serius, aut citius quin feritura cadant,  
Haud generi humano concessum: sternimur omnes;  
Hac homines nati conditione sumus.  
Ipse etiam Caeli rector (mirabile dictu)  
Carnea membra gerens, Virgine matre satus,  
Laethales ictus excepit sponte: quis ergo  
In terris vitam non moriturus agat?  
Cui verò fuerit cursus cum laude peractus,  
Et palma, & requies hunc sine fine manet.  
Hoc opus, haec omnis nostrorum est summa laborum:  
Vae qui diuerso tramite carpit iter.  
Nos igitur iam nunc te praemia remur adeptum,  
Tum proprijs meritis, tum miserante Deo.  
Siquid & obstat adhuc, te iusta haec ritè soluta  
Credimus, ac humiles posse iuuare preces.  
Atq; ita dum prodesse tibi certabimus omnes,  
Tristitiae id nobis dulce leuamen erit.  
Nec iam te amissum, sed praemississe feremus,  
Ac velut absentem noster adibit amor.  
Quin tua vel semper nobis praesentia sistet  
Ora, & te nostris inseret alloquijs.  
Praeterea magnum solamen gloria praebet,  
Quae clarum sequitur nomen ubiq; tuum.  
Et quae priscorum melioribus aemula scriptis  
Panxisti egregio tot monumenta stylo.  
Haec magis atq; magis per saecula futura vigebunt,  
Sicq; tui magna parte superstes eris.

Quis-



Quisquis enim Latij cultor sermonis auebit,  
 Romani antiquum noscere ius Populi,  
 Atq; magistratus, leges, subsellia, vestes,  
 Et fastos miris cuncta notata modis:  
 Perdiscet facile, tua docta volumina versans,  
 Grandis & ingenij grande stupebit opus.  
 Attica item nobis per te Respublica nota est,  
 Iudaeae & mores, priscaq; sacra patrum.  
 Quid dicam Italici historias quanto ordine Regni,  
 Et studio occidui scripseris Imperij?  
 At numerare tuos, longum est, quos perlegit orbis  
 Iam libros, vel quos haecenus arca tegit.  
 Prodibunt omnes: quis enim sic inuidus ausit  
 In commune bonum non referare manus?  
 O me felicem, cui iam percurrere partem  
 CAROLE te viuo, teq; iubente datum est.  
 Vsque adeo mihi largus eras, & comis amicus,  
 Quo mage par fuerit, sim memor ipse tui.  
 Sed videt ille meam, qui nouit & omnia, mentem.  
 Fors Caeli e specula tu quoque cernis eam.  
 Nomen ibi, & tua sic infixum manebit imago,  
 Ut non insculpi firmitus ere queat.  
 Hi vero exigui versus me vtcunq; supremum  
 Munus amicitiae praeteriisse negant.  
 In eiusdem effigiem.

COTIDIE plures homines nascuntur, at vnum  
 SIGONIVM raro secula plura ferunt.

O

EXIGVOS



## AD BALTHASAREM FINIVM.

**E**XIGVOS numero, at multo candore refertos,  
 Undiq; & undantes nectare, & ambrosia,  
 Accepi exultans, FINI dulcissime, versus  
 Sincerae gratum pignus amicitiae.

O quae, illos relegend, tacite sum corde locutus,  
 Dum mentem inde tuam miror, & ingenium.

Illam tam nostri memorem, crebrisq; benigne  
 Certantem officijs me cumulare suis.

Hoc adeo praestans, & carmina pangere felix  
 Perlepidò, ac facili, multipliciq; stylo.

Tum mea, quae longas possent implere tabellas,  
 Annuerat grates dicere Musa tibi.

Saepius at dudum rescribere plura parantem,  
 Et verba, & numeri, deficiuntq; modi.

Sic mihi desuetudo, & mollis inertia sensim  
 Castali gustum surripuit laticis.

Si tamen illo unquam tinxì labra arida fonte,  
 Illius aut me ullo tempore cepit amor.

Tu verò ne dum haec oculis, sed acumine mentis  
 Lustrans, pagella perlege multa breui.

Vincentius Praesertim hoc unum (GERIO mihi teste vicissim)  
 Gerius Pi Quod totus iam animo sum, studioq; tuus.

Acrienfis.

In horologium Solare.

**N**EQVIVQVAM Solis cursu speculatur, et horas,  
 Quisquis inutiliter tempus abire sinit.

DESINE



AD IULIVM CÆSAREM IOANNINVM.

**D**ESINE mordaci contractam frigore Musam  
 Carminibus crebris sollicitare meam.  
 Quin potius fomenta mihi impertire poesis,  
 Quae solet in Veneto condere cella cado.  
 Cretica namq; hodie dederis si vina, trecentos  
 Versiculos summo cras tibi mane dabo.

De Vite Cupresso adiuncta.

**L**ETHIFERA en etiã gaudet te Bacche Cupressus,  
 Et tua se circum serpere dona finit.  
 Forsitan inuisum gestit deponere nomen,  
 Laetior & fieri palmite iuncta tuo.

Citrus arescens sub Cupressu:

**S**I mihi lethalis superimminet arboris umbra,  
 Quid mirum, non me posse virere diu?

In Laurum.

**E**T serere hanc laurũ, & crescentẽ Phoebe tueri,  
 Haecenus Antiphili sedula cura fuit:  
 Dum potuit sperare, nouis ut versibus olim  
 Emerita hinc victorserta referret Acon.  
 Sed quoniam ille tuas artes, & praemia spernit:  
 Pace tua haec anibus postmodò nidus erit.



Aliud.

**H**ANC iterum Antiphili seruat custodia laurum,  
 Et ferrum, & nocuas hinc vigil arcet aues.  
 Quādoquidē ad magnas illū spes firmat Aconis  
 Ingenium. hoc etiam sit tibi Phoebe ratum.

Aenigma de Iusculo concreto, vulgo dicto,  
 Gelatina.

**P**RI MV M durus erā neruus: dein munere Bacchā  
 Mollitum condit me crocus, atq; piper.  
 Tum nitidae Veneris teter fuligine coniux  
 Dissoluens in ius me violenter agit.  
 Iupiter at gelidus rursus constringit in unum,  
 Perspicuumq; vitri donat habere decus.  
 Ingluuias. Demum Scylla vorax rabido sub gurgite mergit.  
 Quòd si me inuenies, Oedipus alter eris.

Ad AVGVSTINVM BRVNVM.

**G**VR Carneualet tempus geniale vocemus,  
 Quaeritur, & quidnam vox velit ista sibi.  
 An quia tunc venit caro carius? improba quādo  
 Ingluuias Ventrem tunc mage carne replet?  
 An quia post paulò ieiunia sacra recurrent,  
 Quo sanos vesci tempore carne nefas:  
 Non secus ac dulcem si quis dimittat amicum,

Dicimus



*Dicimus & carni, iam caro amica vale.*  
*An quia ( & haec utinam ratio non verior esset )*  
*Tunc validae carnis praeualeat imperium?*  
*Ipsam hominem, ritu Patrum, voco nomine carnis:*  
*De pecudis tantum non ego carne loquor:*  
*Haec caro quid valeat; quae de illis cura diebus*  
*Sit potior, cuius satq; superq; patet.*  
*Nec mihi nunc animus Satyræ contexere suadet,*  
*Conscia quem miserè propria culpa premit.*  
*Sed passim dat signa caro, tunc oppida & agros*  
*Ut vexet foedis imperiosa modis.*  
*Haec tibi, BRVNE, Gigas ludebat seria; nunc tu*  
*Candidus imperti, si melius quid habes.*

IVLIANI GIRALDI AD ANTONIVM GIGANTEM.

**T**EMPORIS antiqui, sileat fera turba Gigantum:  
 Nam novus est nostro fortior orbe Gigas;  
 Magno illos magnas habuisse in corpore vires,  
 Montibus & Montes imposuisse ferunt;  
 Non potuere tamen veluti mens vasta ferebat,  
 Culmine Sidereas exuperare domos;  
 Hic, animi egregio praeclarus robore, Montes  
 Montibus impositos, sic super alta tulit,  
 Sidereum ut superent orbem, penetrarit & ipse  
 Sidereas sedes, Sidereasq; domos;  
 Ergo nouo antiqui cedant nunc iure Gigantes,  
 Cedere quando animo corpora iure decet.

QVALIS



Ad IULIANVM GIRALDVM.

**Q**VALIS qui solitus quondam florente iuuenta  
Ad strepitum citharae molle mouere latus.  
Mox senio inualidus iuuenum si forte choreas  
Spectet, vel notos hauriat aure sonos:  
Saltantum gestus animo comitatur, & ore,  
Nunc humeros quassat, nunc pede pulsat humum.  
Talis & ipse tuae ad cantum, GIRALDE, camoenae  
Haec lusi calamo carmina pauca rudi:  
Pro numeris numeros utcunq; referre vicissim  
Dum conor: vetuit nam reticere pudor.  
Agrestis siquidem speciem praeferre videbar.  
Ni tibi amicitiae mutua signa darem.  
Sunt tamen ista tuis longè inferiora, sed aurum  
Ferrea nequaquam fundere vena potest.  
Quòd si aliquis nimium blandus, nomen vè Gigantis,  
Grande sonans, at vim Pumilionis habens  
Imposuit tibi, quo sublimem ad sidera tolli  
Censueris dignum, qui malè serpat humi:  
Haud tu te falles, iuuenis lectissime, si me  
Totum animo, ac studio reberis esse tuum:

Ad FABIVM ALBERGATVM,  
 virum clarissimum.

**F**ELIX, qui laxas linguae moderatur habenas;  
 Sermo ut inutiliter nullus ab ore fluat.

Atque



Atqui ego non is sum, vir praestantissime. quin ò  
 Felicem, haec si me noxia sola premat.  
 Quòd si sollicitus, nostri cùm docta Sigoni  
 Conquereret nimium scripta latere diu,  
 Dixi aliquid, tibi quod fuerit fortasse molestum?  
 Poenitet, ac potius conticuisse velim.  
 Me tamen ingenua credas tunc mente locutum;  
 Quamquam animi haud semper promere sensa decet.  
 At veniam tandem poscens errasse fatebor,  
 Et quiduis faciam, perpetiarq; libens:  
 Dum nec amicitiae vinclum res ulla resoluat,  
 Mutuus in nobis nec minuatur amor.

## In Obeliscum Vaticanum.

**I**MMENSÆ molis lapidem, quem magna secundo  
 Erectum tanto Roma stupore videt:  
 Auricomum votum Phoebæ sacrauerat olim  
 Fertilis Aegypti vana superstitio.  
 Tempore post longo Tyberina ad litora vectum  
 Augustis patri Caius, auoq; dicat.  
 Sed meliore pium auspicio translatus in usum,  
 SIXTI operum QVINTI postmodò testis erit.  
 Felici imperio cuius surgebat in ampla  
 Hac platea, extollens signa beata Crucis.  
 Dum Princeps idem purgat latronibus agros,  
 Et Vaticanas prouidus auget opes.  
 Atq; vias sternit maiora ad templa patentes,

Longin.



104 ANTONII GIGANTIS

Longinquo & priscas fonte reducit aquas;  
 Dumq̃ alios Vrbi ornatus molitur, & Orbi,  
 Maxima solerti commoda mente parat.  
 Hae tibi semper erunt artes, Pater optime SIXTE,  
 Haec studia ingenij sunt memoranda tui.  
 Sic ille in terris felix tibi proroget aeuum,  
 Claudere qui Caelos, & reserare dedit.

LATINO LATINIO ALOYSIVS AMORINIVS.

Camillus  
Palaeorus. QVAS tulit apricis Argenti villula campis,  
 En oleae, ne sperne, tui sunt dona Camilli.

LATINIVS AMORINIO.

IMMATVRA nimis lecta est, me iudice, oliua,  
 Argentina mihi quam misit, grata Camillo.

AMORINII nomine ANTONIVS GIGAS.

DVLCIS ab ore fluit sermo tibi, dulcis & ipse  
 Es totus, sunt & dulcia amica seni:  
 Hinc gustum exiguus tibi torfit amaror oliuae;  
 Quem tamen Hispanus, totaq̃ Roma probat.

LATINIVS.

NVLLVS inest oleis, qui nos offendat, amaror,  
 Sed quae dura nimis, sicca, & acerbata caro est.  
 Quam vix conficiunt praestantes robore dentes,  
 Aut possunt tenuem demere ab osse cutem.

Quae



Quae si post paulò legeretur adultior, esset  
 Grandior ipsa caro, gratior ipse sapor.  
 Hanc facile & dentes iuniorum, & pigra senectus  
 Conficeret, genitis viribus orba licet.  
 Haec si seruetur ratio, maturior ipsa  
 Protinus haerentem respueret nucleum.  
 Dulcior ac tenero fieret de corpore gustus,  
 Et sapidae carnis copia grata magis.  
 Pendeat in finem librae satura ubere matris  
 Filia, si nostrum consilium sequeris.

## GIGAS.

**T**ANDEM Argentinae didici quid desit oliuae,  
 Dentibus atq; tuis cur minus apta fuit.  
 Quòd tamen ante aliter sensi, sit amabilis error,  
 Quin male opinantem poenituisse piget.  
 Nomine quandoquidem hoc rursus tua carmina legi,  
 Quae plura ut numero, sunt mihi grata magis.  
 Ibunt & nostro gratissima dona Camillo,  
 Qui magni, ut semper, te facit, atq; tua.  
 Excipietq; libens oleae praecepta legendae,  
 Non secus ac magnus si daret illa Maro.  
 Cernere iamq; illum videor per aprica vagantem  
 Rura, oleam, flores quae magè laeta ferat,  
 Designare oculis, tum sic mandare colonis:  
 Huic cultum, huic animos, huic adhibete manus,  
 Grandior ut foetus sit; sed postrema legatur;

P

Edicam



Edicam vobis ipse, ubi tempus erit.  
Dein bacas ritè ancillis curare iubebit,  
Nec spernet coniux ipsa ministerium.  
Vi quas tam lepidò praescribis carmine dotes,  
Lecta suo referat tempore oliua tibi.  
O vi nam praesens Paleoto haec dicere posses,  
Inq; Argentinis collibus ire comes.  
Gaudia quanta forent: ut eum ostendisse iuaret  
Multa, ibi quae solers est operata manus.  
Ordine dispositas plantas, topiaria, & hortos,  
Prospectu & vario comp. ta, quadra, vias.  
Tum pinus longa serie passim, atq; cupressos,  
Quantas Felsineus non ager omnis alit.  
Inspiceres & apum vitrea illa aluearia, scriptis  
Mellifluis pridem concelebrata tuis.  
Denique ni tabulas illic, & signa requiras,  
Aut largos fontes, marmoreasue domos:  
Te villae, atq; agri modus oblectaret amoeni,  
Et cultus simplex, munditiesq; loci.  
Omnia in obsequium tibi tunc gestire videres,  
Et fieri aduentu cuncta ibi laeta tuo.  
Sed quid ego Argenti nimio plectus amore  
Te Pater illepida garrulitate moror?  
Cur desiderio grandaeuum instigo recenti,  
Inualidum & longas hortor inire vias?  
O saltem liceat mihi te quandoque per Urbem,  
Pratensi aut tecum rure LATINE frui.

Cuius



Cum tepidi referet tibi vires aura Fauoni,  
 Et pratis flores, arboribusq; comas.  
 Ut dulci alloquio dulcis recreabor amici,  
 Quo caruisse diu saeva coegit hyems.  
 Nuncq; etiam obsistunt operosa negotia, ne te  
 Saepius inuisam, conueniamq; domi.  
 Sed tunc praesentes dicemus plura vicissim:  
 Mutuus interea saepe loquatur amor.

## LATINVS.

I AM tua dulce sonans numeroſo carmine Muſa  
 Me, fateor, tandem reddidit Harpocratem.

## LATINVS.

SI in pugnam reuocas ſenem  
 Iam pridem ſterilis carminis aridum.  
 Ut victor referas tamen  
 Cedentis ſpolia, ecquid tibi gloriae  
 Hinc ſperare potes nouae?  
 Cum te Romulidum nobilium chorus  
 Vnum cenſeat aemulum  
 Iam nunc, quos celebrat fama ſuperſtites,  
 Priſcorum merito, ac parem?  
 Quare parce, precor, vincere debilem  
 Conſectum ſenio virum,  
 Et fortis validum carmine prouoca.



GIGAS.

**D**Vm tu ais Harpocrates fio, facunde Latine,  
Me tacite inclamas, Cherile dure tace.

GIGAS.

**N**ON, si carmine prouocem  
Cultorem Aonij vel minimum chori,  
Sparsas canicie comas  
Sperarem viridi cingere laurea:  
Qua te ergo Pater audeam  
Spe, quo consilio sponte lacessere,  
Tot virtutibus inclytum,  
Et palmis toties clarum Heliconijs?  
Ah ne magnanimum sinas  
Vt cor suspicio tam subeat leuis.  
Quod si nostra loquacibus  
Aures Musa tibi versibus obtudit:  
Indulge facilis, precor,  
Poscenti veniam: siue seuerior  
Multiandam fore censeas;  
Quicquid protuleris, perferet ac lubens.

LATINIVS ad se ipsum.

**Q**VAM per Amorinum deceptus nomine pugnam  
Credideras ortam, dum leuis illa fuit,  
Haec tibi cum valido verè est suscepta Gigate,  
Cui



Cui quamuis validus, par tamen esse nequis:  
Si sapis ergo manus iam nunc da sponte Giganti,  
Ne victus media turpiter Vrbe cadas.

GIGAS ad seipsum:

**D**ONEC Amorini poteram latitare sub armis,  
Audebam validum segnis adire virum.  
Nūc quādo in cāpū vocor, et certamen apertū,  
Non sum, qualis eram, fronte, animoq; Gigas.  
Quò me igitur vertam? Vestigat cuncta Latinus:  
Nempe est difficilis res, dare verba seni.

GIGAS.

**G**ARRULA sic quōdā Cygnū obiurgabat hirūdo,  
Dum circum fluuios haec volat, ille canit.  
Cur tu non hominū coetus, & tecta frequētas,  
Horrida sed vitam per loca solus agis?  
Si cantu polles, atq; hoc te nomine iactas,  
Cur nunquam resonat cantus in Vrbe tuus?  
En ego te multò duco ciuilior aeuum;  
Nam siue in parua nidificare domo,  
Seu libet in magna, aut Regum laquearibus aureis,  
Seu Diūum in Templis, omnia tuta patent.  
Ipsos praeterea mortales saepe salutans,  
Leniter oblecto gutturis arte mei.  
Vix illi Cygnus, quamuis responsa negare  
Maluerit, dulci talia voce refert.

Quām



Quàm libet obnixè studeas urbana videri,  
 Non tamen inde tibi conciliatur amor.  
 Quin grauis in te omnes odij dant signa, modisq;  
 Mille aditu prohibent te, domibusue fugant.  
 Et famulae oderunt, quando labor additur illis,  
 Tergere quae impuris obruis ipsa notis.  
 Quòd si aliqui te impune sinunt volitare per aedes,  
 Non querulae haec laus est vocis hirundo tuae;  
 Mitis at illorum ingenij: cùm te tamen Ultrò  
 Nemo blanditijs in sua tecta vocet.  
 At mea conditio tanti est, vi saepe relictà  
 Vrbe homines syluas, stagnaq; sponte petant,  
 Longa audire modos dantem per colla canoros:  
 Quanquam haec inuitus te simulante loquor.  
 Nunc quid fabellae tandem sub imagine priscæ  
 Me tardum ingenio Pieri cara mones?  
 Nunquid vt inculto doctum vexare Latinum  
 Carmine desistam? dic, precor, istud agis?  
 Annuis, agnosco id signantem in fronte pudorem:  
 Atqui non surdis auribus ista canis.  
 En calamum pono, rauca vt cornice silente  
 Postmodò more suo concinat albus olor.

AD ASCANIVM LIBERTANVM  
 Callensium Episcopum.

A SCANIVM viridi insigniuit Roma galero,  
 Fama volans Patriae nuntia laeta refert.

Publica



Publica laetitiae confestim signa parantur.  
 Hinc pulsa ex altis turribus aera sonant.  
 Inde caua ingenti reboare metalla fragore,  
 Igne micare vias, luminibusq; domos.  
 Sacra cohors, populusq; frequens concurrat in aedem,  
 Inq; vicem laudant organa, & ora Deum.  
 Et LIBERTANAE stant passim insignia gentis,  
 Illiusq; decus quisq; suum esse putat.  
 Tum verò affines quo sensu credis, & ore  
 Cernere, & audire haec nos potuisse tuos.  
 O dilecte mihi, ut semper, iucundeq; frater,  
 Nunc etiam ò domine, ac mî venerande Pater?  
 Foemineas voces tecum ipse, & verba, precesq;  
 Iubila, lacrymulas & meditare pias.  
 Praecipue nostras optant nunc viuere Matres,  
 Laetitiamq; simul participare nouam.  
 Ipse quidem tot laeta videns, laetissimus ad te  
 Mente adij, laeto plurima corde loquens.  
 Nuncq; eadem breuiter laeta dictante Camoena,  
 Absentem absenti significare iuuat.  
 Nempe tibi ex animo oblatum gratabar honorem,  
 Quem te gaudebam iam meruisse diu.  
 Namq; (utcumq; alij credant) haec gloria summa est,  
 Virtute, ac meritis anticipare decus.  
 Gaudebam & campum modò te reperisse patentem,  
 Quo tua se pietas exeret inde magis.  
 Et candelabro velut alto imposta lucerna,

Dispellis



Dispellit tenebras, exhilaratq; domum;  
 Sic te Callensi iam cernere in Vrbe videbar,  
 Voce, opere, exemplo cominus, atq; procul  
 Fulgentem, ut plures tua per vestigia rectum  
 Ad superas arces ingrediantur iter.  
 Scilicet hoc opus, hoc studium, atq; haec sedula cura  
 Mox tibi commisso pro grege Pastor erit.  
 Unde ouium maior numerus caelestia carpas  
 Pabula, & aeternae flumina potes aquae.  
 Actibi supremo in censu Rex CHRISTVS honorem  
 Ampliet, & stabili det requiete frui.  
 Interea validum te mente, & corpore seruet,  
 Fortior ut sacrum munus obire queas.

De ANNIBALE MARESCOTO Excellentiss.  
 Iuris Conf. Bononien. ad Firmanum  
 Gymnasium euocato.

**Q**VAE regio tantum splendorem protulit orbi,  
 Nedum Romae ingens, Italiaeq; decus;  
 Illa etiam, par est, cumuletur ut undiq; honore.  
 Quo magis Piceni fama celebris eat.  
 Maximus hinc SIXTVS, patriae telluris amore,  
 Munera gratus ei magna subinde refert.  
 Quodq; alijs praestat, studiorum, nobile Firmum,  
 Gymnasio illustrat te, titulisq; nouis.  
 Nimirum felix Alti vicinia Montis  
 Addidit haec meritis nunc decora alia tuis.

Ergo



Ergo Marescottom doctrina & sanguine clarum,  
 Et culti insignem dotibus ingenij;  
 Qui patriam pro te linquens, carosq; parentes,  
 Ad cathedras properat iussus adire tuas:  
 Excipe vel gaudens, & sponte, diuq; cupitum  
 Certatim studijs, officijsq; cole.  
 Quandoquidem sese quicquam praestantius illo  
 Felsina docta tibi mittere posse negat.

Ad CAMILLVM PALAEO TVM Senatorem Clariss.  
 Conuiuio excipientem multos doctrina  
 insignes viros, cum floribus sericis  
 à Francisca Fontana  
 Excellentiss. Vlyssis Aldrobandi vxore  
 dono missis.

**A**ONAS in montes cū primum nuncia venit,  
 Fama, ferens tantos hūc coisse viros.  
 Doctrina, ingenio, calamo, et sermone potētes,  
 Quot, qualesq; alibi non habet vlla domus.  
 Mira chorū Thoebi subiit, dulcisq; voluptas,  
 Quam non vlla hominum lingua referre queat.  
 Certatimq; nouem coeperunt laude sorores  
 Cultorem in Caelum tollere quaeq; suum.  
 Legibus hic, Sophia ille valet, valet ille medendi  
 Arte, hic astronomus, ille poeta bonus,  
 Deniq; cunctorum decies repetita vocarunt  
 Nomina cum plausu: laus sua cuiq; fuit.

Q

Patronum



Patronum verò coetus, doctumq̃, probumq̃  
 Omnes laudabant ore, animoq; simul.  
 Tum Phoebus; Quonam ille igitur donatus honore  
 Se nobis hodie tam placuisse sciet?  
 Dixit, & hanc laurum, quam circum symbola Musæ,  
 Et flores manibus composuere suis,  
 Extemplo huc iussit me ferre, & pauca profari:  
 Ergò alacri munus, verbaq̃ fronte cape.  
 Iure tibi hæc arbor Paleote diserte dicatur,  
 Haud ullo virides tempore tonsa comas;  
 Nam tu virtutis cultor, virtutis amantes  
 Usq; foues, magni pendis, amasq̃ viros:  
 Quo plures igitur carpent hinc te auspice sarta,  
 Hoc meriti fuerit plus, decorisq̃ tibi.

AD IULIUM CAESAREM LALATAM  
 Priorem Parmensem.

**Q**UAE res, quod studiū, series quàm lōga dierū,  
 Conciliet, foueat, firmet amicitiam:  
 Edoceat, veterum referens præcepta sophorum,  
 Doctrina insignis BALDVS, & ingenio.  
 Me iuuat interea, illustris LALATA, probare,  
 Quae tu perlepidò stringis epistolio.  
 Nempe quòd exiguo licet ortus tempore, & usu,  
 Sit noster tanti, quàm diuturnus amor.  
 Mutua namq; breui potis est implere voluntas,  
 Quod multi poterant apposuisse dies.

Quam

Camillus  
 Baldius Ex  
 cellen. Phi  
 losoph. Bo  
 non.



Quam praefers igitur mentem in me spontè benignam,  
 Laudo, & amo, ut par est, excipioq; libens.  
 Iucundè & semper mihi lux memorabitur illa,  
 Cernere qua primum te, alloquierq; datum est.  
 Nobilibus iuuenem studijs, & sanguine clarum,  
 Moribus at iam nunc, & gravitate senem.  
 Quod nisi te fuerim redamare obstrictus amantem,  
 Virtutis merito cogar amare tamen.  
 Illius siquidem vis tanta est, ut quoq; possit  
 Absentum mirisnectere corda modis.  
 Quare & nostra tibi venit haec pagella vicissim,  
 Sincerae, ac stabilis pignus amicitiae.  
 Sicq; velim credas, quidvis prius esse futurum,  
 Quàm te diuelli pectore posse meo.

In Musæum Excellentiss. Philosophi VLYSSIS  
 ALDROBANDI Bonon.

**N**ATVRAE, atque artis tot rerum millia in vna  
 Res certè mira est, cernere posse domo. (ptu.  
 Sed magè mirandū est, haec vnius omnia sum-  
 Ingenio, ac studio parta fuisse viri.  
 Quòd verò haec vnus simul omnia mente recondat,  
 Multipliciq; memor nomine, quaeque vocet;  
 Ut videt, atq; stupet praesens, sic forsitan etas  
 Postera narranti est agrè habitura fidem.  
 Cuncta tamen cunctis haec ALDROBANDVS VLYSSES  
 Re, voce, & calamo vera fuisse probat.

Q 2 QVI



## Aliud.

**Q**VI miranda cupit Naturae plurima nosse,  
 Non opus est, longum currat anhelus iter.  
 Museum hoc tantum lustret, dominoq; docete,  
 Qui voce, & scriptis quemque iuuare studet,  
 Tot rerum addiscat formas, & nomina, Graij  
 Quot norunt, Arabes, Hesperijq; simul.  
 Inde abiens dicat, verè orbis totius instar  
 Docti Aldrobandi mî domus vna fuit.

Ad GABRIELEM PALAEO TVM S. R. E.  
 Cardinalem, & Bononiæ Archiep.  
 In obitu Camilli maioris  
 natu fratris.

**N**ON quia praeclari fratris te morte dolentem;  
 Concussam ve adeò, suspicer esse, Pater;  
 Molli vt amicorû indigeas solamine vatum,  
 Nostra ideò nunc te musa licenter adit.  
 Quin magis vt sese moerori obsistere inertem,  
 Discat ad exemplum composuisse tuum.  
 Nimirum exterius vultum, scio, cernet eundem;  
 Isq; habitus index interioris erit.  
 Multa vbi germani virtus, probitasq; recurrens,  
 Tristitiae, & curis non sinet esse locum.  
 Nam bene pro patria exhaustos memorare labores

Dum



Dum iuuat, & purè vita peracta subit:  
 Illi etiam aeternam spe designare quietem,  
 Praemiaq; in caelo, fas erit, atque pium.  
 Qui verò haec animae contingere credat amicae,  
 Cur gemitu cruciet cor, lacrymis vè genas?  
 Nunquid eam cupiat moribunda in membra reuerti,  
 Et plenum ærumnis currere rursus iter?  
 Sed te plura sacrae Sophiae de fontibus hausta,  
 Mente, reor, placida voluere, & ore loqui.  
 Qualia nempe decet vir sentiat intus, & extra,  
 Cui ratio praeses cordis, & oris erit.  
 Tu tamen aduersis rerum constantis in vndis  
 Pectoris, haud primùm nunc documenta dabis.  
 Non ignota loquar: siquidem reminiscor, ut olim,  
 Fortiter Eustorgi funera pertuleris.  
 Cùm tu alios potius solando; Afri illa subinde  
 Verba recenseres Praesulis eximij;  
 Qui veluti amissos nobis non esse monebat  
 Lugendos, quos mors omnibus æqua rapit.  
 Sed mage laetandum illis ad caelestia regna  
 Praemissis, viuunt summo vbi cuncta Deo.  
 Nuncq; mihi illa tuae vocisq;, & frontis imago  
 Sic animo occurSAT, auriculasq; ferit;  
 Vt desiderio tanti licet angar amici,  
 Lenimen praesens hauriat inde dolor:  
 Praesertim cùm tu vigeas Patrone superstes,  
 Praecipuum nostri praesidium, atq; decus.

Minor na-  
eu frater.

S. Cypria-  
nus de mor-  
talitate.

Quem



*Quem Romae, & patriae donis caelestibus auctum.  
CHRISTVS, & incolumem det superesse diu.*

In obitu clariss. viri CAMILLI PALAEOTI  
Senatoris Bonon. qui obiit  
die 6. Martij. 1594.

**H**IC PALEOTE iaces, illustri functe senecta,  
Et magnis magnae muneribus patriae.  
Nunc tibi quae aeternū cōtingāt prēmia, vita  
In commune bonum nauiter acta docet.

Aliud.

**C**VM tua vel studijs virtus, vel rebus agendis  
Te mille ornaret laudibus, ac titulis;  
Tu tamen hoc vno vixisti, & laetus obisti,  
Quòd peramans patriae nomine, req; fores.  
Iure igitur testantur idem monumenta sepulchri,  
Praeq; ferunt paucis multa legenda notis.

Aliud.

**Q**VO tua vita fuit compluribus utilis, hoc te  
Plures extincto nunc Paleote gemunt.  
Patria praeclarum Ciuē, Columnenq; Senatus.  
Patronumq; cliens, hospes, inopsq; dolent.  
Teq; Academiae fautore queruntur adempto,  
Et quisquis Phoebi est cultor, & Aonidum.  
Deniq; amicorum gemitus, fletusq; tuorum

Tam



*Tam multos, calamo quis memorare queat?  
Sic bene de cunctis te promeruisse iuuabat,  
Et carus viuens omnibus vnus eras:*

Ad OCTAVIVM BANDINVM  
Prolegatum Bononiæ.

**Q**UICQVID sacrapij's animis solennia Paschæ  
Interius pacis, laetitiaeq; ferunt;  
Vt tibi discupio longos contingere in annos,  
Sic Deus omnipotens annuat esse ratum.  
Externum verò decus, & virtutis honores,  
Non tam aueo amplificet maxima Roma tibi,  
Quàm laetor, iam te pridem Bandine mereri:  
Namq; probi haec verè est gloria summa viri.

In Amicos donis, salibusq;  
inter se certantes.

**N**OBILE amicorū par, quales cādida Virtus,  
Et sancta aeterno iungit amore fides,  
Dum lepidis certat donis, salibusq; vicissim,  
Complures sellas cūm daret alter, ait.  
Vnam maluerim tibi sedem aptare merenti,  
Qua residens toto summus in orbe fores.  
Arcam alter donans, clauem praemisit, & inquit,  
Hanc cape nunc, geminam post tibi Roma dabit.  
Sic paribus votis animae laetantur amicae,  
Inq; vicem officijs se, studijsq; fouent.

PERETE



Ad ANDREAM PERETTVM Collegij Montis alti  
Rectorem. Bononiæ.

**P**ERETTE Illustris, te SIXTI sanguine Quinti  
Quisquis vel tantum nouerit esse satum:  
Magna animo de te & studijs, & rebus agendis  
Concipiet: nec spe res erit ipsa minor.  
Qui verò moresq; tuos spectarit, & actus,  
Audieritq; graui verba lepore lita:  
Hoc regimen, tibi quod felix, faustumq; precamur,  
Non modo par meritis sentiet esse tuis:  
Sed quodcunq; olim tibi deferet inclyta Roma,  
Iam nunc te dicet promeruisse decus.

In sacram effigiem S. FRANCISCI.

**F**LAGRARIT quanto CHRISTI Franciscus amore,  
Vberius calamo Stigmata sacra docent.

In effigiem IGNATII LOIOLAE Institutoris  
Societatis IESV.

**I**GNATI Venerande, tuæ pietatis alumnos  
Humanum utiliter spectat ubiq; genus.

In effigiem PII Papæ Quinti.

**P**ONTIFICVM prisci exemplum venerabile seclî  
QVINTVS hic est verè nomine, req; PAVS.

QVA



In effigiem VRBANI Papae VI.

**Q**VALIS hic in Petri solio, quantusq; fuisset,  
Vita ante acta docet, sobria, iusta, pia.

In effigiem STEPHANI Regis Poloniae.

**N**AE Regale tibi decori est diadema; sed ingens  
Addis ei eximijs dotibus ipse decus.

In effigiem ALEXANDRI Card. Farnesij.

**M**AGNUM magna decent: hinc tu quoq; grãdia sem-  
Molirisq; animo, munificaq; manu. (per

In effigiem GASPARIS Card. Contareni.

**N**ON minus illustrem tua te facit inclyta virtus,  
Quam Toga Romano murice tineta sacro.

In effigiem REGINALDI Card. Poli.

**Q**VI POLE virtutesq; tuas, & nescit honores,  
Is neq; Phoebaeum scit iubar esse po lo.

In effigiem PETRI Card. Bembi.

**N**ON tua Romano virtus fit BEMBE sub ostro  
Maior; quin ostrum fit magis inde nitens.

In effigiem IOANNIS Card. Moroni.

**M**ORON effigiem cernens, in rebus agendis  
Maiestas viuo, conijce, qualis erat.

R

QVAB-



In effigiem GVLIELMI Card. SIRLETI.

**Q**VAERITVR, an tua sit probitas, doctrina' de maior:  
Nam retulit meritum purpura utriq; decus.

In effigiem <sup>Sancti</sup> CAROLI Card. BORROMAEI.

**H**IC opere ostendit, quo se mortalia pacto  
Pectora vina queant templa sacrare Deo.

In effigiem ALBERTI Card. BOLOGNETI.

**T**E properè extulerat sublimem candida virtus,  
Praeproperè at Lachesis sustulit atra manus.

Ad ALEXANDRVM BEROALDVM.

**N**I BEROALDE notam perfrieta fronte petentis  
Extimeam, est abs te quod petijisse velim.  
Sed reticens etiam vereor, ne dicar ineptus,  
Cum tu adeò largus sis animo, atq; manu.  
Ingenuè ergo loquar : binos mihi trade libellos,  
Qui tibi sunt duplices, meq; beasse puta.

In effigiem FRANCISCI PETRARCAE.

**S**ALVE delitiae Aonidum, atq; Heliconis Hetrusci  
Gloria Laureolam fronte, animoq; gerens.

In effigiem LAVRAE.

**N**VLLA ex arboribus, queis se Peruanus, et Indus  
Iactat, perpetuò laurus ut ista viret.

LIBER.



In effigiem ANDREAE DORIAE.

**L**IBERTAS patriae, & naualia parva trophaea  
Aeternant nomen Doria in orbe tuum.

In Effigiem ALDI MANVTII senioris.

**E**N bene de studijs meritis : Virtutis amantes  
Effigiem gratis aspiciate hanc animis.

In effigiem MICHAELIS ANGELI BONAROTAE.

**S**I non Praxitelem, si non superauit Apellem,  
Ambobus certe par Bonarota fuit.

In effigiem TRIPHONIS GABRIELII nobilis Veneti.

**M**ORIBVS ut puris referebas aurea secla,  
Sic victus simplex, & tibi cultus erat.

In effigiem LVDOVICI BÛCCAFERREI.

**F**ERREA bucca tibi, nempè indefessa docendo;  
Sensa animi ast referens, aurea bucca fuit.

In effigiem ROMVLI AMASAEI.

**H**IC Cicero alter erat, verè omnes, Romule, dicet,  
Qui vel te audierint, vel tua scripta legent.

De F. FRANCISCO PANICAROLA.

**A**MBIGITVR, Phoenix vtrum sit, & vnica in orbe:  
Sed verè hoc omnes aure, oculisq; probant;

R 2 Quod



*Quòd nec habet Soles geminos sublimis olympus,  
Nec Panicarolas infima terra duos.*

*In effigiem eiusdem.*

**P**RISCA oratorum facundia lenijt aures,  
*Sed tua nunc animis pandit ad astra viam.*

*Aliud.*

**N**ON veterum scriptis quantum facundia possit,  
*Sed proprio exemplo Panicarola doces.*

*In hortum. Lectori benè viuere, & lætari:*

**L**ECTOR amice vides et formam fontis, & horti:  
*Et potes his etiam, cùm libet, ipse frui.*  
*Feci ego, quod potui: non ergo Thessala tempe*  
*Hic animo verses, Hesperidum ve nemus.*  
*Quin illam potius terram meditare beatam,*  
*Nos primi unde procul noxa parentis agit.*

*In Fontem.*

**Q**VI bibis hanc, iterum sities: ergo illius undam  
*Fontis ama, extinguit quae semel hausta sitim.*

EX S. GREGORIO NAZIANZENO.

**C**VM sua cuiq; salus operanda est tempore in omni,  
*Tum mage suprema iam propiore die.*  
*En senij praeco, tibi prospice, clamat; abire*  
*Tempus adest, fiet iudiciūq; breui.*

MOLLI-



EX VGONE de S. VICTORE.

**M**OLLICVLIS animis sua tantum est patria dulcis:  
At contrà patria est fortibus omne solum.  
Qui verò patriae flagrant caelestis amore,  
Dirum totus eis exilium orbis erit.

Votiua tabella.

**A**NTINOVS pictam, Caeli Regina, tabellam  
Hanc tibi persolvens debita vita dicat.  
Quam pius inspiciens hospes, te posse periclis  
Eripere, atq; tuam poscere discat opem.

In bonum Concionatorem.

**D**VM vitae Eulogius praebet se exéplar honeste;  
Christicolasq; sacris instruit eloquijs;  
Vno cre acclamant omnes, verè optimus hic est  
Doctor, qui quod nos edocet, illud agit.

In effigiem GABRIELIS Card. PALAEOTI.

**S**I virtute decus meruisse, est gloria vera:  
Nempe quod est summum Paleotus habet.

In effigiem FERDINANDI MEDICIS  
Magni Ducis Hetruriæ.

**P**LVRIMA sunt, meritò queis se se Hetruria iactet:  
Nil verò Magno te Duce maius habet.

QVOD



In effigiem CHRISTIANAE LOTHARINGIAE

Magnæ Ducis Hettruriæ.

**Q**UOD poterat summum Thuscis decus addier oris,  
Summa huius pietas, nobilitasq; dedit.

In effigiem FEDERICI PENDASII.

**C**ERNITVR effigies PENDASI. at mentis acumen  
Exprimere artificis dextera nulla potest.

In effigiem HIERONYMI MERCVRIALIS.

**N**ON hæc Hippocratis, sed Mercurialis imago  
Par tamen amborū gloria, & ingeniū. (est:

Ad Diuites.

Excerpta ex libris Saluiani Massiliensis  
ad Ecclesiam Catholicam.

**C**VI meditaris opes tantas post funera, Diues,  
Linquere? num hæc animum seria cura subit?  
Haeredi. quis erit? natusue, nothusue, vel alter  
Sanguine, vel nexu iunctus amicitiaæ.

Forſan & ignotus: quid ni? dum inſignia gentis  
Geſtando nomen proroget ille meum?

Quid ſi hæres, longo quæ ſunt tibi parta labore,  
Turpiter abſumat, dilapidetq; breui?

Hei mihi, deſuncto ſi quiſquam id nunciet, cheus

Quam



Quàm doleam, miseris discrucierq̃ modis.  
 Si sapis ergò, feras tecum omnia. qui pote tantum,  
 Argenti, atq; auri ferre cadauer onus?  
 Ne dicam sylvas, campos, vinea, domosq̃,  
 Et quæ multa arcas pondere farcta grauant.  
 Perfacile id fuerit, totum qui sustinet orbem  
 CHRISTVS, si accedat duxq̃, comesq̃ tibi.  
 Quin vt eas leuior, cuncta illi trade ferenda,  
 Quo tu plura dabis, laetior ille feret.  
 Nec modo caelesti custos ea fidus in arce  
 Condet, quò nequeat fur penetrare malus;  
 Sed tibi perpetuò summa cum pace fruenda,  
 Munificus decies multiplicata dabit.  
 Ergo hilaris iam nunc illuc præmittere partem  
 Incipe, vt interea crescat acervus opum.  
 Non tibi vectores deerunt, sed vbiq̃ paratos  
 Perq̃ urbem plures, perq̃ videbis agros.  
 Scilicet ingentes inopum, miserâq̃ cateruas,  
 Quas inter CHRISTVS forsitan ipse latet.  
 Certè CHRISTVS eis data se accepisse fatetur,  
 An ne igitur CHRISTO non sit habenda fides?  
 Da, dum tempus habes, animi sic dilue sordes,  
 Saepius & lacrymas adde, humilesq̃ preces.  
 Sic & diues eris viuens, & mortuus auctas.  
 Inueniens, tecum semper habebis opes.

CVM



Ad ALEXANDRUM BVRGIVM Mutilianæ Priorem.

**C**VM tua te Virtus oras clarare per omnes  
 Sit potis, & clarum ferre per ora virum:  
 Nunquid eos censes, quibus impertiris amorem,  
 Posse etiam decoris participare tui?  
 Quin caue, ne nostras frustra illustrando tenebras,  
 Lumen, BVRGE, tuum fulgeat inde minus.  
 Namq; & Phoebus humo nubem sustollit in auras,  
 Ast illi nitidum mox tegit atra iubar.

Ad Io. ANTONIVM ZANIVM.

**D**VLCE tuum nobis, ac magni muneris instar,  
 Sit licet exiguum, ZANI, epigramma fuit.  
 Non etenim versus numero, sed pondero mentis  
 Candorem, & mores, ingeniumq; bonum.  
 Omnia, quæ coram mihi nota, libenter, & absens  
 Agnosco, inq; dies gratulor aucta magis.  
 Sic igitur pergas & me, patrumq; Camillum  
 Crebrò carminibus laetificare tuis.

In Epitomen PLATINAE de Vitis Pontificum.

Ad Lectorem.

**S**VNT peregrināti compendia grata viarum,  
 Baiulus & gaudet, si minuatur onus.  
 Terrarumq; iuuat tractus, atq; equoris omnes  
 Distinctè exiguo cernere posse globo.

Quid



Quid ni igitur placeant, paruo comprehensa libello  
 Omnia, quae Platinae grande volumen habet?  
 Hinc tibi & ingenium auctoris, studiumq; patebit,  
 Et stylus, ò Lector, sicut ab ungue leo.

CLEMENTI OCTAVO Pontifici Maximo  
 Pro Bernardino Rossato quondam  
 famulo Genitoris eius  
 Sanctitatis.

**E**N supplex quarto, CLEMENS OCTAVE, libello  
 Rossatus sacros audet adire pedes.  
 Annis ille grauis, proprio sed non grauis ære,  
 Hincq; tuam toties poscere pergit opem.  
 Prouideat, dixti iam saepè, Datarius; at mî  
 Nemo dedit. Fiat, dic iterum, atq; iube.  
 Da, Pater alme, tuum per nomen amabile seruo  
 Oranti auxilium, subsidiumq; seni.  
 Da per honoratissimam, perq; ossa parentis,  
 Cui scis, quàm assiduus nocte, dieq; fui.  
 Sic tibi Olympiadas plures Regnator Olympi  
 Annuat imperij dinumerare tui.

In Tumulum IOANNIS LEONARDI, vulgo dicti,  
 IL LETTERATO.

Obijt Romæ die 15. Feb. 1595.

**S**ERVE Dei, proprium tibi nomen iure dederunt  
 LITERAE, Euangelij namq; peritus eras.

S

Quod



Quod sermone rudem te opera seruasse fideli,  
 Testatur parui cura benigna gregis.  
 Testanturq; Vrbi noti sine crimine mores,  
 Nec non vita pie, ac duriter acta diu.  
 Terram terra tegit: purae sperare salutem  
 Nos animae eternam dogmata sacra docent.

Aliud.

**M**ULTI multa sciunt: hic omnia nesciunt vnus,  
 Quae verbis hominū culta Cathedra docet.  
 Re tamen expleuit sacrae compendia Legis,  
 Quam puro inscribit pectore dextra Dei.

Gratiarum actio pro munusculis  
 Cal. Ian.

**O**LEPIDAE, atq; animo dulces, oriq; Calendae,  
 Quae dono dulces tot mihi fertis opes:  
 Non ego vos albo tantum, de more, lapillo  
 Signo, sed & grata mente recondo memor.  
 At schedula haec humilis largo, dulciq; Patrono  
 Pro magno exiguum munere minus erit.

De lepida Iuuenum concertatione Mediceorum  
 Hortorum Cupressetum cursim  
 ascendentium. Romae.

**D**OCTA cohors iuuenum studijs certare vicissim  
 Assueta, & culti viribus ingenij,

Mem-



*Membra etiam exercens, molli tumultū vndiq̃ septum  
 Cupressis, cursu dum superare studet,  
 Qui prior ascendit, comiti obstat ponē sequenti,  
 Et baculo opposito scandere summa vetat.  
 Illi autem contra nitenti irrumpere, dira  
 Sorte perexiguo est vulnere laesa manus.  
 Saucius hinc ridet, gemit alter, & ultor eisdem  
 In se armis socij discupit esse sui.  
 Annuit optatis eadem sors, namq; bacillum  
 Projiciendo, sibi laesit & ipse manum.  
 Risit & hic plagam; at propriam qui riserat ante,  
 Huius & ingemuit, condoluitq̃ vicem.  
 Sic uno unanimes affecit tempore amicos,  
 Ac parili sensu laetitia, atq; dolor.*

## IN OCULOS CLOELIAE FARNESIAE.

**C** AELI Romanus fauor est, quod copia tanta  
 Nunc niuis, atq; gelu tecta, viasq̃ tegat,  
 Non etenim tantum, quem late suscitāt ignem  
 CLOELIA Luminibus Translyberina suis,  
 Vnapotis fuerat restinguere Tybridis vnda.  
 Perpetuam hanc hyemem Roma precare tibi.

Lusus in Nasum. Ad GASPAREM PUSTERLAM  
 PAVLI CELOTI Foroiulienſis.

**Q**uem reputas Pusterla mihi succrescere Nasum,  
 Euasit nondum maior in Vrbe meus.

S 2 Si



*Si causam exquiras, paruo nil tempore Romae  
Crescere conspicias, me neq; despicias.*

Ad PAVLVM CELOTVM, ANTONII GIGANTIS.

**Q**VI Nasum Romae iam nunc grandescere dixit  
PAVLE tibi, vere Lynceus ille fuit.  
Nam mole in tanta discrimen noscere paruum,  
Non quaeuis acies quibat, acuta licet.  
Sed si paululum adhuc es permansurus in Vrbe,  
Hoc etiam lippis nomine notus eris.

Ad ANTONIVM GIGANTEM, PAVLI CELOTI.

**I**LLE quidem, nostri quem non latet incrementum  
Nasi, est, Antoni, Lynceus, & melius:  
Cernere nam puro potis est quoque lumine, quantum  
Amnibus Oceanus turgeat innumeris.  
Quamq; astra immensi lambentis inania mundi,  
Vsq; hausto mare sint grandia facta magis.  
Quidue dies rebus sensim crescentibus addat,  
Et molli e duris una peredit aqua.  
Haec potuisse, reor maius, quam monstra Gigantum  
Excelsum aggeribus iam superare Polum.  
τῶν πῶν πῶν πῶν.

Aliud ad eundem.

**D**VLCE decus nostri, qui prominet ore pedalis  
Nasus, prae se fert non genus hicce tuum?

Quod



*Quod si conspicua tantam gestare daretur  
Fronte tibi molem, qui paucor heu superis?*

Ad PAVLVM CELOTVM, ANTONII GIGANTIS.

**V**RSA, inquis, peperit: quid mirū? lābit. et hoc est  
Naturae. absoluit: prodeat. Ecce: quid est?  
Nasus. monstrū erit. isq; ingēs. mirabile dictū.  
O Nasum ingentem. Roma vide, atq; stupe.

Ad ANTONIVM GIGANTEM, PAVLI CELOTI.

**N**EC peperisse Gigas Vrsam, nec lābere mirū,  
Natura generis dicitur illa sui.  
Si Nasum fingit, mōstri quid? lambitur Vrsus.  
Expendas igitur verius, & melius.  
Monstra hominum genuit, peperit quae encomia Nasi,  
Roma vides, tibi nec cauta times? stupeo.

Ad PAVLVM CELOTVM, ANTONII GIGANTIS.

**S**I verba ingenui non aspernaris amici,  
Intrepide Nasum, Paule, recide tibi.  
Dirum consilium, dices: sed respice finem,  
Quò sophus, ut tute es, cuncta referre solet.  
Namq; alium forma pulchrum magis, atq; venustum  
Talcotij reddet ingeniosa manus.  
Inde humor calamis siccabitur, ac tibi totus  
Pulcher ut est animus, sic quoq; vultus erit.

Gaspar Ta  
liacotius  
excellen.  
Chirurg.  
Bonon.

MVRVM



Ad ANTONIVM GIGANTEM, PAVLI CELOTI.

**M**VRVM oculos inter ducit Natura, genasq;  
Atq; arcem Nasum frontis, et oris habet.  
Angustos muros, humiles si struxeris arces,  
Nil tutum, optato cunctaq; sine carent,  
Quo in latum crescat, sublimi vertice surgat  
Nasus, nilq; ipso tutius, aut melius.

Ad PAVLVM CELOTVM, ANTONII GIGANTIS.

**R**OMA tuū hoc propriū est, naturae ut quicquid, et  
Mirandū, ex toto confluat orbe tibi. (artis  
Immensae molis lapides hucusq; supersunt,  
Plurimaq; historiae monstra fuisse docent.  
Nunc etiam Tellus quod Iulia maius habebat,  
Spectandum cunctis Paulus in ore tulit;  
Scilicet ipsius Nasum; quem suspice, & altos  
Inter Obeliscos grata repone tuos.

Ad ANTONIVM GIGANTEM, PAVLI CELOTI.

**I**VLIADV M Tellus formosis inclyta Nasus,  
Non secus (ut semper) vatibus atq; bonis:  
Nunc misit monumenta heroum visere, Romam  
Haec inter lepidos, quem lepidissimum habet.  
Nil mage Apollineo hic se cernit carmine dignum,  
Vnde oculos in se vertit, & ora hominum:  
Gessit teq; suae laudis componere honores,

Et



*Et tuam in hoc crebrò iam crepuisse lyram.  
Quas tibi agam grates, Antoni? quivè rependam?  
Carmina grata facis, carmina grata cape.  
Celsa tui frustra tentarunt astra parentes,  
Tu maiora. caue, deficias, moneo.*

*Eiusdem ad Musas.*

**H**ACTENVS haec Musae; sacros iam claudite fon-  
Vel cunctae in Nas cedite delitias. (tes,

*Ad IULIVM CAESAREM STELLAM  
Romanum, in Aulam ALOYSII CARAFAE  
Sablonetae Ducis, & Ostiliani Principis  
honorificis conditionibus  
euocatum.*

**I**VLI Caesar abis: doleam ne? an laeter? *Utrumq;  
Uno, eodemq; mihi tempore suadet amor.  
Namq; meam si alia Stellam regione micantem  
Mox oculis nequeam cernere, iure querar.  
Trister item, Cygnum quando exaudire canorum  
Non dabitur, patrio dum volat amne procul.  
Multiplici at contrà solans me nomine, curas  
Protinus ex animo, tristitiamq; fugo.  
Dum mihi tam cari capitis tot commoda, honorumq;  
Insignes titulos commemorare libet.  
Quos virtutis amans, & Phoebi cultor alumno  
Pieridum eximij's dotibus ingenij*

*Conspi-*



Conspicuo, Princeps clarissimus obtulit *Utrò*,  
 Hoc quoq; dans animi nobilis indicium.  
 Quaerere namq; viros, digneq; fouere merentes,  
 Magnum est, sed raro conspicit orbis, opus.  
 Quare etiam par est, tua, vates magne, CARAEAM  
 Maiori celebret carmine Musa Ducem.  
 Illius & nomen studeat tot ferre per oras,  
 Fama Columbeidos quot peragrabat ouans.  
 Sic igitur gaudens te discedente dolebo,  
 Sicq; mihi per te dulcis amaror erit.  
 Usque adeo praesens oculos, animumq; vel absens  
 STELLA potes radijs exhilarare tuis.

Ad GVLIELMVM SEPRAEVM Anglum  
 Sacrae Theologiae Doctorem.

**N**ON surdū alloqueris, bone mi Gulielme, sodalē,  
 More tuo exemplis, voceq; recta monens,  
 Dū grauiora doces legere argumenta camoenā,  
 Nempe ea, quae pridem tempora cana decent.  
 Illi igitur dixisse nouis me crede calendis,  
 Quas tibi det faustas, propitiasq; Deus.  
 Incipe Musa novos versus, nouus incipit annus,  
 Quos multorum instar laudet, ametq; meus  
 Semper honorandus, semperq; SEPRAEVS amandus,  
 Tām bene qui nobis consulit, atq; piē.  
 Cui pauca haec cursim dictata ingentis amoris,  
 Propositiq; noui carmina pignus erunt.

ANTO-



Dialogus cum Angelo Custode.

**A**NTONI, Antoni, te appello, atq; alloquor vñū,  
Surge, audi, surdus num mihi semper eris?  
Quæ vox tã validis implet clamoribus aures?

Ans.

Insensus ne hostis, an mihi amicus ades?  
Fidus, amansq; tui (Vanum depelle timorem)  
Custos diuina sum tibi sorte datus.

Ang.

Angele Sancte Dei, immemorem memor ergò reuisis,  
Nec tanta infectum labe relinquis adhuc?

Ans.

Ah miser, ut potero te deseruisse, salutis  
Tanta mihi cùm sit credita cura tuæ?

Ang.

Tu verò ingratè nimium, nimiumq; scelestè  
In me iam pridem te geris, inq; Deum.

Illum scis quoties, & quantis perditæ noxis  
Laeferis; horresces, si memorare velis.

Me quàm contristas crebrò, dum recta monentem  
Spernis, & in praeceptis, deteriusq; ruis.

Parce precor, precor: agnosco, fateorq; pudetq;  
Eheu me miserum, hei mihi iam quid agam?

Ans.

Hinc scelerum facies, & mens me conscia terret,  
Nunc siquidem tenebris eruta cuncta patent.

Illinc horribilis stat pandis faucibus Orcus:  
Tristis ubiq; pavor, saeuus ubiq; dolor.

Iam veniae spes omnis abit, fiducia cessit:  
Nam mea me nimio pondere culpa premit.

Infelix quid ais? Verbum hoc magis officit vñum,

Ang.

T

Quàm



Quàm quae patraſti noxia facta prius.  
 Corrige te, veniamq; pete, & ſperare ſalutem  
 Aude humilis: fuge iam praua, operare bonum.  
 Nam licet immenſae fuerint, numeroq; carentes,  
 Quae tibi nunc ſordes commaculant animam:  
 Arte Deus potis eſt omnes abſtergere mira,  
 Agni caeleſtis nempè cruore ſacro.

Ant. Gratia magna Deo, atq; tibi Sancte Angele, qui me  
 Commiſerans recreas mollibus alloquijs:  
 Et veniam ſperare iubes, quam pectore ab imo  
 Exprefſis lacrymis, ſuppliciter q; peto.  
 Sic ò praeteritas culpas ignoſcat Olympi  
 Reſtor, & uſq; ſua me comitetur ope:  
 Vt mihi iam certum eſt, ludicris rebus omiſſis,  
 Diuina impigrè poſt modò iuſſa ſequi.  
 Tu verò, ut ſemper, nobis fidiſſime Cuſtos  
 Adſis, & grefſus, cunctaq; membra rege.  
 Iudicis ut tandem magni tutam ante tribunal  
 Hanc animam ſiſtilas victor ab hoſte truci.

Ang. Annuat optatis, atq; haec pia vota ſecundet,  
 Et rectum ſignet, quâ gradiaris, iter  
 Rex CHRISTVS, paſtorq; bonus, tandemq; ſupremo  
 Te cenſu electas colloceſt inter oues.

De noxijs cogitationibus in animum recurrentib.

Vos ò qui pelagi ſulcando nauibus vndas,  
 Tot noua luſtratis litora, totq; ſinus:

Ei



Et vos immensum pedites, equitesq; per orbem  
Assueti longas ire, redire vias.  
O & queis rerum cupidus miranda nouarum  
Visendi, huc illuc currere suadet amor:  
Dicite, num superis vsquam reperistis in oris  
Prorumpens Lethes quâ fluat amnis aqua?  
An tantum infernis sese regionibus abdit,  
Quò viuens hominum nullus adire queat?  
An veteres illum potius finxere poetae,  
Miscere ut veris plurima vana solent?  
Ipse equidem magno mercarer fluminis haustum,  
Quo mens praeteriti nil memor inde foret.  
Quando adeò infestum, noctesq; diesq; misellam  
Agmen monstrosus turbat imaginibus.  
Illis nempe, quibus multos malè cauta per annos  
Ipsa volens aditus, hospitiumq; dedit.  
Nunc licet horrendas facies exosa repellat,  
Non tamen aut vi illas, aut procul arte fugat;  
Quin tamquam rapidae volitent hinc inde volucres,  
Quae nidis cupiant incubuisse suis.  
Languidior siquidem obstitit, nec ut hostis in hostes  
Irruit, at priscae parcat amicitiae.  
At veluti hoc ludens agat exitiabile bellum,  
Nec penitus vinci vult, neq; vincere amat.  
Hinc mihi nec pacis, nec spes est certa quietis,  
Hinc doleo, heu miseris discruciorq; modis.  
Quid prodest oculos auertere? quid iuuat aures



Claudere, ne quid mens hauriat inde mali?  
 Ipsa per occultos calles admittit in arcem,  
 Hostilesq; acies in sua damna fouet.  
 Quòd si aliquo efficere id valeam medicamine, notas  
 Ne formas cernens postmodo noscat eas:  
 Aut incurstantes arcebit fortior, arctis  
 Aut vinclis victas, compedibusq; premet:  
 Inuitam foedis ne spectris usq; fatigent,  
 Qualia multa diu sustinuisse queror.  
 Sed quid ego hæc frustra meditor? quid de eloquor amēs?  
 Vnde recens animum vana cupido subit?  
 Hoc nihil est aliud, quàm curis addere curas,  
 Atq; aegro hinc morbos quaerere, & inde novos.  
 Quin vereor laticis dum ficti obliuia quaero,  
 Me verè factus sim immemor ipse mei.  
 Nam quid longinquas opus est discurrere in oras,  
 Id cupiendo magis, quod minus esse queat?  
 Cùm vera ante oculos gratis mihi pharmaca prostant,  
 Gestiat & medicus ferre benignus opem?  
 Illis nequaquam auxilium praesentius ullum  
 Infirmis animis, corporibusq; venit.  
 Arte adeò hic valet, ut non sit praestantior alter  
 Inter mortales, caelicolum de choros.  
 Ipse etenim caeli, terraeq; est Rector, & idem  
 CHRISTVS IESVS homo est, omnipotensq; Deus.  
 Quaecunq; ille iubet, dicto ocyus omnia sunt,  
 Et vult aequè omnes, atq; iuuare potest.

Hinc



*Hinc animae porrò afflictæ medicina, salusq;  
Hinc finis belli est, hincq; petenda quies.  
Te te igitur supplex adeo, sanctissima proles  
Virginis, exaudi vota, humilesq; preces.  
Da trepido pacem cordi, da gaudia menti  
Solicitæ, & pauidam protege ab hoste truci.  
Fac, simul audierit venerandum nomen IESV,  
Diffluet inferni pessima turba ducis.  
Et tua Tartaræ paueant vexilla phalanges;  
At mihi tutamen sint, precor, atq; decus.  
Sic ò CHRISTE Dei Verbum, Sapientia, Virtus,  
Concede, optata postmodo pace fruar.  
Ut voti compos laeto tibi pectore grates  
Semper agens, laudes ore, styloq, canam.*

Ad se ipsum Sexagenarium.

**C**OLLIGE sarcinulas, me sexagesimus annus  
Inclamans, abitus tempus adesse monet.  
Nec tantum validis torpentem vocibus urget,  
Sed speculi stimulos saepe adhibere solet.  
Hoc mihi non fictè rugas, canosq; reuelans,  
Ostendit, quàm non sim modò, qualis eram.  
Et fidos addit testes, languentia membra,  
Atq; hebetes oculos, iam tremulasq; manus.  
Ast ego me longæ assuetus spe fallere vitæ  
Durus, inersq; moras mille subinde trahens,  
En (inquam) tot me longè præcuntibus, acui

Tam



Tam breue cur spatium mî superesse rear?  
 Quin hilari potius viuam, dum suppetit aetas.  
 Postrema ista animum cura molesta premat.  
 Talia iactanti vox est mihi visa minaci,  
 Horribiliq; aures, corq; ferire sono.  
 Ergo sub extremam, puer ò longaeue, senectam  
 Ludicra sectando, desipuisse iuuat?  
 Nec pudet hac luisse tenus? nec spicula mortis  
 Horrescis, miserum iam feritura caput?  
 Siccine, dum fas est, noxas abolere vetustas,  
 Tu cumulum perges amplificare nouis?  
 Quî tibi adhuc audes annos promittere plures,  
 Si nulli est hominum crastina tuta dies?  
 Quid si animam superî repetant hac nocte ministri,  
 Et trepidam sistant protinus ante Deum,  
 Quo se ingrata modo tutabitur? heu dolor, eheu  
 Quàm sero, & frustra poenituisse velit.  
 Tunc ego nil audens contrâ, perterritus haesi,  
 Spes vitae subito mortis abacta metu est.  
 Atq; diem meditans coepi trepidare supremam,  
 Criminis omnigeni conscius ipse mihi.  
 Non tamen aut facies scelerum, aut immensus aceruus,  
 Nec quicquid pauido suggerit hostis atrox,  
 Optatae mihi spem veniae extorquere valebunt,  
 Quam praefert CHRISTI dextra benigna reis.  
 Illum igitur cruce pendentem prostratus adoro,  
 Utq; mihi ignoscat, voce, animoq; precor.

Oro



Oro & praeteritas culpas obliteret omnes,  
Nec me foedari post modo labe sinat.  
Idq; tuo in primis Mater Sanctissima Virgo  
Auxilio praestet filius esse ratum.  
Tu quoq; discipule ò magno dilecte Magistro,  
Supplicis, atq; humilis sume patrocinium.  
Et tu peccatrix Solimae famosa per Urbem  
Quondam, ast Empyreis nunc celebrata choris,  
Debita cui large CHRISTVS per multa remisit,  
Effuso ex oculis dum lauis imbre pedes;  
Plurima debenti sautrix, veniamq; precanti  
Assistas, miseram commiserata vicem.  
Vos ego praecipue appello, nam nomina, & ora  
Vestra mihi assidue picta tabella refert.  
Dextrum Virgo latus CHRISTI, laeuumq; Ioannes  
Observant, stringit Magdala prona crucem.  
Nec minus ò diui, & diuae, Angelicae q; cohortes  
Vos veneror, vestrum praesidiumq; rogo.  
Pluribus vi pro me vnà intercedentibus, aures  
Inclinet placidas ad pia vota Deus.  
MDXCV.



IVLII SIGNII AD ANT. GIGANTEM,  
Cum Libello recens excuso, & inscripto:

POEMI VOLGARI, ET LATINI  
nella partenza del Molto Illust. & Eccell.<sup>mo</sup>

Sig. GIROLAMO PERBENEDETTI

Auditore del Torrione

di Bologna.

Al Molto Illustre Sig. ASDRVBALE

PERBENEDETTI.

**N**ON vatū expleti numeris sunt omnibus, ad te  
Quos mitto, numeri te sine magne Gigas.  
Perfice opus nostrum perfectis versibus, oro,  
Ars tibi quos diues dicat & ingenium.

Iudicis exemplar perfecti tu potis vnus

Exprimere, & grandis grandia facta viri.

Mente alta penetras rerum penetralia, Phoebus

Est pater, & genitrix est tibi Calliope.

Eia age sume chelyn, recreabis cantibus orbem;

Et bene Gens dicet PERBENEDICTA tibi.

AD IVLIVM SIGNIVM.

**L**EGI pulchra lubens, quae pectine carmina Tusco,  
Et Latia cecinit Felsina docta chely:

Dum laudum egregijs titulis insigne trophaeum

Erigit insigni nobilitate viro:

Insigni & studijs Astraeae, & fascibus aequis,

Prae-



Praestantisq; animi dotibus, atq; pij:  
 Iudicis exemplar perfecti ut postera noscat  
 Aetas, quem praesens suspicit, atq; colit.  
 Nempe iuo, IULI, magno haec oblata Camerti,  
 Consensus plebis unanimi, atq; Patrum,  
 Innumera exuperant argenti, auriq; talenta,  
 Quanta utcumq; alius parta referre studet,  
 Iurgia qui pendat parui, & quae plurima vulgus.  
 In proficiscentem mox maledicta iacit.  
 At meritis bene de cunctis hic, diues honorum,  
 Ominibus faustis, laude & onustus abis.  
 Iure igitur tali se patria iactat alumno,  
 Et consanguineo PERBENEDICTA domus.  
 Praecipue tanto MARIANVS germine gaudet,  
 Piceni eximius, non modo gentis honos.  
 Purpureos inter Patres quem Roma sedentem  
 Miratur meritis, & pietate grauem,  
 Cuius & ingenium solers in rebus agendis,  
 Et faciles aures, consiliumq; probat.  
 En tibi quae calamo, SIGNI, properante Gigantis  
 Debilis Echo instar, reddere Musa valet.  
 Tanti namq; viri virtutem, & facta decenter  
 Laudibus haud potis est amplificare ncuis.  
 Praesertim cum tot nitidi tecum omnia Cygni  
 Lustrarint, miris extulerintq; modis.  
 Quod si ego sat (culpa ingenij) fecisse nequius  
 Nunc tibi, tu facias, sit voluisse satis.


Marianus  
 Perbene-  
 dictus  
 Card. Ca-  
 merinens-  
 is.

V

Q'OT



ANTONII GIGANTIS  
FOROSEMPRONIENSIS  
CARMINA LYRICA.



In LUDOVICVM BECCATELLVM  
Ragusinorum Archiepiscopum,  
& Præpositum Pratensem.



VOT ante agresti carmina arundine  
Lusi, perenni pressa silentio  
Sylvæ recondant, quæ strepentem  
Sæpe meam excipiunt Camænam;  
Nunc te inclyte ò Latœ, potēs nigras  
Orci tenebras lumine splendido

Lustrare: nunc & vos precabor  
Castæ Heliconiades puellæ,  
Mirè scientes temporis improbi  
Fraenare cursum: hæc annuite, ut diu  
Pagella sit nobis superstes,  
Uiq; virum volitet per ora;  
Insigne nomen cui BECCATELLI  
Mandare (quamquam pertenui stylo)  
Audemus, haud hac mente, nostris  
Clareat ut magis ille chartis.  
Verum id mihi unum sat fuerit, pius

Si



*Si servus olim dicar in optimum  
Fuisse patronum, & fideli  
Sedulus obsequio, atq; cultu.  
Nae maximis pro muneribus genus  
Mortale summo Caelicolum patri  
Obnoxium est: multis & ipsos  
Nominibus colimus parentes.  
Tum qui benignum tramite in arduo  
Virtutis almae nactus erit ducem,  
Rerumq; honestarum magistrum,  
Quas habeat, referatve grates  
Illi pares unquam? Hoc ego nomine  
Debere multum me fateor tibi,  
O aurei seculi, ò imago  
Nobilium LUDOVICE morum:  
Quando libenter iam pateris tuum  
Me dici alumnum. quo magis gloriatur,  
Quàm si potentum affecula Regum  
Conspiciat dibapho refulgens,  
Auriq; magnum pondus, & uberes  
Agros, & amplas possideam domos.  
Atqui nec ore blandienti  
Vana loquor, neq; corde ficto.  
Te Regiae regnator Olympiae,  
Latere cuius nil oculos potest,  
Testor: meis tu semper esto  
Sic placidus, facilisq; votis,*



Ut ipse puro è pectore profero  
 Modò haec, & aura dum aetheria voles  
 Me desier, nunquam pigebit  
 Saepius haec eadem referre.  
 At tempus, index certus, id arguet:  
 Nunc optimè de me meriti Viri  
 Thalia quas laudes nouello  
 Instituis memorare plectro?  
 Prudenter illum magna negocia  
 Tractare, norunt & Veneti patres,  
 Dum Tertij Legatum IULI  
 Insolito exciperent fauore.  
 Summi & gerentem Pontificis vices  
 Mirata Roma est, & pium, & integrum.  
 Sacerq; Conuentus Tridenti  
 Consilium illius, atq; rectam  
 Mentem probauit. Tum vigilantiam,  
 Curamq; commissum assiduam in gregem,  
 Quis non adhuc nouit? quis illum  
 Praecipua hinc decorare laude  
 Non certat? hinc Vrbs Ragusidum inclyta  
 Praesenti honorem sedula praestitit  
 Vel debitum, absentemq; amore  
 Nunc quoque prosequitur tenaci.  
 Iam litterarum quot studia, & bonas  
 Sit doctus artes, scripta volumina  
 Testantur, ac perfusa dulci

Carmina



*Carmina Castalio liquore.*  
*Sed clariora haec luce Hyperionis*  
*Cursim recenses Pieri, floreꝯ,*  
*Multo virens pratum peragrans*  
*Colligis exiguas corollas.*  
*Quin laudum aceruo pro innumerabili*  
*Illustre magni iudicium Ducis*  
*Hetruriae connecte nostris*  
*Versiculis, neq; plura garri.*  
*Non verba COSMVS fundere inania*  
*Consuevit: hic ergò BECATELLIO*  
*Antistitem vllum sanctiorem*  
*Hesperijs negat esse in oris.*  
*Nec non apertis indicijs idem*  
*Ostendit, illum cum sua florida*  
*Acciuit Ultrò in regna, largè*  
*Prospiciens meritaē senectae.*  
*Quàm carus & mortalibus, & Deo*  
*Nunc Prati amoeno degit in oppido,*  
*Sacris vacando, deꝯ multis*  
*Aſidue benè promerendo.*  
*Quod restat, oro te prece supplici*  
*Rex magne diuū, qui pia respicie*  
*Mortalium facta, & benigna*  
*Promeritis trutina rependis:*  
*Hunc tu virum serua incolumem diu,*  
*Huic & quieto da senio frui*

Longos



Longos in annos : da feraci  
 Ingenio, ac animo vigere.  
 Multos iuuare ut pergat, & integrae  
 Vitae institutis, oreq; dulcia  
 Fundente mella, ac liberali  
 Inq; bonos, inopesq; dextra.

Ad LAELIUM TAVRELLIUM  
 virum clarissimum.

**N**E me rogantem Musa diutius  
 Terrere pergas; & mihi LAELII  
 TAVRELLII est perspecta virtus;  
 Carmine, laudeq; maior omni.  
 Cui si quid ausim luminis addere,  
 Illum de coner tollere versibus,  
 Deridear iure, atq; cursus  
 Icarios iterasse dicar.  
 Sed nota nobis est itidem viri  
 Benigna mens, ac insita comitas;  
 Quae me profari hortantur ambae,  
 Dantq; animum calamo trementi.  
 Ergo optimarum nobilis artium  
 Cultor, sacratiq; Aonidum chori.  
 LAELI sacerdos, hoc serena  
 Fronte tui exiguum clientis  
 Admitte munus; nec rudibus tuum  
 Si illustre nomen versibus infero,

Ferae



Feras molestè: nam neque auro  
Extenuat pretium nitenti,  
Indocta quamuis artificis manus  
Conflando turpem formet imaginem;  
Nec liuido interferta plumbo  
Gemma minus pretiosa fulget.  
Sed quis tam iners splendentia sidera  
Latè sereno suspiciens polo,  
Non obstupecat, nec deorum  
Inde Patrem colat, ac celebret?  
Praeclara virtus sic tua, & integri  
Actus in omni tempore, & innocens  
Vita, atq; mores elegantes,  
Consiliumq;, animusq; honesti  
Amans & aequi, in te excitat omnium  
Ubique mentes, oraq;: ut undiq;  
Sermonibus te, paginisq;  
Quisq; suis decorare certet.  
Benè, ac beatè grandia munia  
Gessisse, magnum est: sed meritis pares  
Audire laudes, saepe tristis  
Liuor, & astra vetant maligna.  
Te verò & amplis semper honoribus  
Florere, & alto Principi Etruriae  
Placere, iam multis ab annis  
Flora probat, penitusq; gaudet.  
Quin & merentem non minus exteras

Ingens



Ingens per aras gloria te manet,  
 Quacunq; ius ciuile gentes,  
 Pieriasq; colunt sorores.  
 Minoa iactet Graecia, & Aeacum,  
 Orci & tenebris praeficiat nigris,  
 Vi iudicent, dignoq; manes  
 Supplicio afficiant nocentes.  
 At nos ( Olympi gratia maximo  
 Regi ) intueri te vegetum iuuat,  
 Legumq; seruantem, & peritum,  
 Praesidioq; reos leuantem.  
 Miramur & te, dum grauioribus  
 Interdum omiſſis rebus amabiles  
 Pangis modos, mentemq; dulci  
 Alloquio exhilaras Camoenae.  
 Sanè tuarum non id in ultimis  
 Vir magne laudum ponere nos decet;  
 Quando hinc Metauri, Arniq; tantus  
 Subsequitur fauor, atq; plausus.  
 O si canoro promere carmine  
 Posſim, mihi quae plurima suppetunt,  
 Dum corde te mecum ſilenti,  
 Dumq; tuos meditor honores.  
 Nam grata vernis quàm varios refert  
 Pratis colores aura Fauonij,  
 Viuacibus tam multa de te  
 Quippe forent referenda chartis.

sed



*Sed ne phaselo litora paruulo  
 Cautè legentem me in pelagus trahant  
 Vastum resorbentes procellae,  
 Tempus erit cohibere velum.  
 Idq̃ ipsa tuti Musa silentij  
 Amica poscit. non tamen interim  
 Cessabo diuos deprecari,  
 Nestoreos superantem vt annos  
 Consueta firmo corpore munia  
 Obire te omnis Tuscia sentiat,  
 Fanumq̃ Fortunae diu te  
 Gaudeat incolumi, & Metaurus.  
 Item precabor, natus vt optimus  
 Virtute, magnisq̃ auctus honoribus  
 FRANCISCVS, omni ex parte laudes  
 Vsque tuas studet emulari;  
 Sic & Nepotes indole nobili  
 TAVRELLIAE genti amplificent decus,  
 Tuamq̃ felicem inuidenda  
 Laetitia cumulent senectam.*

LAELII TAVRELLII Annum agentis

LXXXIII.

Ad ANTONIVM GIGANTEM.

**S***I clara virtute Virum, aut Heroa videres,  
 Qui meritis posset proximus ire Deus;*

X

Tolle.



Tolleret hunc recte pulchro tua Musa labore,  
 Infereretq; astris, quæ via lacte micat.  
 Aemula Dircaeis incassum at fulgura fundis,  
 Dum mihi tot geminas lumina, culte Gigas.  
 Ipse quidem numeros aptas, orbesh; reflectis,  
 Maeandrisq; ornas, multipliciq; lyra.  
 Extollisq;, agitasq;, rotundior vndiq;, puro  
 Purior Electro, candidiorq; niue.  
 Has ego diuitias Thebani gurgitis expers  
 Vix capio angusto pectore, corderigens.  
 Obruor oceano laudum, Phoebiq; quadrigis  
 Vror, & in saxum Phorcidis ore feror.  
 Sic cumulo premor attonitus, sub fasce fatisco,  
 Inq; suum auctorem gloria tota redit.

## AD APOLLINEM.

**M**E Phoebe grates assidue tibi  
 Par est habere, ac dicere maximas,  
 Libare quod primis ab annis  
 Castalios dederis liquores;  
 Et mox adulto, quod iuga visere  
 Concesseris Parnassia, & intimas  
 Sedes Sororum, nuncq; demum  
 Esse aliquo in numero tuorum.  
 Num forte vanus memet amo, & mea?  
 Veriq; falsa ludor imagine?  
 Nil prorsus à nostro remotum

Ingenio



Ingenio magis esse possit.  
Nam mi vigil nec somnia fingo, nec  
Vulgi imperiti auram inhio leuem;  
TAVRELLII sed me peracre  
Iudicium, potius frequentis  
Plausu theatri, cogit ab infima  
Tellure paulum tollere verticem,  
Mihique desumpta pudenter  
Laureola redimire frontem.  
Is nanque nostrae non nihil aestimat  
Cantus Camoenae; quin etiam suis  
Dignatus est me perbenigne  
Egregijs decorare scriptis.  
An me ille pura candidior niue  
Lactet spe inani, laudibus efferens  
Fictis meos versus, ut ipsum  
Vatibus inserat immerentem?  
Id credere ausit liuidus, et procax.  
Me nanque tanti iudicio viri  
Iuuat probari; ac inde nomen  
Posse meum tenebrosa spero  
Vitare Lethes flumina. Sic mihi  
Adsis precanti numine dextero  
Latoe, digna ut te, tuisque  
Saepè viris placitura cantem.



Ad LAVRENTIVM FRIZOLIVM.  
De LVDOVICO BECCATELLO Ragusinarum  
Archiepiscopo, ac Præposito  
Pratenſi.

**S**PIRANTES Michael calluit Angelus  
Vultus de Pario ducere marmore,  
Quos miretur & ætas  
Præſens, ſeculaq; poſtera.  
Vrbinas etiam nobilis artifex  
Mira compositis arte coloribus,  
Dextraq; haud ſuperanda  
Viſas pinxit imagines:  
Tu verò mi anime hunc ſi cupis optimum  
Aeternare virum; ſi BECCATELLI  
Inquam nomen aues, &  
Laudes tollere ad aurea  
Caeli ſidera; ne tu artifiſcum manus  
Solertes adeas; nam neq; marmora,  
Nec præſtare colores  
Id poſſunt melius tibi,  
Quàm docti egregius FRIZOLII ſtylus.  
Quem pridem Venuſinae ciitharæ æmulum  
Agnoscunt, meritoq;  
Illi à ſinibus oliminis  
Vatum non humiles Auſonidum chori  
Aſſurgunt, auido cum ſtudio illius

Sic



Sic praeclara legentes  
Scripta, atq; aurea carmina;  
Mercator veluti strenuus affolet  
Gemmas percupidè quaerere lucidas,  
Et bacas, pretiosas  
Merces æquoris Indici.  
I tu ergò, & properè te in celeberrimam  
Vrbem Flaminiae transfer Ariminum  
O Musa, ille vbi tantus  
Vates curat Apollinis  
Sacra, atque assiduus æthera cantibus,  
Et litus resonat nobilis Adriae,  
Nunc facta alta virorum,  
Nunc laudes referens Dei.  
Quem nostro simulac nomine iusseris  
Saluere (haud equidem suspicor, infirmi  
Etsi ignota poetae  
Illuc nuntia veneris,  
Te sacro illius è limine pellier)  
Quàm verbis, precibusq; est pote maximis  
Exorare memento,  
Vt doctam admoueatur manum  
Felici calamo, qui valet è styge  
Quemuis eximere, & secla per omnia  
Conseruare celebrem:  
Qualis Mercurij aurea  
Virga ex Persephones dicitur horrido

Regno



Regno posse animas eripere, & Iouis  
Celsa in tecta referre.

Tum magnas BECATELLII  
Laudes grandiloquis versibus inserat;  
Quas iam fama volans vexit in exteras  
Gentes; at decoratas

Claris FRIZOLII notis  
Nequicquam volucres temporis inuidi  
Cursus imminuent; quin nitidas magis  
Ipsa lampade Phoebi  
Omnis posteritas leget.

Ac nempe eximium dum celebrat virum,  
(Quamvis perpetuò maxima suppetat  
Illi copia laudum)

Ingens materies fluet;  
Seu dotes animi, & fertilis ingeni,  
Seu mores libeat dicere amabiles,  
Seu vitae integritatem,  
Et recti studium, ac fidem.

Seu quæ sanctè obijt publica munia  
Percensere iuuet; siue pio ut gregem  
CHRISTI pascat amore, &  
Quàm purè peragat sacra.

At mi difficile est, innumerabiles  
Vel laudum titulos carmine persequi;  
Ni fortè haec sapienti  
Vati sint satis, ac super.

Nil



Nil ergò ulterius te decet addere,  
 Cùm testata deos, Pieri, dixeris,  
 Te non posse GIGANTI  
 Vllum iam pretiosius  
 Munus ferre, sui quàm meritissimi  
 Quae laudes domini pagina continet,  
 Praesertim egregio quam  
 Signet FRIZOLIVS stylo.

Ad MARIVM COLVMNAM Stephani F.

**D**ETERGE longo pulvere sordidum  
 Plectrum, & sonoras adde fides lyrae,  
 Illudq; mî dextrae, hancq; laevo

O puer admoueas lacerto.

Cessasne? magnus sic MARIVS iubet:

Nihil negandum est, cui superi bona

Tot, tantaq; vltro detulerunt,

Cuiq; volens teneris ab annis

Phoebus reuinxit fronde sacra comas:

Quo tempore omnis Pieridum chorus

Cum Gratijs certavit, illum

Eximijs cumulare donis.

Sed tu, MARI, quidnam obsecro vis tibi?

Unde haec cupido, Vatis vi infimi

Poscas agrestem audire cantum,

Et ciitharam malè garrientem?

Nae tu videris (pace loquar tua)

Pertae.



*Pertæsus Urbis Lautitiae, rudes  
Escas colonorum, & Falerno  
Pro liquido appetiſſe vappam.  
Quod forte ſi nunc taedium (ut euenit)  
Seuerioris te ſtudiij capit:  
Nunquid tibi me poſſe reris  
Languidulam recreare mentem?  
Nom Muſam Apollo dicit adhuc meam  
COLVMNA tanto munere: non chelys  
Haec eualeat, plectro inſuau  
Tuſa, graues animos leuare.  
Nanque obſtrepenti fingere gutture  
Anſer canoros non potis eſt modos,  
Tuſcas quibus BARGAEVS oras  
Dulcè ſolet reſonare cygnus.  
Quocunq; verò nomine id imperas,  
Parere certum eſt: quin tibi maximas  
Grates ago, quòd memet aure  
Tam facili, atq; adeò benigno  
Sermone dignas: quòdq; etiam mea  
Legenda me vltro carmina flagitas,  
Muſaeolum nec te ſecundò  
Poenituit ſubiſſe noſtrum.  
Hinc & vetuſto Romulidum ſatum  
Agnosimus te ſanguine, parua qui  
Non deſpicias, cùm tu inter omnes  
Sis, meritoq; habere magnus.*

*Quan.*



Quamquam iocosa id tūm grauitas tua;  
 Tum verba miris sparsa leporibus,  
 Tūm fortis aequē ac docta dextra  
 Indicijs perhibent apertis.  
 Blandirier nulli ingenitus pudor  
 Me fuit unquam: quod si ego te inclyta  
 Vel stirpe, vel virtute clarum  
 Nobilium iuuenum Italorum  
 Florem esse dicam: Romaq̃, Floraq̃  
 Vno ore longē vera fatebitur  
 Dixisse me, nec non frequentis  
 Excipiet mea verba plausu.  
 At quid minutis carminibus tuas  
 Perstringo laudes, si numero carent,  
 Vt astra, quae fulgere Caelo  
 Plurima suspicimus sereno?  
 Praestabit ergo reddere stridulam  
 Testudinem clauo; indeq̃ mox eam,  
 Et forsitan cum molliori  
 Pectine te meditans, refigam.

## AD PETRVM VICTORIVM.

**N**OBILIS Florae meditantī honores;  
 Siue quos prisci peperere longis  
 Seculis ciues opibus potentes,  
 Inclyti & armis;  
 Siue quos illi Medicum beata

Y

In dies



*In dies auget soboles, perenne  
 Italae gentis decus, atque regni  
 Robur Etrusci;  
 Obuiam sese tua, docte PETRE,  
 Fert mihi virtus, animumq̃, & omnes  
 Occupat sensus, aciesq̃ claro  
 Lumine stringit.  
 Qualis Astrorum numerum, & figuras  
 Ante Lucanas cupide intuenti  
 Aureis Sol vectus equis Eoa  
 Surgit ab vnda.  
 Hinc tuum nostro celebrare plectro  
 Nomen audemus, licet omnis impar  
 Sit tuis longè meritis futurus  
 Laudis aceruus.  
 Tu mihi ò cultrix Heliconis adsis,  
 Nunc chelym praeter solitum canoram  
 Redde, nunc & digna viri aure tanti  
 Carmina dicta.  
 Quem toga illustri, & senio decorum  
 Ciuium cunctus veneratur ordo,  
 Et ducem morum sequitur proborum  
 Tota iuuentus.  
 Sicuti quondam Sophiae parentem  
 Pars Athenarum melior fouebat,  
 Ac velut cultum tribuit senectae  
 Roma Catonis.*

Quip-



Quippe nil tantum est homini expetendum,  
 Recta quam mens, & studio bonarum  
 Artium flagrans, animusq; rebus  
 Prontus honestis.

Quae quidem puro veniens in auro  
 Gemma, VICTORI, tibi singulari  
 Obtigit dono superum: nec ipse  
 Munere tanto

Vteris frustra tibi dives uni;  
 Sed tuae largus patriae, atque Tuscis  
 Sedulo impertis, penitusq; toti  
 Diuidis orbi.

Nanque ubi sermo colitur Latinus,  
 Enitent docti ingenij labores,  
 Et stylo quae tu egregie diserto  
 Plurima pangis.

Tu libris magni Ciceronis auro  
 Obsitis longo decus & nitorem  
 Reddis, ac plures alios ab omni  
 Labe repurgans,

Insuper sensus aperis repostos.  
 Tantus ignaris simul, & peritis  
 (Quod potes multum) bene consulendi  
 Te tenet ardor.

Teq; priscorum meliora Graium  
 Scripta praebentem Hesperijs legenda,  
 Nunc manet laus & peritura nullo  
 Gloria seculo.

Y 2 Aß



*At honoratam subiens cathedram  
 Dij boni, quanta grauitate, quanto  
 Fonte verborum monumenta datum  
 Sacra recludis?*

*Et tuam sanctus Pater eruditam  
 Audijt vocem, sacer & Senatus,  
 Atq; te admirans hominum corona  
 Astitit ingens:*

*Cum Duce à magno veniens ad Urbem  
 Missus orator, populi frequentis  
 Verteres in te, quasi Marcus alter  
 Tullius, ora.*

*Proinde summis ò decorata donis  
 Flora, cultisq; ingenijs, & auro  
 Affluens, ut iure Italus ferare  
 Urbibus esse*

*Pulchrior, tanto frui, atque gaude  
 Ciue, splendorem tibi qui togatus  
 Addit, & pubem studijs, bonisq;  
 Moribus ornat.*

*Nae viris prudens Plato Ciuitatem  
 Talibus censet fore per beatam:  
 His opes, clarum genus, & triumphum  
 Lauream cedat.*

*Sed meae quanquam tenues Camoenae  
 Spiritus insint, neq; pene quisquam  
 Sit potis finem reperire laudum*

PETRE tuarum;

Attamen



Attamen rhythmos ego longiores  
Rursus ordire, nisi iam moneret  
Me pudor, ne te grauiora semper  
Mente agitantem  
Demorer cantu, cuiharaq; agresti.  
Ergò sat magna haec tibi sint, precamur  
(Parua sint quauis) animi, atq; cultus  
Pignora nostri.

PETRVS VICTORIVS ANTONIO GIGANTI Sal.

**N**ON mihi primum nunc, cum in manus meas  
venit nouum carmen tuum, vel meum potius,  
cognitum, & perspectū fuit elegans ingenium  
tuum, Gigas suauissime, & naturae bonitas singularis,  
qua impelleris ad ornandos amicos, & in Caelum sum-  
mis laudibus ferendos: legeram enim multo antea non-  
nulla tua carmina, plena venustatis, & artis, quibus ce-  
lebrabas honestos viros, & magna virtute praeditos, in  
ijs fuit grauis Ode, qua laudasti clarissimum virum, &  
tuo praeconio dignissimum, Laelium Taurelium, cuius  
sanè carminis non facile dixerim argumentum ne fuerit  
verius an facultas scribendi ipsum, & omnibus artis co-  
loribus pingendi maior. Iam tum igitur mihi placuisti,  
& ijs omnibus de causis in animum meum amanter irru-  
pisti: non minus enim delector laude amicorum, quàm  
mei ipsius; semper autem amaui optimum hunc, & do-  
ctissimum virum, & eximias ipsius virtutes valde ad-  
miratus



miratus sum: cepi igitur voluptatem non parvam, cum  
 vidi ipsum digne, ac merito commendatum. Utinam ma-  
 teriam parem nactus esses, cum induxisti in animum me  
 illustrare, sed quanto minora sunt, & tenuiora mea me-  
 rita, tanto magis apparet, atque illustrior est tua virtus,  
 & ingenij vis, ac potestas, qua tractasti hoc exile argu-  
 mentum, ut si opimum, amplumque foret, splendorisq; ipsi  
 plurimum attulisti, ob diuitias tuae naturae, & artifi-  
 cium mirificum pangendi carminis. Similem igitur te  
 iudico veteribus illis melicis Graecis, Simonidi, Stesi-  
 choro, Pindaro, & uni Latino Flacco, in quorum pa-  
 laestrā magno animo ingressus es, imitarisq; illos egregie,  
 vel potius certas cum ipsis de loco honeste, quod si in isto  
 itinere perseveraris, humanioresq; has musas toto pectore  
 colueris, spero fore, ut eandem gloriam, quam illi nacti  
 sunt, consequaris, quorum nomen adhuc post tot secula  
 viget, ac semper florebit, quamuis ingeniorum monimen-  
 ta, iniquitate superiorum temporum magna ex parte pe-  
 rierint. Non dubito autē quin id facturussis: qui enim  
 semel dulces hos fructus musarum gustauit, non potest ab  
 illis discedere, nec ullo casu pati se inde abripi: esset nāq;  
 laudi, & gloriae suae inimicus, et eodem tempore ab ho-  
 nore, & fama excellentium virorum paenē alienus, quā  
 potest facile augere, et dignitati eorū non paruum cumulū  
 addere. Sed haec tibi praeclare nota sunt, nec necesse  
 erat cursui tuo ardenti stimulū admouere, sed volui tecum  
 aliquantulum per litteras loqui, familiari hoc meo, &  
 humili



humili sermone, postquam pari studio, & poetica ubertate compensare benevolentiam tuam me posse diffusus sū: cum autem te antea dilexerim, ob dotes animi tui, & studium, quo flagras dilaudandi claros, & probos viros, putare debes, in quo non decipiere, me magis te amare, postquam cognoui tam proum esse in honorem meum, et effundere omnes vires in me commendando: etsi enim me non magnopere auidum gloriae puto, praesertim falsae, tamen fateor me delectatum, cum legi carmen tuū, in quo undiq; collegisti, quae similitudinem aliquam in vita mea ante acta, honesti facti habebant, & umbram tenuem dignitatis. Vale.

Ad IO. BAPTISTAM CAMPEGIVM  
Episcopum Maioricensem.

**Q**UAS ab immenso cumulo, atq; honorum  
Fonte inexhausto tibi singulares  
Seliget laudes, referetq; digno  
Pectine Clio,

Magne CAMPEGI? neq; enim parentis  
Inclyti, & fratrum decus optimorum,  
Ac opes tantas breuiore coner  
Stringere versu.

Nec tuas certo numero carentes  
Penè virtutes memorare cunctas  
Audeam, vanus poli, & Africanas  
Mensor arenae.

Nempè



Nempè si prisca probitate, & aureis  
 Moribus cultum, & facilem te in omnes,  
 Et pium dicam, Sophiae, atq; verae  
 Laudis amantem:

Floribus paucis tenuem coronam  
 Texero; ast illam tibi prorsus uni  
 Debitam agnoscet, nitidis adornans  
 Felsina gemmis.

Nam tui claras animi ipsa dotes  
 (Ut solet) pleno celebrabit ore,  
 Dulceq; & doctum eloquium, styloq;  
 Scripta diserto.

Addet & magno excipiente tota  
 Plebe cum plausu, ut tua liberalis  
 Dextra de multis benè promereri  
 Sedula curet.

Quo quidem humano generi, deisq;  
 Gratius nil est, neque, quàm iuuando  
 Plurimos, diuis homines propinquans  
 Re magis ulla.

Si quis immensum tumet affluentem  
 Copia rerum, sciat infidelis  
 Dona Fortunae sibi non perenne  
 Credita in æuam.

At modum quisquis tenet his fruendi,  
 Nec dolens sumptus refugit decentes,  
 Et suis largè, populoq; partem  
 Pōnit egeno:



*Ille nequicquam tenebrosa duri  
Regna Plutonis metuet, nec ora  
Saena Minois, neque tempus atra o-  
bliuia ducens.*

*Sed, velut celsas Iouis ales oras  
Aetheris penna celeri penetrat,  
Sic levis nubes super ipse, & astra  
Lucida scandet,*

*Hinc & hinc gratas benè deprecantur  
Audiens voces, calamosq; centum  
In suas cernens properare laudes,  
Plectraq; centum.*

*Tanta sed virtus licet inter omnes  
Clarius Phoebi radijs nite scat,  
Ipsius lucem tamen haud frequenter  
Suspicit orbis.*

*Quo magis de te tua gloriatur  
Ciuitas, & te colat, ac celebret,  
Vt tuum nomen Dacus, atque vterq;  
Audiat Indus;*

*O Vir Illustris, citharaq; Vatis  
Digne Thebani, Lachesis seuerae  
Immerens dextra subigi potente;  
Ne decus unquam*

*Tale mortales doleant ademptum.  
Sed Patris summi maneat voluntas,  
Plurimos qui te incolumem, ac beatum  
Seruet in annos.*

Z

QVA



De COSMO MEDICE Magno  
Hettruriæ Duce.

Antonius.

**Q**UA laude, vel quo, Pieri, carmine  
Dignè canemus nomini Itali,  
Hettruriæ nedum potentis,  
Eximium decus, atque robur?

Musa.

Ne tu id pusillis versibus audeas,  
Sed magna Magnum plectra sonent Ducem:  
Quem Mincij cygnus deceret  
Elysij reuocandus oris.

A.

Quis ergò laudes illius inclytas  
Feret per orbem? quis venientibus  
Testabitur seclis recentem  
Impositam capiti Coronam?

M.

Ignare, nescis, Tuscia quot viros  
Alat celebres dotibus ingeni?  
Hi Maximi COSMI tum auitos,  
Tum proprios referent honores.

A.

Non immerentem, Diua, redarguis:  
Verùm hoc roganti dic age, Quis sibi  
Tam grande opus praestantiori  
Pectine concelebrare sumet?

M.

PETRV M inter omnes ANGELIV M meas  
Fouent sorores (tabificus procul  
Hinc liuor esto) insignem Apollo  
Huic ciuharam dedit, atque cantum.

Vatem



*Vatem ò beatum, quandoquidem tuus  
 Tantam cothurnus materiam manet:  
 Tu nomine hoc uno vetustis  
 Haud eris inferior Poetis.  
 Ducem ò beatum, quem magis in dies  
 Caeli benignus prosequitur fauor:  
 Heroibus nã iure priscis  
 Postera te annumerabit aetas.*

IN DIEM FESTUM OMNIUM SANCTORVM

*Q*UID me canorae suauiloquas lyrae  
 Chordas mouentem nunc potius deceat  
 Cantare? dum curis soluta  
 Mens placida fruatur quiete,  
 Et membra nullus sollicitat labor,  
 Non est silendum: te moneo tamen,  
 Versus die festo profanos  
 Abstineas memorare Clio.  
 Quin ò beatae vos animae precor,  
 Altas olympi quae colitis domos,  
 Diui, atq; Diuae, quaeis Nouembres  
 Sacra simul referunt Calendae;  
 Adeste vatis carminibus p̃j,  
 Edatq; vobis auspiciis nouum  
 Rhythmum, & sacras lucas decentem  
 Pulsa chelys grauiore plectro.  
 Teq; inter omnes praecipuam rogo

Z 2

Regina



Regina Caeli; tu modò barbiton  
 Doce tuas laudes sonare,  
 Ingeniumq; fove pusillum.  
 Verùm quibus te laudibus efferam,  
 Quando Angelorum te nequeunt satis  
 Laudare linguae? sed quis unquam  
 Verba queat reperire digna  
 Virtutibus, quae Caelicolum Patri  
 Prae caeteris mortalibus unice  
 Te reddiderunt caram: Ut, alto  
 Consilio reparare lapsum  
 Cùm vellet orbem, condiderit tua  
 Pudica in aluo mirificis modis  
 Suum ipse Verbum, ut se inde veram  
 Indueret hominis figuram?  
 Hinc te piorum coetus honoribus  
 Summi parentem prosequitur Dei,  
 Latèq; terrarum per orbem  
 Maxima templa tibi dicauit.  
 Te, qui molestis opprimitur malis,  
 Et quem periculum commouet imminens,  
 Votis adit supplex. at ipsa  
 Suscipis aure preces benigna.  
 Itemq; vestram sentit opem, integro  
 Qui corde vobis supplicat, ò boni  
 Diui, supremo ab Rege cuncta  
 Cùm prece, tùm merito impetrantes.

O quàm



O quàm libenti nunc animo iuuat  
Delubra quaedam me reminiscier,  
Quae aut Italas vidi per vrbes  
Ipse oculis, alijs vè in oris  
Structa esse miris artibus audij.  
Surgunt ubi arae Caelitibus sacrae,  
Odore fragantes Sabaeo;  
Stant & ubi simulachra Diuûm,  
Vel sculpta laeui marmore, vel cedro  
Dolata, vel depicta coloribus;  
Murisq; votivae tabellae  
Innumerae, ac laqueare pendent.  
Hic nempe priscis mos patribus fuit;  
Hunc deinde in omni tempore postera  
Seruauit aetas; hunc minores  
Nos etiam retinere par est.  
At improborum concidat insolens  
Manus, vetustos quae studet impiè  
Delere ritus, & verendas  
Effigies violare Diuûm.  
Nos verò honorem imponere debitum  
Iuuabit aris; nos venerabimur  
Diuos decenter, sicut olim  
Edocuit pietas auorum.  
Sic vos benigni Caelicolum chori  
Iuuate vestra Christicolae ope,  
Quicunque vobis dedicatam  
Rite diem celebrare gaudent.

FESTVM



IN DIEM FESTVM DIVE  
MARTINI.

**F**ESTVM concelebrans diem  
 MARTINI, grauibus non ego poculis  
 Fundam, vina sodalibus,  
 Indulgens genio perditus, & iocis,  
 Nec lautas epulas amans,  
 Ut vulgus rude mos impius edocet.  
 Cultoresne igitur Dei  
 Bacchantum indecorem ritum imitabimur?  
 Istum non ab olympijs  
 Diuus respiciens sedibus approbat  
 Cultum, & barbaricos modos  
 MARTINVS. qui agitans duriter admodum  
 Aeuum, sobrius, & vigil,  
 Non his delitijs CHRISTI aluit gregem.  
 Rex Caeli & mihi, & omnibus  
 Da, quaeso, melius consiliu pjs.  
 Me sacrata tibi, & tuis  
 Diuis Templa frequenter iuuat ingredi,  
 Et puris manibus sacro  
 Frontem spargere rore, atq; animo preces  
 Casto fundere supplices.  
 Verum ad laetitiam sobrius interim  
 Si mentem furor excitet:  
 Dum te, ò perpetuae laetitiae dator,

Ac



*Ac laudes resonet tuas,  
Dulcem non renuam tendere barbiton.*

*In diem Festum D. NICOLAI Myræ  
Episcopi, & Confess.*

**O** PTATAM, socij, bruma refert diem  
Festam NICOLEO. hanc agedum sacris  
Ut par est, celebremus  
Unà laudibus, & modis.  
Pompas ne pigeat ducere supplices,  
Concordiâ preces fundere pectore,  
Quas Rex summus olympi  
Aequis audiat auribus.  
Ardentes manibus tollite iam faces;  
Ad templum iuvat ire. incipe iam puer  
Crines cincte virenti  
Lauro promere carmina.  
Dic ternos tacita nocte pecuniae  
Porrectae loculos sollicito patri,  
Castis dote pudicos  
Ut natis generos emat.  
Die saevo innumeros aequore navitas  
Servatos. tumidis dic quoq; fluctibus,  
Ereptasq; furentis  
Euri turbinibus rates.  
Nostris nec fileas auxilium choris  
Praesenti tories numine praestitum,

*Dum*



*Dum rerum inscia pubes  
 Incerto ferimur pede.  
 Patronum meritò te pueri vocant,  
 Solennemq; tuam ritè colunt diem:  
 Nam te, Diue, sequuntur,  
 Et morum, & studij ducem.  
 Adsis supplicibus sancte pater tuis,  
 Et nostri faueas cursibus ingeni;  
 Quin haec laeta quotannis  
 Da ferre incolumes sacra.*

Ad LAVRAM BATTIFERRAM  
 AMANATAM.

**E** GREGIAE formae laudes, seu carmine prisco  
 Concelebratas, siue recenti,  
*Vt lubet assumat mulier sibi pulchra licenter,  
 Ac multum se iacet in illis:  
 Dum nitidis oculis, & laevi gratia fronti,  
 Atque comis infederit aureis.  
 Sed mox paulatim deflorescentibus annis,  
 Aut ultro, aut inuita reponet.  
 Ast animi quaecunq; bonas est foemina dotes,  
 Et pectus sortita pudicum:  
 Haud quaquam tristis metuens erit illa senectae,  
 Nec cultu exultabit inani.  
 Quin Regum quauis vxore beatior aeuum  
 Transiget. Vt facere admiramur*

Tete



*Tē te ope nobilium virtutum LAVRATUARUM.*

*Quarum splendorem haud nitor auri,  
Nec gemmae equiparare valent, quas utraq; plu-  
Diversis fert India ab oris. (res*

*Iure igitur tanto te Flora illustris honore*

*Excipit, & quocunq; locorum*

*Tusci Heliconis adit praeclarum nomen, eodem*

*BATTIFERRAE fama peragrat.*

*Quod nostra haec aetas, melioribus amula seclis*

*Graiorum, te laeta vocare*

*Iandudum Sapphona suam consuevit, in uno*

*Hoc etiam felicior illis;*

*Nam cultrix tua Musa sacri intemerata pudoris,*

*Carmina castis auribus usque*

*Digna sonat, laudesq; Dei plectro aptat Etrusco,*

*Quas numeris caelestibus olim*

*Iessaeus cecinit Vates. quo hinc gravior aura*

*Te sequitur, maioraq; longē*

*Praemia deinde manent: aqua cum lance rependens*

*Facta benè; ac benè dicta piorum*

*Rex Caeli, eternis redimitam tempora fertis*

*Aetheria te in sede locabit:*

*Angelicis ubi iuncta choris, animisq; beatis*

*Perpetuos modulaberis hymnos.*

*Sed tu LAVRA tamen, dum mente haec concipis al-*

*Exiguos ne despice flores, (ta,*

*Quos tibi, ad indicium studij, atq; ingentis amoris,*

*Aa Legit*



178 ANTONII GIGANTIS

Legit parui Musa Gigantis,  
Dum Prato in viridi terit ocia, nec sibi visus  
Est laudum expers esse tuarum;  
Nobilis Urbini cum non procul Urbe Penates  
Ipse suos veneretur, apricas  
Qua valles secat, & Semproni moenia laeto  
Subter labitur amne Metaurus.

De Coniugio FRANCISCI MARIAE Urbinaturn  
Principis, & LUCRETIAE ATESTINAE.

**N**OBILIVM eximias laudes, & fortia facta  
Heroum, claramq; vetusto  
Sanguine progeniem, armis, imperioq; potentē,  
Tum plectro, tum carmine digno  
Dicere, formosus paucis concessit Apollo.  
Me verò tam insana cupido  
Non agit, ut sperem QUERCVS ingentis honores  
Exiguus comprehendere chartis.  
Pauca tamen liceat laetanti corde profari.  
Dum felicia fata Metauri  
Admiror: qui Italos inter celeberrimus amnes  
Laetitiae dans signa recentis,  
Splendidior solito, ac penè exultantibus undis  
Adriacum procurrat in equor.  
Cum coetus passim per ripas cernat ouantes  
Laetis indulgere choreis,  
Et festos agitare dies, ac instar olorum

Ferre



*Ferre sui super æthera cantu*  
 FRANCISCI MARIAE laudes, eiusq̃ beatos  
 Certatim celebrare hymenaeos.  
 Salve dijs gratum superis, ac nobile flumen,  
 Tuq̃ ò felicissima tellus  
 Salve, haud obscuris meritis dignissima tanto  
 Principe. quem florente iuuenta  
 Ingentes decorant animi, moresq̃ benigni,  
 Et prudentia grandior annis.  
 Cuius & egregias mirata Hispania dotes  
 Nuper magno excepit honore.  
 Hinc etiam Italia illum planè suspicit omnis,  
 Magnanimùmq̃ agnoscit auorum  
 Dignum stirpe genus, seu quâ gens FELTRIA nomen  
 Dat ducibus memoranda vetustis:  
 Seu quâ alto gemini clarent de ROBORE summi  
 Pontifices, & Martia proles.  
 Fortunatae Vrbes, queis tam felicia Parcae  
 Stamina neuere, atque secundo  
 Numine Caelicolum longa iam pace quietis  
 Nunc GVIDO moderatur V BALDVS  
 Lenibus imperijs, felix pater, inclyta cuius  
 Insistens vestigia natus  
 Sceptra reget. Quidnam re nobilis ora Pisauri  
 Non olim sperare decebit  
 Illius auspicijs? alij ditissima regna  
 Iactabunt, finesq̃ patentes:

Aa 2 Tu



Tu tamen hoc proprio superum laetabere dono,  
 Quod tales tibi semper habere  
 Dent dominos: quorum meritis (quando optima lar-  
 Compensant Dij facta piorum) <sup>ge</sup>  
 En tibi, cum toto saevit Mars tristis in orbe,  
 Praecipuam dextro omine fundunt  
 Laetitiam, priscosq; novis splendoribus augent.  
 Dum LVCRETIA, clara propago  
 Stirpis ATESTINAE, gemmis insignis, & auro,  
 Ac procerum comitata cateruis,  
 Coniugis eximij gaudens subit aurea tecta.  
 Quam genus alto à sanguine Regum  
 Ducentem exornat miro Venus alma decore:  
 Et centum cui pectus honestum  
 Artibus erudiunt Pallas, doctaeq; sorores.  
 Huius in aduentu omnia plausus  
 Litora pulsa sonant, amnes, collesq; virentes,  
 Et late nemus omne resultat.  
 Quò mage fausta licet praenoscere fata nepotum,  
 Quos terrae, caeliq; fauores  
 Praeueniunt tanti. Soboles hinc maxima surget,  
 Quae quondam protendat auitum  
 Imperium, & decus augeat immortale parentum.  
 Sic, o sic cuncti omnia firment  
 Caelicolae, inq; dies ipsis nova gaudia sponsis  
 Amplificent, populoq; fideli.

5. Aprilis 1570.

NVM



Ad IULIVM FELTRIVM de RVVERE  
Cardinalem Ampliss.

**N**VM me, quòd meritis pro tantis, Inclyte IULI,  
Grates tibi non egerim  
Praesenti, nec signa humilis dederim vlla  
Vel fronte, vel curuo genu, (clientis  
Ingratum dices? nec dignum, quem amplius ipse  
Favore tuteris tuo?  
An potius (tua quae bonitas est plurima) agresti  
Parces pudori, & quem semel  
Officijs vltro fouisti, hunc protinus omni  
Iuuare mox perges ope?  
Nempè tui hoc animi est proprium, ingenijq; benigni,  
Mutare nec te erit potis  
Aut mens cuiusquam rudis, aut inscitia rerum,  
Aut benefici obliuio.  
Ast ego, quàm meriti immemoris tibi nomine fiam  
Suspectus, optarim prius,  
Cuncti vi inexpletis odijs hominesq; deùmq;  
Me prosequantur numina.  
Hac igitur sine me tutam spe ducere vitam,  
Quocunque fata deferent;  
Vt me, seu primo reuocatus amore Metauri  
Sedes paternas incolam:  
Seu iubeant alia dij me consistere terra,  
Credas tibi addictissimum.

Quam



*Quam si ego te veniam exoro, iucundius aures  
 Beatusq; transigam;  
 Quàm si diuitijs pleno fors aurea cornu  
 Me ditet, atque honoribus.*

Ad GEORGIVM GOTIVM Ragusinum.  
 Romam.

**G**OTI, meorum amabilissime omnium  
 Sodalium, quot nunc mihi  
 Sunt, aut fuere, aut post erunt, dum spiritus  
 Haec membra vitalis reget:  
 Cur literas sitire me dulcissimas  
 Diutius sinis tuas?  
 Nam quinq; iam ferè peractis mensibus  
 Tuum quoror silentium.  
 Nunquid tibi fluxisse me dicam sinu?  
 Sed absit, hoc ut suspicer,  
 Notamue turpem amico inuram candido.  
 Quid ergò? num te forsitan  
 Minus Valere cogitem? at menti omina  
 Dij tristia auertant piae.  
 Quin optime tibi esse, teq; mutuo  
 Gigantem amore prosequi,  
 Tam continenter credo, quàm lubens velim.  
 Ast interim mihi malè  
 Scito esse, GOTI: non quòd artus langueant,  
 Sed quòd laboret anxia

*Mens,*



*Mens, dum tabellas tandiu expectat tuas.*

*Quod te per omnes Gratias  
Oro, hanc Vt illi deleas molestiam.*

*Sic te vicissim caelites  
Ament benigni, ac iam tibi diutinum  
Benè explicent negotium.*

Ad CAESAREM CAVANILIVM.

**I**NGENTES CAVANILIO  
Grates Musa, precor, nunc age CAESARI,

*Quem non esse mei sinunt  
Oblitum spatia aut temporis, aut loci.*

*Et nuper mihi pyxidem  
Misit perlepidam, ut pluribus undiq̃  
Musaecum decoret meum:*

*Quam longè pateris me iuuat aureis  
Praeferre, atque ebori Indico  
Caelato egregia Praxitelis manu:*

*At me obstrinxerat antea  
Multis ille quidem nominibus sibi;*

*Dum sermonibus, & iocis  
Me dignat, placidusq̃ officijs fouet.*

*Ergò illi magis ac magis  
Me addictum fateor, nec meriti immemor*

*Lethes lurida flumina  
Tranabo; & mea si quid poterit lyra,*

Nomen nobile CAESARIS

*Ediscet superum lius, et inferum.*

AL-



Ad ALBERTVM ALBERTANVM Collensem,  
Prætori Pratenſi aſſeſſorem.

**O** COLLIS altis nobilior iugis,  
Cingunt potentem quot quot *Hetruriam*,  
Inſignium d' ſator virorum,  
Fertilibusq; opulente glebis;  
Hunc laetus hymnum ſuſcipe, quem ſacras  
Biſenti ad vndas condidimus, tuum  
Praeconio Ciuem efferentes  
Non humili, neq; laude ficta.  
Praeclaram in illo nanq; peritiam  
Boniq; & equi dicimus inſitam,  
Mentemq; ab omni labe tutam,  
Muneribusq; manum abſtinentem.  
His nempè quiſquis praeditus artibus  
Iudex tribunal ſcandet, is omnium  
Hinc inde virtutum cateruas  
Ordine conſpiciet decoro  
Sibi aſſidentes; nec ſuperùm Pater  
Nequicquam ab altis verticibus poli  
Spectabit illum iudicantem,  
Aurea nec Themidis puella.  
Quae, ut fertur, olim moribus improbis  
Inſenſa terras deſeruit graues,  
Caelumq; ſublime, & parentis  
Sidereas repetiuit arces.

ALBER-



ALBERTE sed tu, quiq; tibi pares  
Intaminatos iustitiae gerunt  
Fasces, eam feliciori  
Omine conciliatis orbi.

Dum nec seueras parcitis in reos  
Inferre poenas, nec finitis mala  
Quenquam opprimi fraude innocentem,  
Aut hominum rabie potentum.

Vos & benignam patre carentibus  
Praebetis aurem; vos viduas (pium  
Opus) tuemini, aduenasq;  
Praesidio, atq; inopes fouetis.

Dij magna vobis praemia pro bene  
Factis rependant; praemia, quae vorax  
Nec tempus vnquam auferre possit,  
Nec Lachesis violenta dextra.

Tum vestra doctis nomina paginis,  
Vestrasq; laudes carmine praedicet  
Amabili, cuicumq; dexter  
Cynthus adfuerit canenti.

Me nanq; grati (quicquid id est) tibi  
Praestasse amici officium iuuat,  
Meisq; te ALBERTANE dulcis  
(Quod potui) voluisse paruis

Ornare scriptis; dum populus frequens  
Pratensis actus approbat integros,

Tuamq; procuracionem  
Egregio celebrat fauore.

Bb Mul.



AD INGHIRAMVM INGHIRAMIVM  
Pratensem.

**M**ULTAM INGHIRAMO dic Musa rogata salu-  
Sodali amabilissimo. (tem  
Quem modo languentem quamuis inuisere ces-  
Causa impeditus non leui: (sem  
Non tamen ille mihi ex animo, non illius unquam  
Ab ore nomen excidit.  
Atq; haec vera quidem testantem nomine nostro  
Te, non sinet RENERIVS  
Mentiri, nostri syncerus pectoris index,  
Idemq; consors omnium  
Sermonum. At si quo obsequio me posse leuare  
Nunc illius morbum rear:  
Haud equidem pigeat totas assistere noctes.  
Quin frigus acre perferens,  
Iussus in Alpibus etiam nunc montibus ausim  
Herbas salubres quaerere.  
Sed quando auxilium illi ferre aliunde nequimus,  
Non interim cessabimus  
In vota, & caeli supremum poscere regem;  
Vt pristinas ocysime  
Restituat vires aegro roburq; sodali.  
Sic me pia aure exaudiat,  
Atq; reum voti genitor me reddat, ut ipse  
Promissa persoluam libens.

QVEM



## Ad Eundem.

**Q** VEM modò sollicitum, ac languentem tristis adi-  
 Nunc laetum, recteq; valentem (bas,  
 Tu quoq; laeta meum INGHIRAMVM inuise  
 Quosq; recens mandauit honores (Thalia:  
 Magnanimus Princeps, soboles Magni inclyta Cos  
 Quod poteris, gratare merenti. (MI,  
 Sed caue, ne longo frustra sermone moreris  
 Res multas, abitumq; parantem.  
 Quin satis officio paucis fecisse putato:  
 Nanq; tuis augescere verbis  
 Iam nequeunt nostri, nec item decrescere amores.  
 Quod felix, faustumq; precata  
 Illi iter, ac laetos fasces, haec tum breuis adde.  
 Annua te, INGHIRAME, tenebit  
 Praetura absentem Fiusani: Antonius Urbem  
 Felsineam fors antè reuisset,  
 Quàm Phoebi currum furiet vis saeua Leonis.  
 Sic diuersae hoc tempore habebunt  
 Vos terrae; sed amor spatijs non diuidat ullis,  
 Dum reduces iterum, incolumesq;  
 Ambos Caelicolae Bisenti ad flumina sistant;  
 Cum lepidisq; sodalibus unà  
 Dulcia libantes interdum pocula Baccho,  
 Villula vos Pimontis obumbret.



Ad ACHILLEM BECCATELLVM  
Cæsaris Filium.

**S**IT acre quamuis ingenium tibi ,  
Dilecte ACHILLES, adsit & optimas  
Propensa ad artes singulari  
Munere Caelicolum voluntas;  
Tamen recessus Pieridum sacros  
Adire nullo cum duce praeuio  
Frustra laborabis, nec unquam  
Castalij hauseris ore fontes.  
Errore multos nam via lubrico  
Anceps fefellit, nec minus in dies  
Fallet, sibi dum quisque fidens  
Gaudet iter tenuisse rectum.  
At quem recursus turpis ad ultimum  
Limen reducit, sibilus, & procax  
Viciniae risus dolentem,  
Et nota consequitur perennis.  
Non expedito tramite certior  
Te sistet index, quam veterum aurea  
Vestigia: haec insiste fortis,  
Huc acies, animumq; flecte.  
Hos te sequentem non pudor, aut metus  
Vexabit vlllo tempore deuium;  
Sed dulcis hinc victorem oliua  
Te manet, & requies laborum.  
Qui destinatum dirigit ad scopum

Certus



Certus sagittas, proposito minus  
Aberrat. ergo aude optimos iam  
Nunc studio puer æmulari.

IN OBITU MARCI TVLLII BEROI  
Bononiensis.

**M**ARCI funera TVLLII,  
Quem longè et propè deflent Heliconia  
Quot quot sacra petunt iuga,  
Lugubri ipse etiam carmine prosequar;  
Etsi, dum capitis mihi  
Tam cari memoro sæpius exitum,  
Maior me cruciat dolor.  
Sed quæ non animo semper erit tua  
Impressa effigies meo  
BEROE? aut spatium quod mihi temporis  
Posthac tam breue defluet,  
Quin docti usque tui sim alloquij memor,  
Musæq;, & lyrae amabilis?  
Qua, campos ubi opimos minor irrigat  
Rhenus, nulla sonantior  
Molles detinuit Naiadum choros.  
Infelix hominum genus,  
Subiectum & miseris conditionibus;  
Cui nullo Superi bono  
Dant longis proprio temporibus frui.  
Eheu mors nimium potens,

Et



190 ANTONII GIGANTIS

Et nobis nimium immitis, & inuida,  
 Quanto moenia Felsinae  
 Nunc moerore reple; quo gemitu optimam  
 Matrem conficis, & piam  
 Vxorem, & puerum spem patris vnicam.  
 Me verò vt facis intimo  
 In corde assiduam ferre molestiam.  
 Ergò exinde Bononiam  
 Visens, te, vt soleo, non ibi, candide  
 Tulli, conueniam? ò diem  
 Atrum, quo sine te conspiciam tuas  
 Aedes, hospitium modò  
 Musis, & lepidis dulce sodalibus.  
 Sed tu, quandoquidem nequis  
 Flendo Caelicolùm flectere numina, &  
 Fati iura resolvere,  
 Intermitte grauem barbite naeniam.

Ad OLIVERIVM  
 Fratrem.

**I**AM iam seuerum rumpe silentium  
 Clio, & iocosam nunc quoq; barbiton  
 Clauo refigens affluentes  
 Laetitia meditare versus:  
 Quando acriori solitudine

Frater



Frater solutum me fore nunciat,  
Iuncta viro frugi, ac honesto  
Connubio stabili sorore.  
Om̃i suaues fratris epistolas,  
Longo & cupitum tempore nuncium,  
Iucundior quo nullus unquam  
Antè meas hilarauit aures.  
Tandem benigni Dij pia vota, Dij  
Bonae puellae, matris & optimae  
Exaudierunt, exituq̃  
Damna morae reparant secundo.  
Agè ergò vestes exue lugubres  
Germana dulcis, teq̃ nitentibus  
Stolis amictam ostende sponso  
Ducq̃ libens hilares choreas.  
Audis canentes dulce puellulas?  
Audis sonora cum fide tibiam?  
Cernis faces? cernis cateruam?  
Sponsus adest, age laeta prodi.  
Sponsus, beati contulerunt bona  
Cui multa diui, sanguine nobili  
Sato, cui & alma Astraea dignos  
Iam peperit, parietq̃ honores.  
Nunc tu quae in imo gaudia pectore  
Dilecta mater concipis? Vt preces,  
Vt gratias, Vt thura ad aras

Fers,



Fers, genero decorata tanto?  
 Hinc frater & te quàm pote maximè  
 Amo merentem. tu mihi ab unguibus  
 (Sic est) tenellis praebuisti  
 Te studio, atque animo parentem.  
 Per te Patronum sortior optimum  
 Primum quod inter munera Caelitum  
 Repono: per te nulla mentem  
 Cura mihi subijt molesta.  
 Nam tu paternam rem benè prouidus  
 Curas, tuorum & subsidio domum  
 Leuas laborum: idem & sorores  
 Dote bonis socias maritis.  
 Sume ergò, multis quae tibi millibus  
 Pro gratijs nunc carmina mittimus  
 Tuscis ab oris, gestiente  
 Laetitia modulata plectro:  
 Cùm te viderer cernere, & alloqui,  
 Tecumq; eodem tempore nuptias  
 Ornare: sic ingens repente  
 Me mihi surripuit voluptas.  
 O si reducant ad patrios lares  
 Me fata quondam, & sede quiescere  
 Certa sinant; ut laetus ora  
 BENTIVOLI inspiciam, utq; tecum  
 Eius libenter colloquijs fruam.  
 Ut me iuuabit grata suburbia

Aloysius  
 Bentiuolus  
 Iuriconsul.  
 Forosem-  
 gromensis.

Lustra-



Lustrare vobiscum, Metauri  
 Et virides peragrarè ripas,  
 Collesq; apricos. Saepe Bionium  
 Visemus, & trans flumen agellulum,  
 Nunc in virenti confidentes  
 Gramine, nunc nitido in recessu.  
 Tunc & Camoenam vos propius meam  
 Quandoq; magnas dicere FELTRII  
 Laudes IVLI exaudietis:  
 Utinam cithara, atq; plectro,  
 Dignisq; tanto Principe versibus.  
 Laudare quisquam si tamen evales  
 Dignè virum virtute clarum  
 Eximia, eximioq; honore.  
 Quem Roma primis ordinibus patrum  
 Spectat sedentem, & dotibus inclytis  
 Latè relucentem, ut sub axe  
 Emicat Arctophilax sereno.  
 Nil ille celsa mente agit prius,  
 Quàm plurimis prodesse clientibus  
 Et maximis Sempronienſes  
 Officijs cumulare ciues.  
 Illius & nunc auspicijs chori  
 Noſtras ouantes laetificant domos:  
 Quare ille nobis hoc vel vno  
 Nomine ſemper erit colendus.  
 Sed tu decentem pone modum meae

Cc

Nimis

Iulius Fel-  
 trius de Ru-  
 vere Card.



*Nimis procaci Musa licentiae;  
Nam gaudio exultans recenti  
Mens refugit reperire finem.*

Ad NICOLAVM TALAMIUM Presbyterum  
Regiensem.

**N**ON ego, quae hospitibus proceres dant splen-  
Eualeo tibi munera paruus (dida magni,  
Largiri. at nostro ne non donatus abires  
Musaeo, dilecte sodalis;  
Pauca haec, exiguum monimentum ingentis amoris,  
Carmina dat tibi ferre Thalia:  
Carmina Pierio nequicquam sparsa lepore,  
Nec verbis contexta disertis;  
Nomine at hoc uno fors non ingrata futura,  
Quod calamo sum scripta Gigantis.  
Cuius amore, cadens caelo nix lenta quieto,  
Candidior non insidet aruis.  
Hic Venetis olim cum primum coepit in oris,  
Tam altas nostro in pectore fixit  
Radices, inde ut nequeat diuellier unquam.  
Hinc est, quod mihi tempore nullo  
Effluis ex animo, seu dulcis patria, siue  
Te Ferraria magna moratur:  
Seu cum MARTELLO docto, lepidoq; patrono  
Sacra tenent te moenia Romae:  
Vnde ego post sextum nunc te laetissimus annum  
Accipio

Franciscus  
Martell<sup>o</sup> E-  
piscop. Re-  
gienfis.



Accipio incolumem. ò mihi faustum  
 Hunc, hilaremq; diem, tua quo exoptata videre  
 Contigit ora, audireq; verba.  
 Iam modò te aspiciens possum quoscunq; labores,  
 Curasq; obliuiscier omnes.  
 Quòd si perpetuam hanc Superi dent esse benigni  
 Laetitiam, nihil amplius optem.  
 Tu verò vixdum posita en calcaria rursum  
 Irrequietis calcibus aptas,  
 Vt pinguem Eridanum, atq; Estensia regna reuifas,  
 Et patrios exinde penates.  
 Cui desiderio planè dulciq;, pioq;  
 Ipse meum haud praeponere tendam:  
 Nempe exorando, ut tibi mecum pluribus vnà  
 Hic libeat remanere diebus.  
 Quin animo praecepta senis memoranda reuoluens  
 Maeonij, ut laetus venientem  
 Excepi, sic te patiar non tristis abire.  
 Infelix ergò, atq; secundo  
 Omine; & ad sanctas ubicunq; accesseris aras  
 Facturus pia sacra sacerdos:  
 Tunc (tua quae bonitas, Talami, est plurima) nostrū  
 Praecipue reminiscere nomen.

Ad Amicum Epitaphia scribentem.

QVAE noua te pietas cogit, quae cura, quod arctū  
 Amoris urget vinculum?

Cc 2

Cuncta



*Cuncta tuis passim scriptis onerare sepulchra  
 Omni carentibus sale?  
 Non ne esset satius, quod nos te hortamur amanter,  
 Ut tu tibi nunc conderes  
 Viuens, quae tumulo inscribi post funera velles;  
 Nec posteris relinqueres  
 Cura hanc? quam, mihi crede, sibi si sumere quisquã  
 Volet (quod auguror) mala  
 Multa, nec immerito mordaci carmine dicet  
 De te. Ergo si sapias miser,  
 Mitte aliena tuis scriptis turpare sepulchra  
 Posthac, tibiq; consule.*

*Ad PHILIPPVM GERIVM Episcopum  
 Affiliatam.*

**N**UNC imbre tristi, flamine nunc truci  
 Iandudum inique nos Boreas premens,  
 Vix Baziano rure tandem  
 Cogit abire minus volentes.  
 Sic molliori tempore amoenitas,  
 Et grata iuuat temperies loci,  
 Tuis videri nempè digni  
 Lumimbus venerande GERI.  
 Circumuolabunt iam volucres vagae  
 Impune saepes, prataq; & arbores,  
 Nec rete, nec viscum tenacem,  
 Nec celeres metuent sagittas.

Magna



*Magna vnde earum cum nece plurimos  
Nobis voluptas maxima per dies  
Obuenit, exercente membra  
Perlepido, ac salubri labore.  
Orus apricum quàm repetam libens  
Mox te, sereni cùm aura Fauonij  
Nouos tibi inducet colores,  
Arboribusq; comas reponet.  
Sic tum beati dij quoq; sospitem  
Hic te intueri dent mihi, candide  
Patrone, perq; vt hanc opimam  
Planitiem comiter vagantem.  
Curis solutus tum grauioribus  
Gaudebis amplae mirifico domus  
Prospectu in agros, elegantum  
Et serie, & studijs nepotum.  
Nostrae nec interdum fugies rudem  
Cantum Camoenae; quae (tibi gratia)  
Dudum ocio dulci, ac honesto,  
Et placida fruitur quiete.*

IN IOANNEM AVSTRIACVM CAROLI V:  
Imp. Aug. F.

**H**EROA & alto sanguine, & incluta  
Virtute clarum, qui modo barbarum  
Capta & fugata classe magnis  
Hesperias decorat trophaeis

*Laetanti*



Laetanti & ore, & pectine concinens,  
 Dicam decentes principio tibi  
 Rex CHRISTE laudes, qui perenne  
 Praesidium es, columnęq; nostri.  
 Tuae refertur nanq; potentiae  
 Accepta tanti gloria praelij:  
 Tuae Crucis vexilla nobis  
 Eximiam hanc peperere palmam.  
 Nam tu sacrato foedere Maximum  
 PIVM, & potentem fortis Iberiae  
 Regem PHILIPPVM, principemq;  
 Magnanimum Veneti Senatus  
 Mirę obligasti. tu ducibus bonum  
 Rebus gerendis consilium, & piam  
 Mentem, atq; dextras praeualentes,  
 Militibusq; animos dedisti.  
 Tibi imperanti paruit illicò  
 Ventusq; & aequor, cum tremor, et metus  
 Inuasit hostes, tot per annos  
 Innumeris spolijs superbos.  
 Suisq; tandem foedifragi Scythae  
 Docti ruinis, nos tibi sentiens  
 Fuisse cordi, quem piorum  
 Immemorem fore cogitabant.  
 Tibi ergò in omni tempore debitas  
 Pro singulari munere gratias  
 Reddemus, & sacris honorem

Prae-



*Praecipuum faciemus aris.  
At sedibus iam cantum ab Olympijs  
Clio pudenter retrahere, lucida &  
Conuexa contemplare mecum:  
Quamq̃ alijs magis emicantem  
Stellam notabis, AVSTRIACI decus  
IOANNIS illi confer: in infimo  
Hoc orbe quando ipsius aequaè  
Omnia sunt meritis minora.  
Proinde paulum non aberit scopo,  
Excelsa laudum culmina qui petet  
Tanti Ducis, quanquam arte pollens  
Pindarica benè tendat arcum.  
Verum quis addat lucem Hyperioni?  
Quis caelum, & omnes aetheris ambitus  
Metetur? aut maris procellas  
Dinumeret, Lybicasve arenas?  
Nempe haec profari me decuit, tuos  
Dum strictim honores carmine persequor;  
Ne quando te illustrare dicar  
Exiguus voluisse chartis,  
O clara imago, certaq̃ CAROLI  
Proles, ab undis occiduis recens  
Exorte Sol, eclipsim Eoae  
Perpetuam imposituræ lunae:  
Obtusa quae iam cornua contrahit,  
Nec non repenti sanguine turbida,*

*Quo*



Quo caede inaudita refuso  
 Ionij rubuere fluctus.  
 Ubi supremi militiae ducis  
 Mirè executum munera te refert  
 Dispersa iam totum per orbem  
 Fama, iuga exsuperans, & vndas.  
 Ast ipse non tam praeualidas manus,  
 Et forte pectus, dulceq; milites  
 Sermonem ad arma concitantem,  
 Consiliumq;, animumq; magnum  
 Admiror: illudq; facinus, pio  
 Dignum te alumno Caesaris, & Dei  
 Cultore. nempè quòd supernum  
 Auxilium ratibus, virisq;  
 Duxisti, & omni praesidio prius,  
 Quodcumq; summus Romulidum Pater,  
 Fratrisk; regna, & Adrianum  
 Imperium tibi contulerunt.  
 Praeconijs te multimodis licet  
 Vates amici Pieridum, & tuas  
 Cùm pace, tùm bello enitentes  
 Concelebrent sine fine dotes.  
 Non vlla cerè sic tibi splendida  
 Crines ouanti laurea vinciet,  
 Vt illa, quam summè decorant  
 Imposuit pietas coronam.  
 Haec gloriosos semper in arduis

Bellis



Bellis triumphos rettulit optimo  
Quondam parenti . testis Albis ,  
Qui ( insolitum ) vada persequentis  
CHRISTI rebelles obtulit . ipseq;  
Sol testis , illo qui I O S V E M die  
Spectans secundo praeliantem  
Segnior oceanum subiuit .  
Quid ergò tanta te duce praedito  
Virtute nobis post modò non erit  
Sperandum ? hyems nimboſa , & Eurò  
Cedite iam Zephyris ſerenis :  
Sterne aequor undas : en iuuenis Deo  
Dilectus hoſtes rursus in impios  
Praeſtitit inuictas triremes  
Soluere Trinacrijs ab oris .  
Videre lembos iam videor citos  
Cypri receptae currere nuncios ,  
Graecumq; , & Afrum audire litus  
Chriſtiadum imperijs ſubactum :  
Et quicquid omnes fatidici canunt ,  
Vno ore noſtris proſpera claſſibus  
Praenunciantes ; at ſelimo  
Exitium , miſerasq; clades .  
Sic ò tuorum vota fidelium  
Exaudi Olympi rector , & annue ,  
Vt finis hoc ſpe maius omni  
Principium melior ſequatur .

Dd

Quò



*Quo vera latè religio, & tuum  
Nomen colatur, quoq; recentibus  
Subinde palmis, atq; opimis  
Clareat AVSTRIACVS triumphis.*

*In diem Festum D. NICOLAI Myræ  
Episcopi, & Confess. MDLXXI.*

**F**ESTA lux Diui NICOLAI ad aras  
*En redit, mecum celebrate laeti  
Quotquot ipsius properastis ædem  
Visere sacram.*

*Nunc boni vos ò pueri, & puellæ,  
Vos & ò Matres, iuvenes, patresq;  
Hanc piè, & purè colite, atq; inanes  
Mittite curas.*

*Garrulas hîc nos cohibere linguas,  
Et vagas par est reuocare mentes:  
Ah leues absint, precor, hinc susurri,  
Vanaq; verba.*

*Haec Dei summi domus est, honores  
Hanc decent, odesq; sacrae: benignas  
Ergò nunc praebeate mihi, meisq;  
Cantibus aures.*

*At chely ò ne te pudeat sonoras  
Pectini chordas sociare, dum nos  
Ipsius Diui meditamur altas  
Dicere laudes.*

*Nam*



Nam David vates quoq; fertur olim  
Ad lyram certis cecinisse metris  
Misticos hymnos, quibus uniuersus  
Vtitur orbis.

Sed prius quidnam referam? an parenti  
Anxio iactos loculos sub atra  
Nocte, quo natis emeret pudica  
Dote maritos?

Te te id inprimis facinus benignum  
Diue clarauit viridi iuuenta,  
Cum ducem iam tum sequerere toto  
Pectore CHRISTVM.

Haec fuit quondam tibi prorsus una  
Cura, de multis bene promereri,  
Ac opes sic te penitus paternas  
Fundere iuuat.

Mox tuae postquam Patarae fuisti  
Vtilis multum, tua ut eniteret  
Latius virtus, populus Myrensis  
Numine sancto

Percitus, rerum sibi te sacrarum  
Praesidem afsiuit, regimenq; magno  
Urbis applausu tibi deneganti  
Detulit vltro.

Iam quis ingentes numeret labores  
Pro grege exhaustos, animiq; curas,  
Dum lupos arcens aleres tenellos  
Prouidus agnos?    Dd 2    O My-



O Myram planè nimium beatam,  
Ora dum tanti patris & magistri,  
Sancta q̃ illius documenta quondam  
Cernis, & audis.

At nimis versa vice nunc misellam  
Te dolens dicam, Lyciamq̃, & omnes  
Proximas oras nimium misellas  
Usq; vocabo;

Donec à falso Mahomete latam  
Respuant legem, indecoresq̃ ritus,  
Et pie, ac rectis animis IESU  
Nomen adorent.

Magna sed Regis bonitas superni  
Forsitan caecas miserata gentes  
Nunc eis summi dabit intueri  
Lumina Solis:

Quando iam nostras adeò secunda  
Aura fert classes, Asiam petentes,  
Cultū ibi ut priscum renouet, Crucisq̃ in-  
signia figant.

Sic Deus faxit cito, sic precemur,  
Ut bonos coeptus melior sequatur  
Exitus: sic tu Nicolae nostra  
Vota, precesq̃

Perfer ad sanctae Dremitatis aures,  
Semper & nobis faueas patronus,  
Virtus grati referamus aris  
Sacra quotannis

QVA



Ad GABRIELEM PALAEOTVM Card. ampliss.  
ac Bononiæ primum Archiepiscopum.

**Q**VALIS Arctos rediens ab Austro  
Nunc plagas grata vice Sol renisit,  
At q; humum leni recreans tepore  
Vestit, & ornat:

Ad tuam felix reditus cathedram  
Pontifex magne, exhilarat decorae  
Felsinae vultus, animisq; laeta  
Cuncta reducit.

Sospitem nunc te pia sponsa plausu  
Excipit gaudens, venerata sacrum,  
Quo recens ornas humeros, monile,  
Sancta q; summi

Regis elata ante oculos Trophaea:  
Corde quae puro tamen ipse semper  
Sculpta circumfers, humiliq; seruas  
Mente reposta.

Nae tuae iuge est pietatis vnum  
Hoc opus, votumq; iuuare caram  
Optimis non tam patriam institutis,  
Consilijsq;

Quam nouis semper decorare donis:  
Insubrum ut pridem rediens ab oris,  
Cum sacros Diuum cineres, & ossa  
Sacra tulisti.

En



*En modò illustrem titulum merenti  
Addis, Vt septem caput, atq; Mater  
Urbium, sacrae ditionis aucto  
Iure, Vocetur.*

*Maximo sic GREGORIO probante.  
Singulas sed iam memorare longum est  
Res tuas rectè, & sapienter actas,  
Laudeq; dignas.*

*Nostra nec tantùm tenuis Camoena  
Audet: externas neque tu libenter  
Suscipis laudes, meditans beata  
Praemia caeli.*

*Ergò dum fausto populi frequentis  
Excitor plausu, peragente sacra  
Te modò, ac dio aurea proloquente  
Verba lepore;*

*Me stylo incultis, numeroq; paucis  
Versibus, summè tibi gratulantis  
Sit satis parua haec voluisse mentis  
Edere signa.*

De Torque Ordinis TOSONI ab OCTAVIO FARNESIO  
Parmæ Duce, PHILIPPI Hispaniarum Regis nomine,  
FRANCISCO MARIAE FELTRIO de RVVERE Urbini Duci,  
solemniter collato. Bononiae die 15. Septembris.  
MDXXCV.

**V**RBINI DVCIS inclyti  
*Laudes egregias, vix celeberrimus*

*Digno*



Digno dicere carmine  
Praeco sufficeret fortis Achillei.  
Ergò illis humili stylo  
Ne tu Pieri speres decus addere:  
Sed tantum modo Principem  
Ut par est, venerans, quaere, quid indices  
Torques circa humeros, recens  
Munus magnanimi Regis Iberiae.  
Atqui fabula Iasonem  
Non hîc auriculis commemoret pîjs:  
Nec taurum acripedem dolis  
Medeae domitum, raptaq; vellera.  
Quin sit credere dignius,  
Signari historiam Gedeonis sacram.  
Qui nunc rore madente, nunc  
Sicco vellere, magni auxilium Dei  
Expertus, comitum manu  
Vel parua innumeros perdidit hostium.  
Hinc & qui prior ordinem  
Tam clarum instituit, velleris aurea  
Insigniuit imagine  
Delectos procures: rebus in arduis  
Diuinæ ut memores opis  
Discant, non proprijs fidere viribus.  
Ipserum quoq; in omnibus  
Scintillet pietas, iustitia, & fides:  
Et quo mens magis anxia

Aduersis



*Aduersis premitur, tum magis ac magis  
 Virtus cedere nescia  
 Erecta, atq; hilari fronte refulgeat.  
 En quid pectore pendulum  
 Vellus, quid ve micans è silice arguis  
 Flammaram globus vndiq;  
 Ignarum nisi me fallit opinio.  
 Quòd si tu quoq; id approbas,  
 Hunc hymnum finito mixtum alijs feras  
 Pennis fama celerrimis,  
 Quocunq; ibit ouans nuncia nobilis  
 Pompæ, quam modo Felsinae  
 Plausu, atq; omnigenis laetitiae notis  
 Spectauit populus frequens,  
 Ac permagna virum nobilium cohors.  
 Dum consanguinei Duces,  
 Altae ambo Italiae fulgida lumina,  
 Felici vnanimes idem  
 Congressu subeunt hospitium simul:  
 Et dum mox ab Auunculo  
 Ante aras (GABRIEL purpureus Deo  
 Praesul cum faceret sacrum)  
 Praeclara Austriaci munera Feltrius  
 Heros sumit, & additum  
 Virtuti eximiae eximium decus.*

Gabriel  
 Card. Pa-  
 lrotus.

Te



In Translatione SS. ZAMAE, & FAUSTINIANI  
priini, & secundi Bononiæ Episcoporum  
celebrata die 4. Maij. MDXXCVI.

In S. ZAMAM.

**T**E ZAMA sancte concinit  
Bononiensis Ciuitas:  
Primumq; CHRISTI dogmatum  
Suum magistrum praedicat.

Tu nanq; primus horridas  
Eius tenebras discutis;  
Quas impiorum daemonum  
Obduxerant fallaciae.

Romanus olim Pontifex  
Temisit huc Dionysius,  
Praefagiens diuinitus  
Laetum laboris exitum.

Pastore tunc te praenio  
Ouille CHRISTI Felsina  
Inuenit, & mox prospere  
Grex auctus est fidelium.

Deinde per tot secula  
Precum tuarum munere  
Cultus Dei purissimus  
Magis magusq; floruit.

Hinc omne semper abstulit  
Leihale virus haeresum:

Ee

Tem



Templisq; & aris debiti  
 Sunt hîc honores redditi.  
 Nos ergò nunc piè patrum  
 Ritus sequentes optimos,  
 Tuis sacratissimis,  
 Pompam celebrem ducimus.  
 Hanc ò Beate poscimus,  
 Ut actionem comprobēs,  
 Tuos nec unquam supplices  
 Patrocinando deferās.  
 Te deprecante gloriæ  
 Rex CHRISTVS Indulgentia  
 Culpas remittens, largius  
 Nos muneretur gratia.  
 Qui gloriosus inferi  
 Arcem tyranni diruens  
 Caelo triumphum reitulit,  
 Terrisq; pacem reddidit.

In Eundem.

**E**CCĒ qui summo placuit sacerdos  
 Caelitum Patri, vigil, atq; solers  
 Crediti pastor gregis. ecce prudens  
 Ille minister:  
 Qui domus curam benè diligentem  
 Gessit, & seruos domini benignè  
 Pavit. en cultor sibi destinati  
 Impiger agri.

Hic



Hic micans late veluti lucerna,  
 Aureus quoniam Sol veluti refulgens,  
 Deuias mentes hominum tenebris  
 Traxit ab imis.

Nam Dei leges populum docebat  
 Verbo, & exemplo. pietas, fidesque  
 Huic erat cordi, & sine labe sacrum  
 Munus obibat.

Nempe mortalis tibi dum manebat  
 Vita, te talem legimus fuisse:  
 Plurima & de te monumenta patrum  
 Prisca loquuntur.

Sed quis enarret, ZAMA sancte, qualis  
 Nunc poli celsa residens in arce  
 Fulgeas, & quem tibi Rex Olympi  
 Donet honorem?

Non eò humanae penetrare mentes  
 Eualent. ast ò liceat precante  
 Diue te nobis fragili solutis  
 Corpore quondam,

Sic te ibi laetis oculis videre,  
 Vt tua hinc laetis animis reperta  
 Ossa honorantes loculo, & decora  
 Condimus ara.



## IN S. FAVSTINIANVM.

**F**AVSTINIANVM *Felsinae*  
*Antistitem sanctissimum*  
*Ornare sacris laudibus*

*Par est in omni tempore.*

*Hac luce verò cantibus,*

*Hymnisq; vela pandere,*

*Eius beata pignora*

*Piè colentes condecet.*

*Iam mille Solis circuli,*

*Centumq; bis, vel amplius*

*Fluxere, quòd non nobili*

*Loco iacebant condita.*

*Metropolis at nunc dignitas,*

*Recensq; splendor pulchrius*

*Parando conditorium,*

*Felix trophaeum protulit:*

*Idtu videns Bononia*

*Laudes vicissim concine,*

*Puroq; voces pectore,*

*Et signa prome gaudij.*

*Sed ante Regi gloriae*

*Perfolue grates debitas:*

*Qui te nonorum copia*

*Ditat subinde munerum.*

*Eius benigno numine*

*Nostres.*



Nostros tuente fertiles  
 Pax alma fines incolit.  
 Et aeris salubritas.  
 Non hic dolosus improbae  
 Auditur hydrae sibilus:  
 Sed orthodoxus dogmatum  
 Vbique cultus emicat.  
 Haec tanta Diue commoda  
 FAVSTINIANE poscimus  
 Nobis tuo suffragio  
 Longaeva CHRISTVS annuat.  
 Sic deinde temporalibus  
 Det rebus uti sobrie,  
 Vt sempiternae gloriae  
 Post consequamur praemia.

IN SS. ZAMAM, & FAVSTINIANVM.

SALVETE sancti Ecclesiae  
 Bononiensis Praesules:  
 Saluete Patres inclyti,  
 Et Ciuitatis lumina.  
 Tu ZAMA primus arduis  
 CHRISTO gregem laboribus,  
 Hic comparasti, & pabulo  
 Sacri edicasti dogmatis.  
 Mox late in orbe saeuijt  
 Extrema persecutio,

Cum



214 ANTONII GIGANTIS

Cùm grex tenellus obuius  
 Fuit luporum faucibus.  
 Sed pace terris reddita,  
 FAVSTINIANVS affuit,  
 Qui dissipatos undiq;  
 Agnos ouili rettulit.  
 Exinde veri Numinis  
 Cultum vigere Felsina  
 Vidit, Crucisq; insignia,  
 Et sacra templa surgere.  
 Nos ergò vestra nomina,  
 Et haec sacrata pignora  
 Laude, ac honore debito  
 Pie colentes tollimus.  
 Dum se recens haec Metropolis  
 Ornare tanto munere  
 Praeestitens, eis locum  
 Honestiorem dedicat.  
 Sic vos, Beati, pergite  
 Urbem fauore prosequi,  
 Benignus hinc ut omnia  
 Pericla CHRISTVS arceat.  
 Nos charitatis mutuae,  
 Pacisq; nexu colliget:  
 Dei puritatem cordium,  
 Dei sanitatem corporum.

Qui



*Qui mortis atrae vinculis  
Virtute fractis propria,  
Victor resurgens imperat  
Cum sempiterna gloria.*

In Translatione corporis S. GAUDENTII  
Ariminensis Episcopi,  
& Martyris,  
Celebrata die 3. Aug. MDXCIII.  
In oppido Montis Bodij Diœc.  
Senogallien.

**I**N hoc triumpho Martyris,  
Et Praefulis GAUDENTII,  
Nil triste mentes cogitent,  
Nemo sit expers gaudij.  
Laetanti & ore, & pectore  
Nunc sexus, ac aetas simul,  
Et omnis ordo Ciuium  
Hymnos vicissim concinant.  
Colles aprici, & fertiles  
Campi, marisq̃, & amnium  
Laetentur vndae, & litora  
Pij resultent cantibus:  
GAUDENTII dulcissimum  
Nomen subinde proferat,  
Qui nescit eius inclytas  
Laudes disertè proloqui.

*Nanq̃;*



Nanq; ipse Caeli è sedibus  
 Nostras libenter audiet  
 Voces, precesq; Glorïae  
 Regi benignus offeret.

Sic te rogamus, optime  
 GAUDENTI, ut agro, & Oppido,  
 Ne quâ hostis obsit improbus,  
 Patronus adsis sedulus.

Qualem sacrorum dogmatum  
 Te vidit olim vindicem  
 Ariminensis Civitas,  
 Mundusq; totus audiit.

Mendosa quando, & impia  
 Scripta execrando pessimi  
 Coetus, sacrata discidit  
 Manus timere nescia.

Vnde Arrianus te furor  
 Neci cruentae dedit:  
 Sed CHRISTVS in caelestia  
 Mox regna ouantem sustulit.

O CHRISTE quàm magnis tuos  
 Ornas trophaeis milites,  
 Clarans in orbe nomina,  
 Et iam sepulta corpora.

Sed illa, quae sublimibus  
 Paraasti in aulis praemia,  
 Mens debilis mortalium

Nec



Nec cogitando percipit.  
 Nos ergò sancta pignora  
 Efferre pompa nobili,  
 Et haec iuuet solennia  
 Pie, ac decenter exequi.

Ut Rex supernus Martyrum  
 Gaudentibus GAUDENTII  
 Sacro Triumpho, gaudijs  
 Det sempiternis perfrui.

EX D. GREGORIO NAZIANZENO.  
 De Vitæ vanitate, communiq; omnium fine.

QVIS mihi det celeres Aquilæ, vel hirūdinis alas,  
 Ut auolem ex mortalium  
 Coetibus, ac deserta vager per lustra ferarū,  
 Ibiq; contubernio  
 Illarum assuescam? quas iam mortalibus ipsis  
 Fideliores autumo.  
 Nanq; ita fors possim leuius traducere vitam,  
 Tot hīc refertam fraudibus.  
 Sed tamen hoc unum, generi haud commune ferino,  
 Exors mihi dari velim:  
 Nempe Dei gnaram mentem, & caelestia semper  
 Curantem, omīssis perditū  
 Illecebris secli, ac abrupta compede saeua  
 Immanis Orci principis.

Fj

Sin



Sin minus effugere hinc liceat, nec me esse malorum  
 Rex Caelitum expertem annuat:  
 At cuperem aeriam in speculam conscendere, ut orbis  
 Me posset omnis cernere:  
 Ac etiam exaudire procul, dum talia voce  
 Saepè intonarem maxima.  
 Mortales homines, fluxum genus, atq; caducum,  
 Quousq; tandem somnijs  
 Delusi falsis, leuia & ludicra sequendo,  
 Summum relinquetis bonum?  
 Inspecite ò miseri, cuncta ut sub Sole creata  
 Sint morti, & umbris debita.  
 En viridi hic nuper gaudebat flore iuuentae.  
 Membrijsq; robustissimis.  
 Hic forma egregia, & praestanti corpore dudum  
 Verteabat in se se omnium  
 Lumina, ut ante diem cunctis formosior astris  
 Caelo renidet Lucifer.  
 Martia hic arma manu forti tractabat, honore  
 Fulgebat hic Olympico.  
 Optimus hic agitare feras, & vincere cursu  
 Damas, & apros viribus.  
 Hic mensas vino, dapibusq; grauabat optimis,  
 Et terra, & aere & mari  
 Ing'uiem explebat. Sed contemplamini, ut omnes  
 Nunc curui & infirmi sient,

Corpo-



Corporis excessit decor, & subeunte senectâ  
 Defloruerunt omnia.  
 Languent effoetae vires, ventrisq̃, gulaeq̃  
 Omnis voluptas occidit.  
 Nil propè adhuc retinēt hominis, similesq̃ sepulchris  
 Ducunt anhelum spiritum.  
 Rursus & huc acies, ac sanam aduertite mentem,  
 Et vera falsis cernite.  
 Hic sermone potens est. hic insignis aurorum  
 Alto superbit sanguine.  
 Consilio valet hic. naturae hic omnia nouit  
 Arcana. hic est dux maximis  
 Strenuus in bellis. hic opes sibi condidit amplas,  
 Talentaq̃ auri plurima.  
 Hic rigido torquet populos examine iudex.  
 Ostro hic nitens, & laurea  
 Sic tumet, ut regem ipsum paruipendat Olympi.  
 Veruntamen iam omnes breui  
 Momento exiguum in cinerem vertentur, et omnes  
 Aequabit vnica falce mors.  
 Seruos, & dominos, inopes, opibusq̃ potentes  
 Vnae tenebrae, vna & domus  
 Excipiet cunctos, quanuis sibi marmore priua  
 Sepulchra viuentes struant,  
 Ac titulos frustra scalpant, & nomina saxi;  
 Namq; aequa lanx omnes manet.

Ff 2 Et



Et iam iam nudatae erimus calvae, aridaq; ossa :  
 Iam desinet superbia ,  
 Pauperies, morbi, rixaeq;, ac tristia bella ,  
 Et efferae libidines.  
 Omnia corporea simul haec cum mole peribunt ,  
 Donec sub horrendum tubae  
 Clangorem rursus iussi consurgere, magnum  
 Sistamur ante iudicem.  
 Cuius ad imperium poena malè facta perenni  
 Plectentur ; ac p̄j optima  
 Praemia percipient, ac tuta pace fruuntur  
 Celsis locati in sedibus.  
 Proinde meis dictis praebete fidelibus aures ,  
 Grauem & veternum pellite.  
 Eia agite & mundum fugite, & quaecunq; dolosus  
 Fomenta serpens suggerit.  
 Et genus, & formam, & fasces, & opes infidas ,  
 Ut stercorea arbitramini.  
 In Caelumq; oculos, animumq; attollite, verae  
 Ubi sunt opes, & gaudia:  
 Quae non tempus edax, non ulla iniuria tentat  
 Mutare. nanq; ibi Deus  
 Verax illa p̄js animis bona tanta parauit ,  
 Quae nec oculus vidit, neq;  
 Auris percepit, nec item mortalia possunt  
 Corda meditando assequi .

QVIS



Ex eodem.

De Vitæ itineribus, &amp; imbecillitate.

**Q**UIS sum? vel unde veni in hanc miserrimam  
 Lucem? ast ubi insatiabilis terræ sinus  
 Me acceperit, quis rursus atro è pulvere  
 Ero resurgens? num Deus me maximus  
 Servabit, in tutissimum portum ferens?  
 Multas quidem vita hæc fragilis habet vias,  
 Et quenq; diuersæ obrunt angustiae.  
 Nec ullum hominibus sine malo accidit bonum:  
 Utinamq; maiorem malum non occupet  
 Partem. Hic opes sunt infideles, hic honos  
 Est umbra prorsus, atq; larua insomnij.  
 Parere, durus est labor. mendicitas,  
 Compes grauis. formæ autem abit nitens decor,  
 Ut fulgur. ac perexigua mortalium est  
 Gratia, velut florum, ocyusq; deficit.  
 Iuuenta verò ætatis est feruor brevis,  
 Senectæ, vitæ permolestus exitus.  
 Pompa eloquentiæ celerrimè fluit.  
 Gloriaq;, fastusq;, tumidusq; sanguinis  
 Splendor vetusti, sunt propè instar vellerum,  
 Quæ Solis illicò attenuat ardens iubar:  
 Itemq; robur, hispidi quamuis apri.  
 Iniuria est, & contumax opulentia.  
 Vinculum tenax sunt nuptiæ. deinde soboles,

Cura



Cura est necessaria, molestia orbitas.  
 Occasionem Curiae frequentia  
 Praebet malorum. at otium est infirmitas.  
 Tractare sellularias artes pudet.  
 Panis alienus mixtus est sudoribus,  
 Et colere terras, est inexhaustus labor.  
 Pars nauitarum maior undis mergitur.  
 Est penè carcer patria, & vagari  
 Modò huc, modò illuc, liberum haud sanè decet.  
 Sic cuncta demùm hîc sunt labos, & omnia  
 Risus, cinis, visum, umbra, ros, flatus, vapor.  
 Insomnium, unda, fluxus, & vestigium  
 Navis, per aequor quam Noti fert impetus,  
 Aut aliis liquidum secantis aera  
 Praepetibus alis. Estq; vita circulus  
 Semper volubilis, eadem semper rotans  
 Ingi vicissitudine: dies scilicet,  
 Noctes, labores, funera, aegritudines,  
 Curas, dolores, commoda, atq; incommoda,  
 Casusq; nunc contrarios, nunc prosperos.  
 At hoc bone deus optimum sapientiae  
 Tuae fuit consilium, ut inconstantia  
 Hîc omnia forent, & caduca; ut nos amor  
 Caelestium teneret, ac tolleretur humo.  
 Mentis equidem pennis diu vetera, & noua  
 Omnia peragrandò, nihil imbecillius  
 Homine esse comperi, nec aliud hîc bonum,

Fir.



*Firmumq; miseris accidere mortalibus,  
Quàm extollere Crucem, & continenter lacrymis  
Vacare; mens ut purior caelestia  
Meditetur, ac totam Dei se cultui  
Dedat, soluta corporis tyrannide.  
Nam carnis ubi retunditur superbia,  
Exultat animus, ac magis in illo viget  
Imago, quam sortitus est diuinitus.  
Hoc ergò nostrum sit opus, hanc & viuere  
Vitam eligamus, respicientes noxius  
Quaecunq; mundus pollicetur gaudia.  
Contraq; pro supernae amore patriae,  
Onera hinc libenter perferamus omnia.*

LATINI LATINI, Ad CAMILLVM PALEOTVM.

**C**AMILLE PALEOTE *Felsinae decus.  
Nunc Tullianae compar eloquentiae,  
Lumenq; nostri seculi clarè nitens:  
Vetus sodalis, ac senex LATINIVS  
Silentium diutius negat tuum  
Perferre posse, & maximum putat nefas;  
Cum vel breues hinc inde missae epistolae  
Leuare possint saepe defessos graui  
Labore studiorum, atq; publicae rei.  
Redire nunc te ad pristinum morem rogat:  
Decumbo nanq; semper, & crurum tenus  
Vigore prorsus captus adeò debilis,*

*Vi*



*Vt si bacilli firmioris robore  
 Firmetur etiam, corruat gradus tamen,  
 Opemq; fixo debeat repagulo.  
 Status LATINI est talis, haec conditio  
 Post deuolutos octies cyclos decem  
 Solis. caligat oculus, at scribo tamen,  
 In nocte quicquid mens abortu fuderit.  
 Scribe ergò, si me diligis, tu quoq; .Vale.*

Ad Eundem, ANTONII GIGANTIS.

**D**ECUMBIT aeger artubus LATINIVS,  
 Grandi & senectae praegravatus sarcina:  
 Sed non dolori languidus, nec taedio  
 Succumbit ingeni vigor: quo firmius  
 Innixus ille, quàm bacilli robore,  
 Aut seruulorum brachijs Valentibus,  
 Sacros subinde Apollinis visit choros,  
 Ac nota peragrat Pindi, & Heliconis iuga:  
 Libethrae & undas affluenter hauriens,  
 Vel mox amicis lectulo assidentibus,  
 Vel disitis longè bonis sodalibus  
 Propinat eleganter: ut nunc obtigit  
 Tibi CAMILLE Paleote Felsinae  
 Decus, bonarum magne cultor artium.  
 Te quando nectare undiq; & leporibus  
 Manante compellauit ille carmine  
 Senex disertus, aurei index seculi.

Quod



Quod ipse ter quaterq̃ legi, & amplius  
Legendo, plus delectat. Ergò te optime  
Patrone deprecor per omnes Gratias,  
Tuis vt illum candidis Epistolis  
Crebrò laceffas, quò Cycni tam nobilis  
Crebrò vicissim recreemur cantibus.

## Ad THOMAM NALDIVM

Fauentinum.


**N**ALDI Pieridum cura, & amor chori,  
Quî nam te iuuenem viribus ingeni,  
Et membris validum praeuiritantibus,  
Ausim iam senior debilis insequi  
Scandentem iuga Pindi, aut Heliconios  
Montes? quin potius me decet infimis  
Ignotum, ac residem degere vallibus,  
Et surdis numeros arboribus rudes  
Interdum querula spargere fistula.  
Tu verò celeri perge viam pede,  
Optatam valeas tangere vt ocyus  
Metam, & laureola cingere tempora;  
Quam si praecipuis propitiae bonis  
Fortunae anteferes, nae tibi gloriam  
Longo diminui tempore nesciam,  
Et certum senij praesidium, ac decus,  
Praecana iuuenis mente paraueris.

Gg

ANTO-



ANTONII GIGANTIS  
FOROSEMPRONIENSIS  
CARMINA HENDECASYLLABA.



Ad OLIVERIVM Fratrem.



RATRI *Musa* meo diu roganti  
Dic, quo *Pieridum* choros amore  
Amem, & quo studio placere nitar  
Praesertim tibi, sedulus beatos  
Dum te *VIRGILII* sequor per hortos,  
Aut tecum per amoena rura *FLAC-*

*Vagor*, perq̃ rosarium *CATVLLI*: (C)  
Seu leuem arboribus comam nivalis  
Decutit *Boreas*, seu agris virentes  
Herbas verè *Fauonius* reducit.  
Seu flauam *Cererem* terunt coloni,  
Seu rubrum pedibus premunt *Lyaeum*:  
Quin illi numeros *Thalia* perfer,  
Quos lusi vacuus *Bisenti* ad undas,  
Dum per regna equitaret ipse *Ibera*,  
Atq; auri biberet *Tagum* feracem:  
Vi saltem hinc tibi sit fides habenda,  
Viq̃ ille hinc animum laboriosis  
Curis implicitum leuare possit.  
Si nostros tamen hoc honore *Phoebus*

Dignat



CARMINA HENDECASYLLABA. 227

Dignat versiculos, queant ut atras  
Menti sollicitae leuare curas.

Ad PETRVM ANGELIVM BARGAEVM. Pisas.

**F**RANCISCVS tibi VARVS has tabellas  
Vatum maxime perferet, qui Athenas  
Nunc vestras proficiscitur nouellus  
Tyro, & nomine se hoc putat beatum,  
Isthic copia quod tui videndi  
Fiet: quippe tuum celebre nomen  
Toto pectore diligit, colitq.  
Illo nec mihi amicior, nec ullus  
Est hic carior: illiusq. molle  
Cum primum ingenium, & perelegantes  
Mores inspicies, amabis aequè  
Ac doctos iuuenes soles, probosq.  
Te tantum excipias eum benigne,  
Ut mos est tuus, obsecramus: ipse  
Mox viam inueniet suo lepore,  
Qua tuam sibi gratiam aucupetur.  
Me pridem tibi deditum esse nosti,  
Nec longissima tempora, aut locorum  
Interualla animum meum mouere  
Tantillum poterunt, tibi nec vnquam  
Observantia nostra defutura est.  
Nos Prati quid agamus, ipse VARVS  
Abundè referet. Valeamus omnes,

G g 2

Patro.



*Patronus viridi viget senecta,  
Tui semper amans, memorq; semper,  
Et mecum tibi plurimam salutem.*

Ad FRANCISCVM VARVM.

**D**V DVM, VARE, taces, meosq; dudum  
Congressus fugis, & meam Thalam.  
Si culpa accidit id mea, molestum:  
Sin minus, tamen est mihi molestum.  
Nam quocunq; modo carere dulci  
Cogar alloquio tuo, & lepore,  
Est aequè, mihi crede, permolestum.  
Sed hoc nempe molestius futurum est,  
Si causam retices tui silenti.  
Quòd si pergis adhuc tacere, longè  
Molestissimum erit molestiarum.

M. TVLLII BEROI, Ad ANTONIVM  
GIGANTEM.

**G**IGAS optime, & optimi Patroni  
Ocelle, Aonidumq; amor sororum:  
Non possum amplius hos tibi pusillos,  
Quos diuo cecini PETRONIO hymnos  
Debere. hos etenim tibi petenti  
Promissos, poteras mihi moranti  
Iam condicere iure non iniquo.  
Bonum nomen amo & haberi, & esse.

Tu,



*Tu, quod soluo bona fide, memento  
Acceptum facere in tuis tabellis.*

Ad MARCVM TVLLIVM BEROVM:

**T**VOS accipiens, diserte TVLLI,  
Versus Pierio vndiq; affluentes  
Lepore, haud ego reituli in tabellas  
Quo iubes animo, arguant ut vllum  
Te nomen soluisse; sed perenni  
Ut sint indicio tui in me amoris,  
Nec non perspicuae benignitatis.  
Pro qua nostra tibi Thalia grates  
Dicit innumeras, & has vicissim  
Audet mittere paginas legendas:  
Quae saltem auriculis tuis ob vnā  
Hanc causam minus accident molestae,  
Quod laudes celebrant mei patroni.

Ad GVLIELMVM DONDINVM Bononien.  
Ragusij.

**N**VNC desiderium vales, & acrem  
Tibi explere sitim satis superq;  
Studendi, bone GVLIELME. cessent  
Iam tristes querimoniae: ò mihi vnquam  
Det tantum Deus ocij, & quietis,  
Ut quandoq; animum bonis libellis  
Defessum nimio labore, & atris

Curis



Curis implicitum queam leuare?  
 Librorum tibi copia haud pusilla  
 Parta est, parta quies, labor recessit  
 Omnis, & locus otium ipse, & ipse  
 Longum spondet herus: iam iter secundis  
 Capeſce ominibus diu cupitum.  
 Fies, ſpero, breui optime peritus  
 Legum: non tibi parum, inelegans ve  
 DONDINE ingenium eſt: breuiq; diſces  
 Aequè ac qui Pataui, Bononiae ve  
 Annos contereret decem ſtudento.  
 At nos interea ocijſ fruemur  
 Iſdem, ſed ſtudio impari, minusq;  
 Seuero. me etenim iuuat Maronis  
 Carmen doctiloqui, iuuatq; Flacci.  
 Interdum quoque peruagari amoenos  
 Colles Aonios iuuat, chorosq;  
 Muſarum, & placidas adire ſedes.

Ad BERNARDVM LVPVM. Raſuſij.

**I** Bis Italiam reuiſum, & aliam  
 Iucundiſſime mi ſodalis Urbem.  
 Regem Caelicolum precor, ſimulq;  
 Omnes Caelicolas, tibi vt fauentes  
 Semper ſint, & ubiq; ſiue magni  
 Secas nauibus aequoris procellas,  
 Siue iter facis eſſedis, equo ve.

Cum



CARMINA HENDECASYLLABA. 231

Cùm verò Tyberim sacrum bibes, &  
Amoenas latij tenebis oras:  
Caueto, L V P E, ne tui Gigantis  
Reddas te immemorem, sodaliumq̃:  
Quorum tu ex animo, ac tenaci amore  
Vix labi poteris die supremo.

Ad BALTHASAREM FINIVM.

**F**INI, quem series brevis dierum  
Vinclo amicitiae mihi perenni  
Iunxit: quàm modò te libenter optem  
Adire, ac lepidae tuae camoenae  
Ad dulces numeros meum excitare  
Pridem nescio quo graui Vetro  
Torpescentem animum, nihilq̃ pridem  
Curantem citharae fides sonorae,  
Et molle alloquium bonae Thaliae.  
Sed me tristis hyems vetat niuofas  
Per Alpes equitare, blandi amicum  
Veris, & Zephyri tepentis aurae.  
Tu verò mihi fer, precor, vel absens  
Opem, & languidulae medere menti,  
Non herbis, neq; pharmacis; sed illa  
Mira Apollinis arte, qua sepulti  
Manes ad superas vocantur auras;  
Nempè carminibus tuis politis.  
Quae CELLESIVS, optimus tuarum

Vincentius  
Cellesius  
I. C. Pi-  
storienfis

Vir-



Virtutum speculator, ore pleno  
 Collaudat, meritoq; ad astra tollit.  
 Atqui illi hinc mage cogor inuidere,  
 Quod praesens fruitur tuo lepore,  
 Et sermone diserto, & eleganti.  
 Me solor tamen, ac utrumq; vestrum  
 Interdum memorem mei futurum  
 Spero: quin etiam (vi boni, atq; comes  
 Estis) colloquijs me adesse vestris  
 Fors optabitis. ò ne inanis ipsum  
 Spes ludat, prohibete: sic benigni  
 Vobis omnia vota dij secudent,  
 Et Phoebus facilis vocatus adsit.

## POENITENTIS Carmen.

**I**AM risi, & cecini, satis superq;  
 Indulgens genio, ocioq; inertis:  
 Nunc tempus misere fleo peractum;  
 Tempus quod spatio haud breui dierum,  
 Sed multos malè perdidit per annos.  
 Namq; ex quo didici bonum, malumq;  
 Nil unquam nisi praua perpetravi  
 Aut facto, aut animo, aut nocente lingua.  
 Eheu quid volui mihi misello?  
 En quò tempora floridæ iuuentæ  
 Contuli, en melior quò abiit ætas;  
 En mihi modò quos refert amarus

Fru-



*Fructus segnitia, & levis voluptas.  
 Tu verò omnipotens Deus benigne,  
 Cuius est proprium, suas fatenti  
 Noxas parcere, sume poenitentis  
 Hoc rei indicium, meisq; sacrum  
 Admisce lacrymis tuum cruorem,  
 Illas qui faciat valentiores  
 Ad sordes animae meae luendas.  
 Ac ne tot maculis onusta foedis  
 Laedat mox oculos tuos decoros,  
 Fac eam tui amore sic calere  
 Clementissime IESU, ut omnia illi  
 Prae te gaudia sordeant, & vni  
 Obnixè studeat tibi placere.*

Ad LUDOVICVM VILLANIVM.

**Q**UID ò Pieridum nouelle cultor  
 Vis tibi, numeris tuis ad astra  
 Metollens minimum omnium poetam?  
 Num vanam philomenae, et obstrepentem  
 Anserem equiparas cyncis canoris?  
 Agnosco tamen, approboq; mentem,  
 Quam praefers cupidam viros colendi;  
 Dignè qui sacra Apollinis ministrant.  
 Quos ego & veneror libens, honore  
 Et omni reor esse prosequendos.  
 Versus caetera mi tuos fuisse

Hb

Per-



Pergratos bone LVDOVICE credas,  
 Quod sint & lepidi & perelegantes.  
 Quare te magis hinc amo, tibiq;  
 Grator moribus hoc tuis venustis  
 Additum decus, in diesq; tantum  
 Augeri cupio, vt tuae Camoenae  
 Cantu non modò gaudeant Bisenti  
 Nymphae, sed quoq; Flora, et Arnus illā,  
 Tota & Tuscia laudet, ac celebret.

Ad IOANNEM CVRTERIVM GALLVM  
 Virum doctiss.

**C**VRTERI optime, amabilis, diserte,  
 Ergò Pieridum te amore captum  
 Fateris? neq; quas virente quondā  
 Amplexus fueris semel iuuenta,  
 Iam canum quoq; dispudet fouere?  
 Nimirum iste animus mihi probatur  
 Tuus, teq; etiam hinc magis magisq;  
 Amo: cum tamen antè plurimarum  
 Virtutum merito, atq; comitatis,  
 Et docti alloquij tui lepore  
 Tractus; quàm pote maximè te amarem.  
 Quin nostri vt tibi pectoris recludam  
 Sensus, & fidei id tuae rependam;  
 Et me nescio quam nouem sororum,  
 Vel quandam magis (vt reor) sacrati

*Ipsa-*



Ipsarum famulam chori, iuuabat  
 Olim deperisse: quae per imos  
 Me colles Heliconis euagari  
 Interdum, & liquidas sinebat undas  
 Summis Castalij attigisse labris.  
 Sed tristes aliò cor inquietum  
 Iampridem reuocant, premuntq; curae.  
 Tum me segnities, malusq; torpor,  
 Quàm truncos hedera, arctius reuinxit:  
 Ut lentos nequeam mouere gressus,  
 Nec viam reperire, qua priores  
 Illius repetam libens amores.  
 Neminem tamen inuidis ocellis  
 Prospecto, celeri pede, ac secundis  
 Scandentem omnibus iugum beatum  
 Parnassi, & viridi comas corona  
 Cingentem inter Apollinis sodales.  
 Quin planè meritos eis honores,  
 Sicut nunc tibi, gratulor, IOANNES.  
 Tantum in desidia meae leuamen  
 Magno te studio rogo, suaues  
 Cantus eximiae tuae Camoenae  
 Meas ne prohibe venire ad aures.



MARINO BENVENUTO CINGVLANO,

Annum agenti LXXIII.

ANT. GIGAS Annos natus LV.

**S**ENI iam senior Gigas MARINO  
 Nouo carmine plurimam salutem  
 Dicit. quippe nouum libet vocare  
 Carmen, quod residui, ac diu silenti  
 Dictauit calamo recens Thalia.  
 Sic & vere nouo nouos solemus  
 Flores dicere, & arborum nouellas  
 Frondes, quæ hys hyeme, ac gelu soluto  
 Iam tandem reuirescit alma Tellus.  
 Huius tu facie noua, & colore  
 Distincta vario, Nouam colendo  
 Villam, non oculos modo, atq; sensus  
 Oblectas, per agros vagans apricos,  
 Vel per roscida prata, ut est tuus mos,  
 Herbas inde legens, & hinc salubres:  
 Sed mentem quoq; recreas, alisq;  
 Illum dum meditare, cuius ista  
 Surgunt imperio: Undiq; & per amplam  
 Rebus materiam elicis pusillis,  
 Qua grates referas Deo, atq; laudes.  
 Paruoq; è silice excutis micantem  
 Scintillam, unde magis cor incalescat,  
 Accaelestia purius penetret.

Villanous,  
 Rus Goza  
 dinorum.

Haec



*Haec curae tibi semper esse noui,  
 Huc & omnia, quae vides, legis vè,  
 Refers ingenio pie sagaci.  
 Hac te de sophia oppidò beata  
 Re, verbisq; subinde differentem  
 Ipse audire libenter assuetus,  
 Per calles populo minus frequentes  
 Dum comes comitem sequor fidelem,  
 Immo vt discipulus bonum magistrum,  
 Vel vt filius optimum parentem,  
 Aegrè iam triduum fero te abesse.  
 Quin desiderio tui recessum  
 Istum iam tibi cogor inuidere:  
 Moraeq; impatiens te adire gestis  
 In horas animus; sibiq; demum  
 Satis si faciet, tuo lepori  
 Verè comperies inesse vires,  
 Quales creditus est habere magnas  
 Ignotus, nisi fortè fabulosus:  
 Mirandis siquidem modis ab illo  
 Mortalem perhibent trahi, ac teneri.  
 Hoc tamen tua BENVENUTE virtus  
 Longè maior erit, valentiorq;  
 Quòd breui spatio haud homuncionem  
 Distantem, sed ab urbe ter, quater vè  
 Passus mille procul trahet Gigantem.*

Bononiae. MDXC. Apr.

Albertus  
 Magnus li.  
 2. cap. 6. de  
 Mineralib.

SVM



AD IOANNEM ANDREAM CALIGARIVM  
 Britonori Episcopum,  
 CLEMENTIS VIII. Pont. Max. à Secretis.

S VMMI Pontificis negocio  
 Ministro auriculas leui morari  
 Pagella, graue crimen esse ducens,  
 Iampridem calamum silere iussi.  
 Magna nunc igitur, Patrone dulcis,  
 Dere scribere me tibi putato:  
 Quando ipsam quoq; desidem Camoenā,  
 Torpentemq; diu Stylum excitauit.  
 Quin magna est adeò (ut mihi videtur)  
 Tanti & ponderis, ut subinde pressi  
 Renes, atque humeri gemant Gigantis.  
 Nam centum mihi pensio aureorum  
 SIXTI lege onus addidit molestum,  
 Veste incedere non prius sueto  
 Talari: tunica licet MARINVM  
 Nostrum, pileoloq;, pallioq;  
 Libens sponte mea antea emularer,  
 Si barba, & studio id minus valebam.  
 Nunc ægrè duodena lustra fractis  
 Portans viribus, ægrius grauantem  
 Hanc circumfero sarcinam coactus.  
 Seu quandoque viam ire per lutosam,  
 Siue puluere sordidam necesse est,

Marinus  
 Benueuat

(Non



(Non enim leuiter iuuat per Urbem  
 Vagari, hoc onere implicante gressus)  
 Eheu quàm male post domum reuerso,  
 Heu quantum est mihi taedij, ac laboris:  
 Cui nec seruulus est, nec illa forfex  
 Arridet celebris TRIPHONIANA.  
 Sed ne incommoda longius querendo  
 Nostra, sim tibi forte permolestus:  
 Te quantum pote maxime rogamus,  
 Vt nobis aliquâ feras leuamen:  
 CLEMENTEM q̃, prece optimum fatiges,  
 Supplici hanc veniam annuat benignus;  
 Priore vt liceat resumpto amictu  
 Expedire minus laboriosè  
 Aeu quod superest iter supremum.  
 Id si FIAT, ero deinde verè  
 Exultans veluti gigas, & ipsum  
 Hinc debere magis tibi fatebor,  
 Quàm si cum titulo mihi decoro  
 Impetres reditus duplo auctiores.

Triphon  
 Bencius Af  
 fias tonde  
 bat sibi ve  
 stes lutosas

Ad Eundem.

**S**i centum mihi linguae, & ora centum  
 Sint, dignas nequeam, Patrone, grates  
 Tibi dicere; tantum abest, vt vnquam  
 Potis sim meritis pares referre.  
 Nam si pluribus antea teneri

Ipsam



Ipsum nominibus tibi fatebar;  
 Nempe quod lepida allocutione  
 Dignares, & epistolis disertis,  
 Nec non hospitio pereleganti:  
 Adde & munera, quae meum subinde  
 Musaeum decoras, vel usque ab Istro,  
 Longinquisve alijs petita ab oris:  
 Quid censes modo me, stylo silente,  
 Tecum corde loqui, intimoque sensu,  
 Cum tantum mihi gaudij pararis,  
 Quin me, ut verius eloquar, bearis?  
 Per te namque meae preces Camoenae  
 Maximus Pater audijt benigne;  
 Quo nihil poterat magis cupitum  
 Nobis, vel magis obuenire gratum.  
 Unde me tibi vinculo obligasti  
 Tam firmo, ut nequeat die supremo  
 Potenti Lachesis manu resolui.  
 Sed plures numero deinde versus,  
 (Vellem dicere posse cultiores)  
 Ni frustra id mihi Musa pollicetur,  
 Graui pectoris indices te adibunt.

Ad Eundem.

**N**UPER versiculos fide obligatos  
 Bona, iure quidem optimo reposcis,  
 Praesul optime, & acribus subinde  
 Spon-



CARMINA HENDECASYLLABA. 248

Sponsorem stimulas pigrum libellis:  
 Cum prorsus nihil hiscere ipse contra  
 Ausim. quin ea, quae penes seuerum  
 Iudicem quoq; forsitan valerent,  
 Minus profero: nempe iam labantis  
 Aequè ac corporis, ingeni senectam:  
 Eiusdem & steriles, velut malarum  
 Proventus segetum; sed haec omitto,  
 Ne tuae videar benignitati  
 Parum fidere, dum pudenter abs te  
 Tardae oro veniam solutionis.  
 Verum ne tibi me moras dolose  
 Nectendo imposuisse suspiceris,  
 Et nil iam fore carminis daturum;  
 Paucos interea arrhabonis instar  
 Hos sume hendecasyllabos, aprico  
 Quos in colle Arientis exaravi:  
 Caeli temperies ubi salubris,  
 Et ruris varius lepos amoeni  
 Tam bellè rabidi ab Leonis aestu  
 Corpus incolume hætenus tuentur;  
 Quàm doctè PALEOTIVS diserto  
 Sermone, & numeris valentiore  
 Doricis, animum mihi serenat.  
 Sed gratissimus ille utrique nostrum  
 Sermo saepe recurrit, aureos qui  
 Mores, ingeniumq; caeterasq;

Camillus  
 Palæotus  
 Senator.

li

Virtu



*Virtutes CALIGARII recenset.  
Cuius obsequijs, ut ante semper,  
Addicti ex animo, manus sacratas  
Nunc ambo reuerenter osculamur.*

CAMILLI BALDII Ad ANTONIVM GIGANTEM  
Virum suavis.

**A**NTONI pater eruditionum,  
Et quondam pater omnium leporum,  
Musarum omnium, & elegantiarum:  
Canis cum senibus probus, gravisq;  
Idem inter iuvenes senex venustus.  
Nunc non amplius. Hec fuere quondam,  
Cum gratus tibi erat tuus CAMILLVS,  
Quem tu plus oculis tuis amabas,  
Amariq; etiam ille se putabat,  
Ut pulchras iuvenes amant puellas,  
Amabatq; etiam ille te vicissim,  
Ut pulchrae iuvenes amant puellae.  
Verum tu modo pessime abscidisti  
Omnes candiduli moras amoris:  
Cum primum es meditatus ominosam  
Fugam. tu hinc tacitus pedem abstulisti?  
Num quid me Hercule te pudet, pigetq;  
Fatere obsecro. Quid? pudet fateri?  
Tu hinc discedere nescius volebas,  
Quò nulla, minimaue derelictum

Con-



Consolarier allocutione  
 Cogere hominem, tuumq̃ amicum.  
 Credebas me, homo belle, cogniturum  
 Non esse insidias tuas? sed erras:  
 Omnes certè in bias vorare ficus,  
 Et omnes pepones vorare solus,  
 Sed erras: venio, voloq̃ partes  
 Meas; sin minus, euocabo musas,  
 Quae te more Lycambis impotenti  
 Proscindunt malè deprecatione.  
 Deuotis malè versibus petitus  
 Flebis, ast ego risero vicißim.

Ad CAMILLVM BALDIVM  
 virum doctiss. suauissimumq̃.

**E**RGO candide, dulcis, ac diserte  
 BALDI, tam levis illicò mouere  
 Quiuit suspicio grauem, & quietam  
 Mentem? qualem ego vos sophos habere  
 Olim credideram, & supra esse curas,  
 Affectusq̃ humiles homunculorum.  
 Nunc sentire aliter tuum coegit  
 Me carmen, lepidum illud, ac venustum,  
 Sed nimis stomacho obsequens, gulaeq̃,  
 Ficus, & pepones ligurienti.  
 Pro qua nec metuit bono sodali  
 Iras Pieridum, ac truces Lycambis

Ii 2

Exitus



Exitus etiam male ominari.  
 Haecine ergo erit illa Temperantis  
 Virtus, quam è cathedris ad astra ferre  
 Verbis sesquipedalibus soletis?  
 Iustas praeterea adderem querelas  
 Laesi non leuiter boniq;, & aequi;  
 Dum tam praecipiti simul tabella  
 Absentem insimulas, reumq; damnas.  
 Sed stylum iubeo esse continentem,  
 Tuum quando fuisse temperatum  
 Nego; ne videar pari referre  
 Par, quod te quoq; mordeat vicissim:  
 Cum versus cupiam meos vocari  
 Liberas potius iocationes,  
 Quàm dicteria mordicus regeſta.

Ad LIVIVM LIELMETIVM Patauinum  
 Sodalitatis Diui GEORGII ab ALGA  
 Canonicum.

**M**VITO cellula cui penure ferta est,  
 LIELMETI, ut tibi, semper ille mensas  
 Quis lautas in Apolline apparare.  
 At secus mihi sentio euenire,  
 Cui & cellula inanis est, & arca.  
 Nam pridem mea nil recens Thalia  
 Condidit, studijs bonis omiſſis:  
 Nec si id gestiat, ocij, & quietis

Nunt



Nunc tantum superest moranti in Vrbe,  
 Ut concepta queat stylo referre.  
 Non quod vsque adeo negotiorum  
 Mole hic me querar obrui molesta,  
 Expertem penitus negotiorum:  
 Sed quod Curia viuere absq; curis  
 Non sinat, neq; liberè ociari.  
 Ni velim omnia (si tamen daretur)  
 Vitans officia, & sodalitates,  
 Sermonesq; hominum elegantiorum,  
 Rustici, ac tetrici subire nomen,  
 Aut si his est aliud mage odiosum.  
 Hinc fit, ut nequeam nisi obsoletos,  
 Et paucos numero, tibi legendos  
 Versus mittere, ne tuos rogatus,  
 LIVI candide, negligi putares;  
 Qui ut Regis mihi iussa praepotentis  
 Sunt, ut ante fuere, eruntq; semper.  
 Nos verò aurea pro rigente ferro  
 Abs te munera poscimus vicissim.  
 Nempe carmina, melle dulciora  
 Hybleo, tibi quae velut perenni  
 Fonte, doctiloquo fluunt ab ore.

In obitu Io. LEONARDI vulgò dicti il LETTERATO.

VIDIT maxima Roma LITERATVM  
 Ignarum penitus scientiarum.

Eum.



*Eundemq; diu omnium indigentem  
 Mirata est, studio, ac paterno amore  
 Plus minus pueros cibasse centum.  
 Postremò stupuit, iacens cadauer,  
 Quod viuens erat horridum, ac lutosum,  
 Multorum labijs piè osculari.  
 Haec hospes quoq; curiose, par est,  
 Commentariolis tuis reponas.*

*Epitaphium eiusdem. in Ecclesia  
 Confraternitatis Mortis.*

**C**ORPORI hîc requiem laborioso  
 Repperit rudis ille LITERATVS,  
 Vir vitae integer, ac paternae egenos  
 Notus in pueros benignitatis.

*Obijt anno Christi MDXCV. die xv. Feb.*

*AD IULIANVM CORBELLIVM Iuriscons.  
 Ex libero Oppido Pennarum S. MARINI,  
 Octuagenarium.*

**C**AUSAM, quam toties mei silenti  
 Audisti, bone IULIANE, eandem  
 Puta mensibus his tribus fuisse.

*Ex quo nempe tuas ego tabellas  
 Accepi, gelidis datas diebus  
 Brumae, at non gelido stylo exaratas,  
 Nec longo senio labante dextra.*

*Easdem*



Easdem siquidem notas, & aequo  
 Ductas ordine lineas videre  
 Nunc mihi videor, quibus iocosos  
 Scribebas numeros Damonis, atq;  
 Montani, viridi calens iuuenta:  
 Iam tū, cū Oppida Montis Orbiani, et  
 Fortini regeres. mihi vnde pernas,  
 Caseos, pyra, & ova misistabas:  
 Dum fratrem puer optimum, an parentem  
 Dicam? illum vnanimem tui sodalem,  
 Sectarer studij ducem, ac magistrum.  
 Non ignota loquor tibi: sed ò quā  
 Iucunda haec animo est, eritq; semper  
 Recordatio temporum, & locorum;  
 Sortita est vbi nostra tam beatum  
 Ortum amicitia, vt decem peractis  
 Lustris se incolumem, atq; parte ab omni  
 Integram hactenus exstitisse iactet.  
 Quot verò addere vel dies, vel annos  
 Decrerit superūm Pater, nefas est  
 Nobis quaerere: debitas at illi  
 Ore, & pectore gratias agamus  
 Accepti memores. & hoc precemur,  
 Vitae vt curriculum annuat supremum  
 Nos pie, atq; decenter expedire:  
 Quod verè diuturnioris aevi  
 Bonum est praecipuum, ac mage expetendum.

Oliuerius  
 Gigas.

MDXCV. Mart.

QVID



## Ad Librum suum.

**Q**UID nigrae opprobrium fugis liturae,  
 Vel acri impositas notas ab ungue  
 Rudis pagina tandiu perhorres?  
 Ah cur non magis sibilum vereris,  
 Et risus iuuenum procaciores?  
 Nunc ergo potius mei sodalis  
 Feras iudicium subire, aduncos  
 Quàm multo in populo pauere nasos.

## IVLII SIGNII

## Ad ANTONIVM GIGANTEM.

**Q**UOD te Roma colat, miretur, non ego miror;  
 Ingenio miros suspicit illa viros.  
 Quod GABRIEL retinere sua te gestiat aula;  
 Quid mirum? doctos hic fouet, ornat, alit.  
 Quod sit amabilior, nullus te carior uno,  
 Hoc tua dule virtus, lingua diserta, fides.  
 At satis id nequeo mirari, clare poeta,  
 Cur tua non promas aurea scripta, GIGAS.  
 Prodeat ille Liber, celebri quem laude CAMILLVS  
 Extulit, & quem omnis voluere lector aues.  
 Cultum profer opus, tibi quod dictauit Apollo:  
 Sic alios vates, vincere teq̃ potes.

Vr



Ad IULIVM SIGNIVM.

**V**T nullum expellit venientem ad limina Petri  
 Maxima Roma, Orbis totius alma parēs:  
 Sic quoq; me ignotū excepit, retinetq; negoci  
 Expertem, nec quis sim, rogat, unde, domo.  
 Munificus pascit seruum **PALEOTVS** inertem, Gabriel  
Card. Pa-  
laotus.  
 Saepius & rheda dignat, & alloquio.  
 Apparent rari veteres mihi in Vrbe sodales,  
 Nec iuuat obsequio deinde parare novos.  
 Odit Musa senem, stylus aret, dextera friget,  
 Sola animum recreat lectio, parua tamen.  
 En meus hīc status, & multum diuersus ab illo,  
 IULI, quem nimius fingere suasit amor.  
 Non tamen esse alium contendo, vel anxius opto;  
 Obstat nanq; aetas, ingeniumue magis.  
 Hoc monet, vt viuam paruo contentus, at illa  
 Vertere iam me aliō spemq; animumq; iubet.  
 Hinc mihi et ille, boni excierant quē iussa **CAMILLI**, Camillus  
Palæotus  
Senator.  
 Ardor sub gelido pectore pressus hebet:  
 Scilicet edendi mea carmina. pergis at ipse  
 Torpentem lepidis extimulare modis;  
 Et dulces libuit cantus adhibere Camoenae,  
 Quis fera Cyclopi frangere corda vales:  
 Nedum te magni, vt par est, facientis amici  
 Aures, atq; animum flectere, quō ipse velis.  
 Saepe etiā eximius mihi idem **SPANNOCCHIVS** vltro  
 Kk Con-



*Consuluit, longas increpitatq; moras.  
 Cur non ergò libens, vel non inuitus, amorì  
 Iam faciam vestro, consilioq; satis?  
 Pareo utriq; : librum vobis en dedo, tenebris,  
 Luceuè sit dignus, vos statuisse decet.  
 Me penes haud aegrè latuit; nunc desinit esse  
 Iste meus, vestri postmodo iuris erit.*

IULII SIGNII Ad ANGELVM SPANNOCCHIVM  
 Iurifcons. Celeberrimum.  
 In ANTONII GIGANTIS Poemata.

**C**ORPOREAM molem vastā, insanosq; GIGAN-  
 Prisca aetas ausus, impia facta refert. (TVM  
 At liber hic orbi testatur, noster ut alto  
 Ingenio praestans sit, calamoq; GIGAS.  
 Tentantes illi superum rescindere Caelum,  
 Sensere irati fulmina dira Iouis.  
 Hic verò certans veteres aequare Poetas,  
 Et rhythmos illis surripere, atq; stylum;  
 Immortale decus Studijs acquirit honestis,  
 Quoq; latere magis vult, minus inde latet.  
 Tergemina virtute, altis ceu Montibus astra  
 Scandit, & ut Phoebus fulget ubiq; nouus.  
 Palladis vnus amor, Themidis lux, ANGELE Diuū,  
 Gratia, SPANNOCCHI, semper habenda tibi.  
 Nam tua Suada monet, monitis & flectit amicis,  
 Ut tam praeclarum proferat auctor opus.  
 F I N I S.



251

is,

Te

IVM

a.

GIGAN-

(TVM

owns.

Diun,

bi.

icis,